



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Ln 4.197

**HARVARD COLLEGE
LIBRARY**




**THE ESSEX INSTITUTE
TEXT-BOOK COLLECTION**

**GIFT OF
GEORGE ARTHUR PLIMPTON
OF NEW YORK**

JANUARY 25, 1924







Neßer

Stuttgart
1828

1875

1875

CORNELII NEPOTIS

QUAE EXSTANT.

AD

OPTIMORUM LIBRORUM FIDEM

CUM

VARIARUM LECTIONUM DELECTU

EDIDIT

FELIX SEB. FELDBAUSCH.

STUTTGARTIAE,

SUMTIBUS CAROLI HOFFMANN.

MDCCCXXVIII.

L n 4. 197
✓

HARVARD COLLEGE LIBRARY
GIFT OF
GEORGE ARTHUR PLIMPTON
JANUARY 28, 1924

W

P R A E F A T I O.

Quam ego Cornelii Nepotis editionem commentariis in usum scholarum instructam C. F. Winteri impensis Heidelbergae excudendam curavi, ea nondum in lucem prodierat, cum Zellius, V. D. atque amicus mihi, a me quaesivit, num Stuttgartianarum editionum auctorum classicorum, quas ipse sua cura ornaturum se professus est, partes aliquas suscipere vellem. Neque dubitavi equidem, meam ad Nepotis vitas percensendas promittere operam, ex iis, quae Zellius Stuttgartianarum editionum proposuerat, institutis. — Ut in Heidelbergensi ita in hac editione Bardilianam imprimis secuti recensionem sumus, ita tamen ut pluribus, quam illic factum est, locis aliarum editionum

vel codicum variae lectiones sint appositae. Quoniam vero non est huius editionis ad diiudicandam dubiam lectionem plura proferre, plerumque conferendos laudavimus editores, qui nostro ex animi iudicio de loci cuiusque scriptura explicuerint. Quo in genere tu, lector benevole, veniam dabis, cum legeris, meam ipsius editionem Heidelbergensem nonnunquam esse citatam.

INDEX,

CODICUM ATQUE EDITIONUM, QUAE IN LECTIONUM VARIETATE COMMEMORANTUR, QUAEQUE HOC LOCO ORDINE ALPHABÉTICO SUNT DISPOSITAE.

A) CODICES.

AX. — *Axenianus* codex a Petro Axenio nominatus, optimae notae; de quo sicut de reliquis, qui hic enumerantur, cf. Fischerum in praefatione, cuius, quae huc pertinet, partem etiam apud Bardilium (in ed. Stav.) invenies p. VI sqq.

BOECL. — *Boeclerianus* codex, complexus omnes praeter Atticum vitas.

DAN. — *Danielis* codex.

ERNST. — *Ernstii* codex, non optimae notae.

GIF. — *Gifanii* codex, bonae fidei.

GUELPH. — *Guelpherbytanus* codex, optimae notae.

LEID. A. B. — *Leidensis primus atque secundus*.

LONG. — *Longolii* codex.

MEND. — *Mendosianus* codex, a Francisco Mendoza nominatus, bonus, quamquam non adeo antiquus.

OX. — *Oxoniensis* codex.

Voss. A. B. C. — *Vossianus primus, secundus, tertius.*
In tertio desunt vitae inde ab Alcibiade usque ad
Timoleontem. Secundus apprime bonus.

B.) EDITIONES.

ALD. — *Aldinā* (ex officina Aldi) ab Asulano curata.
Venetiis 1522. 8.

ASCENS. — Editio a Badio *Ascensio* curata. Parisiis
ann. 1514 fol.

BARD. — *Bardilii* maior editio, locupletissima, quam
Staverenus (vid. Stav.) antea ediderat, prodiit
Stuttgartiae, ann. 1820. 8. II. Voll. — Minor
Bardilii editio, priore non nusquam emendatior,
Tubingae 1824. 8. — Quod si *Bard.* citatur ad
diiudicandam lectionis cuiusdam varietatem, illa
maior significatur editio.

BOECLER. — *Boecleri* editio Argentorati, ann. 1640. 8.
saepe repetita 1644, 1648. al.

BOS. — *Bosii* commentariis instructa editio prodiit
Lipsiae ann. 1657. 8. emendata 1675. a *Fischero*
repetita Lips. 1759. auctior 1768. egregie emen-
data atque aucta ab *Harlessio*, Lips. 1806. 8.

BREM. — *Bremii* editio cum annott. german. Turici
ann. 1796. 8. — 1812. 1819. 1827. ubi legitur
Brem. 4., ibi a prioribus differt quarta editio.

CELLAR. — *Cellarii* commentariis instructa editio, pro-
diit Lipsiae 1689. 12. — 1694. 1787.

DÄN. vel. DÄHN. — *Daehnei* editio, cum ann. critica atque exegetica prodiiit Lipsiae 1827.

ERNST. — *Ernstiana*, editio prodiiit Hafniae 1629. 12. Amstelodami 1637. 12.

FISCH. — *Fischeri* Bosiana editio vid. *Bos*.

GÜNTHER. — *Güntheri* editio utilissima, Halis Saxonum 1820. 8.

HARL. — *Harlessii* Fischeriana et Stavereniana edd. vid. *Bos*. et *Star*.

HEID. — *Heidelbergensis* mea editio, sumtibus B. F. Winteri, 1828. 8.

HEUS. — *Heusingeri* editio egregia. Lipsiae 1717. 8. 1755. 1786. 8.

IENS. vel PRINC. — Editio Princeps, curante Nic. Iensonio, prodiiit Venetiis 1471. fol. repetita 1473. 1476. (Desunt vitae Catonis et Attici).

KEUCH. — *Keuchenii* editio prodiiit Lugduni Batavorum ann. 1658, 8. cum notis variorum. — saepissime repetita: 1667. 1675 cett. — Hafniae 1776.

LAMB. — *Lambini* nova recensio Nepotis prodiiit Parisiis 1569. 4. — 1579. — Francof. 1608.

LONGOL. — *Longolii* editio e Mss. et cum scholiis excusa ed., Coloniae ann. 1543.

PRINC. — ed. princeps vid. *Iens*.

RICKL. — *Ricklefsii* editio cum ann. german. Hannov. 1802. 8. repet. 1825.

- STAV.** — *Stavreniana* editio maior prodiit Lugduni Batav. ann. 1734. 8. — auctior 1773. — nuper accuratissime edita a Bardilio, vide *Bard.* — *Stavreniana* editio minor Lugduni Batav. 1755. 12. *Stavreniani* annott. repetiit Harless. Erlangae 1774. 8. 1800. 1820.
- TITZ.** — *Titzei* editio. Pragae 1813. 8. — in rebus criticis magni aestimanda.
- TZSCH.** — *Tzschuckei* editio. Goettingae. 1804. 2 Vol.
- ULT. vel ULTR.** — editio *Ultratraiectina*, e MSS. excusa, prodiit ann. 1542. 8.
- WETZ.** — *Wetzelii* editio, Liegnitii 1801. 8. rep. Lips. 1822.
-

CORNELII NEPOTIS V I T A

A GER. IOAN. VOSSIO CONCINNATA.

[*De Historicis Lat. I. 14.*]

CORNELIUS NEPOS et ante Caesaris dictaturam, et eo dictatore, et postea, vixit. Hieronymus in Chronico Eusebiano refert illum ad annum Augusti quartum. Nec cuiquam repugnem, colligenti inde, tum demum divulgare ea coepisse opera, quibus maxime inclaruit. Padi erat accola, teste Plinio, lib. III, cap. 18; unde Catullo epigrammate primo Italus, Ausonio autem, epist. 24, Gallus vocatur: nempe quia Italia Transpadana diceretur Gallia togata. De urbe patria quidquam se habere comperti negat Elias Vinetus, in Aus. Idyll. 7. At Veronensem fuisse, in Leandri Alberti Italia lego: uti et in Cosmographia optimi atque amicissimi quondam viri, Pauli Merulae. Immo ex Veronensium historicorum syllabo (quem doctissimus amplissimusque Alexander Becellus, Veronensis urbis cancellarius, fecit, ac illustrissimus comes, Fernandus Nogarola, vir, ut genere, ita literarum studio, nobi-

lissimus, cum V. Cl. Laurentio Pignorio, atque is mecum communicavit,) intelligo, natum fuisse Nepotem in Hostilia, qui Veronensium vicus est, Tacito, Plinio, Cassiodoro, et Antonino in Itinerario memoratus, hodieque ecclesiasticae Veronensium iurisdictioni subditus. ¹⁾ Historicus hic Ciceronis amicus familiaris a Gellio vocatur lib. XV, cap. 28. *Chronica* scripsisse, testis est idem Gellius, lib. XVII, cap. 21. In his pro triplici tempore, ἀσφάλῳ, μυθικῷ καὶ ιστορικῷ (de quibus, ex Varrone et aliis, libro de Arte historica diximus) tres videtur scripsisse libros, ac singulis unius temporis narrationem esse complexus. Sane tres libros fecisse Nepotem, quibus omne aevum comprehenderit, liquido testatur Catullus initio Hendecasyllaborum. Nec historicum tempus ab eo solum esse tractatum, indicio est illud Ausonii: „Apologos Titiani, et Nepotis Chronica, quasi alios apologos (nam et ipsa instar sunt fabularum), ad nobilitatem tuam misi.“ Item ex eo, quod Tertullianus in Apologetico adversus gentes. (ubi eum inter antiquitatum commentatores disertim reponit) dicit, haud aliud Saturnum, quam hominem, promulgasse. Quod etiam Lactantius tradit lib. I, cap. 13. Reliquit praeterea *libros illustrium virorum*, quorum Gellius meminit lib. XI, cap. 8, et Servius in I Aen. Eorum lib. II, XV et XVI, citat Charisius ²⁾. Ex his habemus viginti duos exterarum gentium imperatores.

1) *Rezzonius* in disquisitionibus Plinianis, et *I. Heldius* in Prolegomenis ad vitam Attici, *Parmas* natum Cornelium Nepotem dicunt.

2) pag. 195, 114, 113 ed. Putsch.

Ceteris libris egisse de Romanis, haec eius verba ostendunt in extrema Hannibalis vita: „Sed nos tempus est huius libri facere finem, et Romanorum explicare imperatores, quo facilius, collatis utrorumque factis, qui viri praeferendi sint, possit iudicari.“ Operis eius genuina inscriptio patet ex ultimis hisce praefationis verbis: „Quare ad propositum veniemus, et in hoc exponemus libro DE VITA EXCELLENTIUM IMPERATORUM.“³⁾ Praeter imperatores, seorsim exarasse librum de regibus, argumento haec erunt, quae Timoleontis vitae subdit: „Hi fere fuerunt Graeciae gentis duces, qui memoria digni videbantur, praeter reges. Namque eos attingere noluimus, quod omnium res gestae separatim sunt relatae. Neque tamen hi admodum sunt multi.“⁴⁾ Externi imperatores, quos habemus, Aemilii esse Probi a multis creduntur⁵⁾. Qui error inde provenit, quod librario id fuerit nomen, qui vitas eas partim sua, partim matris⁶⁾ et avi manu scriptas, Theodosio obtulit. Hoc ita esse, ostendunt versiculi, qui vitis istis prae-

3) Quoniam autem veteres omnes scriptores non *de vita excellentium imperatorum*, sed *de viris illustribus* Cornelii Nepotis libros laudant, non est, cur cum Vossio statuamus, genuinam fuisse inscriptionem *de vita excell. imperr.* — Pertinet hoc solummodo ad partem aliquam maioris de viris illustribus operis, neque tamen haec pars separatim fuit inscripta. cf. Ed. Heid. Vol. I. p. XV.

4) At illud probabilius erit, ipsos de regibus libros in illo de viris illustribus opere ita fuisse contentos, ut praecesserint libros, qui de vitis excell. imp. egerint. V. ed. Heid. l. l.

5) De iis, qui nuperrime hanc quaestionem de vero horum librorum auctore attigerunt, cf. ed. Heid. I. p. IX sqq.

6) Per lectionis varietatem alii *genitoris* pro *genitricis* praebent.

mitti in manuscriptis solent. 7) Ac nec Aemilium, nec Theodosiani aevi quemquam eorum esse librorum auctorem, abunde arguit pura et Romana dictio. Opinetur aliquis, ut Trogus ab Iustino, ita ab Aemilio, qui sub Theodosio vixit, in compendium esse redactum Nepotem. Sed aliud suadet operis concinnitas, et illa praefandi ratio, quae est in Epaminondae vita, ac in Pelopida imprimis, ubi brevitatem iustam pollicetur. Attamen sententia haec, licet erronea, minus periculi habeat, dummodo extra controversiam maneat, Aemilium omnia de purissimis Nepotis fontibus hausisse. Sane Tulliani esse aevi scriptorem, neque alium, quam Nepotem, tum veterum aliquot librorum indicio cognoscitur; tum etiam, quod ad Pomponium Atticum (cuius idem rogatu de vita Catonis librum fecit) vitae istae scribantur: utcumque id in quarto miscellaneorum suorum neget Hieronymus Magius, qui ipsa Nepotis praefatione satis refellitur. Accedit et altera ratio. Nam in his libris ea legere est, quae opus hoc scriptum esse clamant, quo tempore Pompeius et Caesar plus poterant, quam libera in republica expediret. Ea Lambinus loca congescit, ut nihil attineat illa hic reponere. Nec libris istis de viris illustribus solum persecutus est excellentes imperatores, sed etiam commentationibus

7) Sunt vere hi:

*Vade, liber noster, fato meliore memento:
 Quum leget haec dominus, te sciat esse meum.
 Ne metuas fulvo strictos diademate crines,
 Ridentis blandum vel pietate oculos.
 Communis cunctis hominum, sed regna tenere
 Se meminit; vincit hinc magis ille homines.
 Ornentur steriles tectura libelli:
 Theodosio et doctis carmina nuda placent.
 Si rogat auctorem, paulatim detege nostrum
 Tunc domino nomen: me sciat esse Probum.
 Corpore in hoc manus est genitoris avique meaeque,
 Felices, dominum quae meruere, manus!*

claros. Quod argumentum signat B. Hieronymus, praefatione de scriptoribus ecclesiasticis, ubi Nepotem inter eos refert, quorum exemplo acturus sit de iis, qui scribendo claruerunt. Egit autem Nepos, tum de Graecis auctoribus, tum de Latinis. De Graecis, colligo inde, quod in Dionis vita dicat librum se fecisse de *illustribus historicis*, in quo inter alia tractarit de Philisto historico. De Latinis argumento sunt plurima. Nam de *Terentio* egisse, ex Suetonio scimus in *Terentii* vita, Donato perperam tributa. Ad haec primum de vita Ciceronis librum Gellius citat, lib. XV, cap. 28. Eoque ex opere fragmentum Hieronymus affert, epistola ad Pammachium. Immo verisimile est, inde esse tum vitam T. Pomponii Attici, quae exstat, tum vitam Catonis, quam istis claudit verbis: „Huius de vita et moribus plura in eo libro persecuti sumus, quem separatim de eo fecimus rogatu T. Pomponii Attici. Quare studiosos Catonis ad illud volumen delegamus.“ Aperte indicat, eo nunc de Catone brevius se agere, quia separatim de eodem scripserit. Ergo vita illa Catonis, quam paucis perscriptam habemus, maioris pars est voluminis, in quo Romanorum complurium vitae containerentur. Et sane in antiquissimo codice Oberti Gifanii ante Vitam Attici legentur haec verba: „Ex libro Cornelii Nepotis de Latinis historicis.“⁸⁾ Reliquit etiam *Exemplorum* libros, quos citant Gellius, lib. VII, cap. 18, et Charisius, lib. I. Alia quoque eiusdem laudant veteres: sed non item, quae ad historiam pertineant. Nam ex epistola eius ad Ciceronem quaedam Lactantius affert lib. III. Instit. Divin. cap. XV. Quemadmodum et Ciceronis ad Nepotem epistolae meminit Tranquillus in *Julio*, cap. LV; Ammianus Marcellinus, initio lib. XXVI; ac Priscianus, lib. VIII. Immo et secundum Ciceronis epistolarum librum ad Nepotem Macrobius citat, lib. II. *Saturn.*

8) Cf. Bard. in ed. Stav. ad. h. l. p. CV sq.

cap. 1. Quod si quis fragmenta omnia Nepotis desideret, longe iis colligendis priorum vicit industriam Andreas Schottus. Hermolaus Barbarus, castigationibus in Plinio lib. XV, cap. 29, censet, libellum de viris illustribus, qui Plinio tribui solet, Cornelii Nepotis esse, haud Plinii. Atque id veteribus codicibus astrui posse asseverat. Etiam Iani haec Parrhasii sententia fuit. Utrius sit, dubitari, ait Vinetus, nec ea de re statuere quidquam ausus est. Immo aliqui aut Suetonium, aut Tacitum esse auctorem putarunt: ut indicat Gyraldus, dialogismo XXVI. Sed omnino sunt Sexti Aurelii Victoris, ut satis nunc constat ex editione Andreae Schotti. Non dubito interim, quin pleraque ex Nepote Victor desumserit. Nam quod Ludovicus Vives, lib. V de tradendis disciplinis, Nepotem aut de Graecis solum duobus scripsisse, id satis refellitur verbis Nepotis antea adductis. Vir doctissimus, Io. Maria Catanaeus, Commentario in Plinii lib. IV, epist. 28, quae ad Severum scripta est, etiam Daretem Phrygium a Nepote translatum arbitratur. Nempe decepit eum vulgaris ἐπιγραφή. Attamen et hic aqua haeret Vineto, notis in Auson. Idyll. VII. Negat esse, qui certi aliquid de translatione hac ausit affirmare. Atqui omnes, quibus ullum in hisce literis iudicium est, satis vident, nec Daretem illum esse genuinum, nec dictionem eius Augusteam sapere aetatem, sed recentiore multo. Nepotem autem Caes. Augusti obiisse aevo, Plinius testatur lib. IX, cap. 39. Atque hoc fortasse impulit Genebrardum, ut putaret eum nato iam Christo superstitem fuisse: qui et Iacobum Gualterium, quum primum tabulas ederet chronographicas, in eam sententiam pertraxit. Sed Nepotem eo usque aetatem prorogasse, nemo temere dixerit, qui tanti eum in litteris nominis iam Tullii, Attici, Catullii temporibus fuisse cogitarit.

P R A E F A T I O.

ARGUMENTUM.

Auctor scripturae genus, quo est usus, et rerum, quas persecutus est levitatem excusat Graecorum et Romanorum morum diversitate; omnia enim maiorum institutis iudicanda censet.

Non dubito, fore plerosque, Attice, qui hoc genus scripturae leve et non satis dignum summorum virorum personis iudicent, quum relatum legent, quis musicam docuerit Epaminondam; aut in eius virtutibus commemorari, saltasse eum commode, scienterque tibiis cantasse. Sed hi erunt fere, qui, expertes literarum Graecarum, nihil rectum, nisi quod ipsorum moribus conveniat, putabunt. Hi si didicerint, non eadem omnibus esse honesta atque turpia, sed omnia maiorum institutis iudicari, non admirabuntur, nos in Graiorum virtutibus exponendis mores eorum secutos. Neque enim Cimoni fuit turpe, Atheniensium summo viro, sororem germanam habere in matrimonio: quippe quum cives eius eodem uterentur instituto. At id quidem nostris moribus nefas habetur. Laudi in Graecia ducitur adolescentulis, quam plurimos habere amatores. Nulla Lacedaemoni tam est nobilis vidua, quae non ad

scenam ¹⁾ eat, mercede conducta. Magnis in laudibus tota fere fuit Graecia, victorem Olympiae citari; in scenam vero prodire, et populo esse spectaculo, nemini in eisdem gentibus fuit turpitudini. Quae omnia apud nos partim infamia, partim humilia atque ab honestate remota ponuntur. Contra ea pleraque nostris moribus sunt decora, quae apud illos turpia putantur. Quem enim Romanorum pudet, uxorem ducere in convivium? aut cuius non materfamilias primum locum tenet aedium, atque in celebritate versatur? Quod multo fit aliter in Graecia. Nam neque in convivium adhibetur, nisi propinquorum; neque sedet, nisi in interiore parte aedium, quae gynaeconitis appellatur, quo nemo accedit, nisi propinqua cognatione coniunctus. Sed hic plura persequi, tum magnitudo voluminis prohibet, tum festinatio, ut ea explicem, quae exorsus sum. Quare ad propositum veniemus, et in hoc exponemus libro de vita ²⁾ excellentium Imperatorum.

1) Ita omnes codd. Heusingero placuit *ad lenam*, cf. ed. Heid.

2) Ita plurimi et optim. codd. — al. *vitas*, cf. Stav.

I.
M I L T I A D E S .

ARGUMENTUM.

Cap. I. Dux colonorum Miltiades in Chersonesum mittitur. Irridetur a Lemniis. — II. Chersoneso potitur, Lemnum capit et Cyclades. — III. Pontis in Histrio custos a Dario, qui Scythias bellum infert, constituitur. Graecorum a Persarum dominatione liberandorum consilium dat. Ab Histiaeο impeditur. — IV. Dario Graecos bello petente, suis est auctor, obviam hosti eant. — V. Ante auxiliorum adventum Persas apud Marathona vincit (anno 490 a. Chr. n.) — VI. Praemium victoriae. — VII. Re infecta ab oppugnatione Pari insulae discedit. Damnatur ab Atheniensibus et in vinculis moritur. — VIII. Vera damnationis causa.

I. MILTIADES, Cimonis filius, Atheniensis, quum 1 et antiquitate generis, et gloria maiorum, et sua modestia unus omnium maxime floreret, eaque esset aetate, ut iam non solum de eo bene sperare, sed etiam confidere cives possent sui, talem futurum, qualem cognitum iudicarunt: accidit, ut Athenienses Chersonesum colonos vellent mittere. Cuius generis 2 quum magnus numerus esset, et multi eius demigrationis peterent societatem: ex his delecti Delphos deliberatum missi sunt, qui consulerent Apollinem 1),

1) *qui consulerent Apollinem*, absunt haec vocabula a codd. Ernst. Leid. B., alii cf. Brem. —

Corn. Nepos.

quo potissimum duce uterentur. (Namque tum Thra-
ces eas regiones tenebant, cum quibus armis erat
3 dimicandum.) His consulentibus nominatim Pythia
praecepit, ut Miltiadem sibi imperatorem sumerent:
4 id si fecissent, incepta prospera futura. Hoc oraculi
responso Miltiades cum delecta manu classe Chersonesum
profectus quum accessisset Lemnum, et incolas
eius insulae sub potestatem redigere vellet Athenien-
sium, idque Lemnii sua sponte facerent, postulasset:
5 illi irridentes responderunt, tum id se facturos, quum
ille, domo navibus proficiscens vento aquilone, ve-
nisset Lemnum. Hic enim ventus, a septentrionibus
6 oriens, adversum tenet Athenis proficiscentibus. Miltiades,
morandi tempus non habens, cursum direxit,
quo tendebat, pervenitque Chersonesum.

II. Ibi brevi tempore barbarorum copiis disiectis,
tota regione, quam petierat, potitus, loca castellis ido-
nea communivit, multitudinem, quam secum duxerat,
in agris collocavit, crebrisque excursionibus locu-
2 pletavit. Neque minus in ea re prudentia, quam
felicitate, adiutus est. Nam quum virtute militum
hostium devicisset exercitus, summa aequitate res
3 constituit, atque ipse ibidem manere decrevit. Erat
enim inter eos dignitate regia, quamvis carebat no-
mine; neque id magis imperio, quam iustitia, con-
secutus. Neque eo secius Atheniensibus, a quibus
erat profectus, officia praestabat. Quibus rebus fie-
bat, ut non minus eorum voluntate perpetuo impe-
rium obtineret, qui miserant, quam illorum, cum
4 quibus erat profectus. Chersoneso tali modo consti-
tuta, Lemnum revertitur, et ex pacto postulat, ut
sibi urbem tradant. Illi enim dixerant, quum, vento
borea domo profectus, eo pervenisset, sese deditu-
5 ros; se autem domum Chersonesi habere. Cares,
qui tum Lemnum incolebant, etsi praeter opinionem
res ceciderat, tamen, non dicto sed secunda fortuna
adversariorum capti, resistere ausi non sunt, atque

ex insula demigrarunt. Pari felicitate ceteras insulas, quae Cyclades nominantur, sub Atheniensium rededit potestatem.

III. Eisdem temporibus Persarum rex Darius, ex Asia in Europam exercitu traiecit, Scythis bellum inferre decrevit. Pontem fecit in Histrio flumine, qua²⁾ copias traduceret. Eius pontis, dum ipse abesset, custodes reliquit principes, quos secum ex Ionia et Aeolide duxerat; quibus singulis ipsarum urbium perpetua dederat imperia. Sic enim facillime putavit se Graeca lingua loquentes, qui Asiam incolerent, sub sua retenturum potestate, si amicis suis oppida tuenda tradidisset, quibus, se oppresso, nulla spes salutis relinqueretur. In hoc fuit tum numero Miltiades, cui illa custodia crederetur. Hic quum crebri afferrent nuntii, male rem gerere Darium, premique ab Scythis, Miltiades hortatus est pontis custodes, ne a fortuna datam occasionem liberandae Graeciae dimitterent. Nam si cum his copiis, quas secum transportaverat, interisset Darius, non solum Europam fore tutam, sed etiam eos, qui Asiam incolerent Graeci genere, liberos a Persarum futuros dominatione et periculo. Id et facile effici posse. Ponte enim rescisso, regem vel hostium ferro, vel inopia paucis diebus interiturum. Ad hoc consilium quum plerique accederent, Histiaeus Milesius, ne res conficeretur, obstitit, dicens: non idem ipsis, qui summas imperii tenerent, expedire, et multitudini, quod Darii regno ipsorum niteretur dominatio: quo extincto ipsos potestate expulsos civibus suis poenas daturus. Itaque adeo se abhorrere a ceterorum consilio, ut nihil putet ipsis utilius, quam confirmari regnum Persarum. Huius quum sententiam plurimi essent secuti, Miltiades, non dubitans, tam multis consiliis ad regis aures consilia sua perventura, Chersonesum reliquit,

2) codd. Boeckl. Long. al. quo; sed cf. Daehn.

ac rursus Athenas demigravit. Cuius ratio etsi non valuit, tamen magnopere est laudanda, quum amicior omnium libertati, quam suae fuerit dominationi.

IV. Darius autem, quum ex Europa in Asiam redisset, hortantibus amicis, ut Graeciam redigeret in suam potestatem, classem quingentarum navium comparavit, eique Datim praefecit et Artaphernem; hisque ducenta peditum, decem millia equitum dedit: causam interserens, se hostem esse Atheniensibus, quod eorum auxilio Iones Sardis expugnassent, suae
 2 que praesidia interfecissent. Illi praefecti regii, classe ad Euboeam appulsa, celeriter Eretriam ceperunt, omnesque eius gentis cives abreptos in Asiam ad regem miserunt. Inde ad Atticam accesserunt, ac suas copias in campum Marathona deduxerunt. Is
 3 abest ab oppido circiter millia passuum decem. Hoc tumultu Athenienses tam propinquo tamque magno permoti auxilium nusquam, nisi a Lacedaemoniis, petiverunt, Phidippidemque ³⁾ cursorem eius generis, qui hemerodromi vocantur, Lacedaemonem miserunt,
 4 ut nunciaret, quam celeri opus esset auxilio. Domi autem creant decem praetores, qui exercitui praessent, in eis Miltiadem. Inter quos magna fuit contentio, utrum moenibus se defenderent, an obviam
 5 irent hostibus, acieque decernerent. Unus Miltiades maxime nitebatur, ut primo quoque tempore castra fierent. Id si factum esset, et civibus animum accersurum, quum viderent, de eorum virtute non desperari, et hostes eadem re fore tardiores, si animadverterent, auderi ⁴⁾ adversus se tam exiguis copiis dimicare.

V. Hoc in tempore nulla civitas Atheniensibus auxilio fuit praeter Plataeenses ⁵⁾. Ea mille misit

3) ita Günth. e cod. Long. restituit, quem Bard. secutus est et Brem. 4. — vulgo *Philippidemque*; cf. Daehn. —

4) codd. qdd. et vett. edd. *audere*, probat Heus. —

5) ex nonnullis vett. edd. Tzsch. Stav. 2. al. *Plataensium*.

militum. Itaque horum adventu decem millia arma-
 torum completa sunt: quae manus mirabili flagrabat
 pugnandi cupiditate. Quo factum est, ut plus, quam 2
 collegae, Miltiades valuerit. Eius auctoritate impulsī
 Athenienses copias ex urbe eduxerunt, locoque ido-
 neo castra fecerunt. Deinde postero die sub montis 3
 radicibus, acie e regione instructa, nova arte, vi
 summa proelium commiserunt. Namque arbores
 multis locis erant stratae ⁶⁾, hoc consilio, ut et mon-
 tium tegerentur altitudine, et arborum tractu equi-
 tatus hostium impediretur, ne multitudine clauderen-
 tur. Datis, etsi non aequum locum videbat suis, 4
 tamen, fretus numero copiarum suarum, confligere
 cupiebat: eoque magis, quod, priusquam Lacedae-
 monii subsidio venirent, dimicare utile arbitrabatur.
 Itaque in aciem peditum centum, equitum decem mil-
 lia produxit, proeliumque commisit. In quo tanto 5
 plus virtute valuerunt Athenienses, ut decemplicem
 numerum hostium profligarint; adeoque perterrue-
 runt, ut Persae non castra, sed naves petierint. Qua
 pugna nihil adhuc est nobilius. Nulla enim umquam
 tam exigua manus tantas opes prostravit.

VI. Cuius victoriae non alienum videtur quale 1
 praemium Miltiadi sit tributum, docere, quo facilius
 intelligi possit, eandem omnium civitatum esse natu-
 ram. Ut enim populi nostri honores quondam fuerunt 2
 rari et tenues, ob eamque causam gloriosi; nunc au-
 tem effusi atque obsoleti: sic olim apud Athenienses
 fuisse reperimus. Namque huic Miltiadi, qui Athe- 3
 nas totamque Graeciam liberarat, talis honos tributus
 est in porticu, quae Poecile ⁷⁾ vocatur, quum pugna
 depingeretur Marathonica, ut in decem praetorum

6) Plurimi codd. et edd. *rarae*; nostram lect. tuentur codd. Ax. Leid. et omnes fere recentt. cf. Stav.

7) Bremio praeunte recentiores Graecis utuntur literis, *Ποικίλη*, et hoc loco et al. cf. ed. Heid.

numero prima eius imago poneretur, isque hortaretur milites, proeliumque committeret. Idem ille populus, posteaquam maius imperium est nactus, et largitione magistratuum corruptus est, trecentas statuas Demetrio Phalereo decrevit.

VII. Post hoc proelium classem septuaginta navium Athenienses eidem Miltiadi dederunt, ut insulas, quae barbaros adiuverant, bello persequeretur. Quo imperio plerasque ad officium redire coëgit, nonnullas vi expugnavit. Ex his Parum insulam, opibus elatam, quum oratione reconciliare non posset, copias e navibus eduxit, urbem operibus clausit, omnique comineatu privavit; deinde vineis ac testudinibus constitutis, propius muros accessit. Quum iam in eo esset, ut oppido potiretur, procul in continenti lucus, qui ex insula conspiciebatur, nescio quo casu, nocturno tempore incensus est. Cuius flamma ut ab oppidanis et oppugnatoribus est visa, utrisque venit in opinionem, signum a classiariis regis datum. Quo factum est, ut et Parii a deditione detererentur, et Miltiades, timens, ne classis regia adventaret, incensis operibus, quae statuerat, cum totidem navibus, atque erat profectus, Athenas magna cum offensione civium suorum rediret. Accusatus ergo prodicionis, quod, quum Parum expugnare posset, a rege corruptus infectis rebus discessisset⁸⁾. Eo tempore aeger erat vulneribus, quae in oppugnando oppido acceperat. Itaque quoniam ipse pro se dicere non posset, verba fecit frater eius Tisagoras. Causa cognita, capitis absolutus, pecunia multatus est, eaque lis quinquaginta talentis aestimata est, quantus in classem sumtus factus erat. Hanc pecuniam quodolvere in praesentia non poterat, in vincula publica coniectus est, ibique diem obiit supremum.

8) vulgo a pugna discessisset; desunt haec voces in codd., quam ob rem Brem. Günth. Dehn. al. omiserunt. —

VIII. Hic etsi crimine Pario est accusatus, tamen 1
 alia fuit causa damnationis. Namque Athenienses
 propter Pisistrati tyrannidem, quae paucis annis ante
 fuerat, omnium suorum civium potentiam extimesce-
 bant. Miltiades, multum in imperiis magistratibus 2
 que versatus, non videbatur posse esse privatus, prae-
 sertim quum consuetudine ad imperii cupiditatem
 trahi videretur. Nam Chersonesi omnes illos, quos 3
 habitarat, annos perpetuam obtinuerat dominationem,
 tyrannusque fuerat appellatus, sed iustus. Non erat
 enim vi consecutus, sed suorum voluntate, eamque
 potestatem bonitate retinebat 9). Omnes autem et ha-
 bentur et dicuntur tyranni, qui potestate sunt per-
 petua in ea civitate, quae libertate usa est. Sed in 4
 Miltiade erat quum summa humanitas, tum mira com-
 munitas 1), ut nemo tam humilis esset, cui non ad eum
 aditus pateret; magna auctoritas apud omnes civita-
 tes, nobile nomen, laus rei militaris maxima. Haec
 populus respiciens maluit eum innoxium plecti, quam
 se diutius esse in timore,

II.

THEMISTOCLES.

ARGUMENTUM.

Cap. I. Themistocles adolescens liberius vixit. Exheredatus a patre reipublicae se dedit. — II. Pecunia publica, quae ex metallis redibat, classem aedificandam curat. Clarus bello Corcyraeo et Persico secundo. Interpretatur oraculum de muris ligneis. — III. Proelium ad Artemisium (pridie nonas quinc-

9) Brem. al. *retinuerat*. — Nostram lect. tuentur codd. Ax. Voss. A. B. Leid. B. Baecl. — 1) al. *comitas*, quod probat Günth. —

tiles anni 480 a. Chr. n.) — IV. Persarum classis vincitur apud Salamina (die 9. Calendas Octobres an. 480 a. Chr. n.) — V. Xerxi persuadet, ut in Persiam refugiat. — VI. Piraei portum et muros Athenarum exstruit. Lacedaemonii repugnant. — VII. Lacedaemonios arte deludit eosque reprehendit. — III. Ostracismo in exilium eiectus varia fuga agitur. — IX. Ad Artaxerxem literas dat salutis causa. — X. Multis muneribus ab eo ornatur. Moritur Magnesia (471. vel 465 a. Chr. n.).

- I. THEMISTOCLES, Neocli filius, Atheniensis. Huius vitia ineuntis adolescentiae magnis sunt emendata virtutibus, adeo ut anteferatur huic nemo, pauci
 2 pares putentur. Sed ab initio est ordiendum. Pater eius Neocles generosus fuit. Is uxorem Acharnanam ²⁾ civem duxit, ex qua natus est Themistocles. Qui quum minus esset probatus parentibus, quod et liberius vivebat, et rem familiarem negligebat, a patre
 3 exheredatus est. Quae contumelia non fregit eum, sed erexit. Nam quum iudicasset, sine summa industria non posse eam extinguere, totum se dedidit reipublicae, diligentius amicis famaeque serviens. Multum in iudiciis privatis versabatur; saepe in concionem populi prodibat; nulla res maior sine eo gerebatur, celeriterque, quae opus erant, reperiebat.
 4 Neque minus in rebus gerendis promptus, quam excogitandis, erat, quod et de instantibus (ut ait Thucydides) verissime iudicabat, et de futuris callidissime coniiciebat. Quo factum est, ut brevi tempore illustraretur.

- II. Primus autem gradus fuit capessendae reipublicae bello Corcyraeo: ad quod gerendum praetor a populo factus non solum praesenti bello, sed etiam
 2 reliquo tempore ferociorem reddidit civitatem. Nam

²⁾ ita e codd. Boecl. Ernst. al. ediderunt Bard. Brem. — cod. Long. habet *Acarnanam*, quod Daehn. probat. — ed. Ald. *Halicarnasseam*, quam Lamb. Bos. Stav. Tzsch. Günth. al. secuti sunt. —

quum pecunia publica, quae ex metallis redibat, largitione magistratum quotannis interiret, ille persuasit populo, ut ea pecunia classis centum navium aedificaretur. Qua celeriter effecta, primum Corcyraeos 3 fregit, deinde maritimos praedones consecrando mare tutum reddidit. In quo quum divitiis ornavit, tum etiam peritissimos belli navalis fecit Athenienses. Id 4 quantae saluti fuerit universae Graeciae, bello cognitum est Persico, quum Xerxes 3) et mari et terra bellum universae inferret Europae cum tantis copiis, quantas neque antea, neque postea habuit quisquam. Huius enim classis mille et ducentarum navium longarum fuit, quam duo millia onerariarum sequebantur; terrestres autem exercitus septingentorum millium peditum, equitum quadringentorum millium fuerunt. Cuius de adventu quum fama in Graeciam esset 6 perlata, et maxime Athenienses peti dicerentur propter pugnam Marathoniam; miserunt Delphos consultum, quidnam facerent de rebus suis. Deliberantibus Pythia respondit, ut moenibus ligneis se munirent. Id responsum quo valeret, quum intelligeret nemo, 7 Themistocles persuasit, consilium esse Apollinis, ut in naves se suaeque conferrent: eum enim a deo significari murum ligneum. Tali consilio probato addunt 8 ad superiores totidem naves triremes, suaeque omnia, quae moveri poterant, partim Salamina, partim Troezena asportant; arcem sacerdotibus paucisque maioribus natu ac sacra procuranda tradunt, reliquum oppidum relinquunt.

III. Huius consilium plerisque civitatibus displicebat, et in terra dimicari magis placebat. Itaque missi sunt delecti cum Leonida, Lacedaemoniorum rege, qui Thermopylas occuparent, longiusque barbaros progredi non paterentur. Hi vim hostium non susti-

3) olim vulgo: *Nam quum Xerxes, ... inferret Europae, cum tantis eam copiis invasit, quantas cet., v. Bos. et Slav.*

- 2 nuerunt, eoque loco omnes interierunt. At classis communis Graeciae trecentarum navium, in qua ducentae erant Atheniensium, primum apud Artemisium, inter Euboeam continentemque terram, cum classariis regis confligit. Angustias enim Themistocles quaerebat, ne multitudine circumiretur. Hic etsi pari proelio discesserant, tamen eodem loco non sunt ausi manere: quod erat periculum, ne, si pars navium adversariorum Euboeam superasset, ancipiti premerentur periculo. Quo factum est, ut ab Artemisio discederent, et exadversum Athenas apud Salamina classem suam constituerent.

- IV. At Xerxes, Thermopylis expugnatis, protinus accessit astu, idque nullis defendentibus, interfectis sacerdotibus, quos in arce invenerat, incendio delet. Cuius fama perterriti classarii quum manere non auderent, et plurimi hortarentur, ut domos suas quisque ⁴⁾ discederent, moenibusque se defenderent: Themistocles unus restitit, et universos pares esse posse aiebat, dispersos testabatur perituros; idque Eurybiadi, regi Lacedaemoniorum, qui tum summae imperii praeerat, fore affirmabat. Quem quum minus, quam vellet, moveret, noctu de servis suis, quem habuit fidelissimum, ad regem misit, ut ei nuntiaret suis verbis: adversarios eius in fuga esse: qui si discessissent, maiore cum labore et longinquiore tempore bellum confecturum, quum singulos consecrari cogeretur; quos si statim aggrederetur, brevi universos oppressurum. Hoc eo valebat, ut ingratiis ad depugnandum omnes cogerentur. Hac re audita barbarus, nihil doli subesse credens, postridie alienissimo sibi loco, contra opportunissimo hostibus, adeo angusto mari confligit, ut eius multitudo navium

4) vulgo *quisque* omittitur, quod Bard. e vett. edd. restituit, atque Brem. 4. recepit.

explicari non potuerit. Victus ergo est magis consilio Themistoclis, quam armis Graeciae.

V. Hic etsi male rem gesserat, tamen tantas habebat reliquias copiarum, ut etiam cum his opprimere posset hostes ⁵⁾. Iterum ab eodem gradu depulsus est. Nam Themistocles verens, ne bellare perseveraret, certiores eum fecit, id agi, ut pons, quem ille in Hellesponto fecerat, dissolveretur, ac reditu in Asiam excluderetur; idque ei persuasit. Itaque ² qua sex mensibus iter fecerat, eadem minus diebus triginta in Asiam reversus est, seque a Themistocle non superatum, sed conservatum iudicavit. Sic unius ³ viri prudentia Graecia liberata est, Europaeque succubuit Asia. Haec altera victoria, quae cum Marathonio possit comparari tropaeo. Nam pari modo apud Salamina parvo numero navium maxima post hominum memoriam classis est devicta.

VI. Magnus hoc bello Themistocles fuit, nec ¹ minor in pace. Quum enim Phalerico portu, neque magno neque bono, Athenienses uterentur; huius consilio triplex Piraei portus constitutus est, isque moenibus circumdatus, ut ipsam urbem dignitate aequipararet, utilitate superaret. Idem muros Atheniensium restituit praecipuo periculo suo. Namque Lacedaemonii, causam idoneam nacti propter barbarorum excursiones, qua negarent, oportere extra Peloponnesum ullam urbem muros ⁶⁾ habere, ne essent loca munita, quae hostes possiderent, Athenienses aedificantes prohibere sunt conati. Hoc longe alio ³ spectabat, atque videri volebant. Athenienses enim duabus victoriis, Marathonica et Salaminica, tantam gloriam apud omnes gentes erant consecuti, ut ia-

⁵⁾ vulgo *interim*, cf. Günth.

⁶⁾ *muros* vulgo omittitur. Günth. hanc vocem e cod. Leid. B. restituit, Brem. 4. recepit. Bard. et Dachs. *urbem habere*. al. *urbem haberi*. —

telligerent Lacedaemonii, de principatu sibi cum his
 4 certamen fore. Quare eos quam infirmissimos esse
 volebant. Postquam autem audierunt, muros instrui,
 legatos Athenas miserunt, qui id fieri vetarent. His
 praesentibus desierunt, ac se de ea re legatos ad eos
 5 missuros dixerunt. Hanc legationem suscepit Themis-
 tocles, et solus primo profectus est; reliqui legati
 ut ⁷⁾ tum exirent, quum satis altitudo muri exstructa
 videretur, praecepit: interim omnes, servi atque
 liberi, opus facerent, neque ulli loco parcerent,
 sive sacer, sive profanus, sive privatus esset, sive
 publicus, et undique, quod idoneum ad muniendum
 putarent, congererent. Quo factum est, ut Athe-
 niensium muri ex sacellis sepulcrisque constarent.

VII. Themistocles autem, ut Lacedaemonem venit,
 adire ad magistratus noluit, et dedit operam, ut quam
 longissime tempus duceret, causam interponens, se
 collegas expectare, quum Lacedaemonii quererentur,
 opus nihilominus fieri, eumque in ea re conari
 2 fallere. Interim reliqui legati sunt consecuti. A quibus
 quum audisset, non multum superesse munitionis,
 ad ephoros Lacedaemoniorum accessit, (penes quos
 summum imperium erat), atque apud eos contendit,
 falsa his ⁸⁾ esse delata; quare aequum esse, illos viros
 bonos nobilesque mittere, quibus fides haberetur,
 qui rem explorarent; interea se obsidem retinerent.
 3 Gestus est ei mos, tresque legati, functi summis ho-
 noribus, Athenas missi sunt. Cum his collegas suos
 Themistocles iussit proficisci, eisque praedixit, ut
 ne prius Lacedaemoniorum legatos dimitterent, quam
 4 ipse esset remissus. Hos postquam Athenas perve-
 nisse ratus est, ad magistratum senatumque Lacedae-
 moniorum adiit, et apud eos liberrime professus est:
 Athenienses suo consilio, quod communi iure gen-

⁷⁾ ut omittitur in codd. Dan. et duob. Voss. —

⁸⁾ his deest in cod. Ax. cf. ed. Heid.

tium facere possent, deos publicos, suosque patrios ac penates, quo facilius ab hoste possent defendere, muris sepsisse; neque in eo, quod inutile esset Graeciae, fecisse. Nam illorum urbem ut propugnaculum oppositum⁹⁾ esse barbaris, apud quam iam his classes regias fecisse naufragium. Lacedaemonios autem male et iniuste facere, qui id potius intuerentur, quod ipsorum dominationi, quam quod universae Graeciae utile esset. Quare, si suos legatos recipere vellent, quos Athenas miserant, se remitterent, aliter illos numquam in patriam recepturi¹⁾.

VIII. Tamen non effugit civium suorum invidiam. Namque ob eundem timorem, quo damnatus erat Miltiades, testarum suffragiis e civitate electus, Argos habitatum concessit. Hic quum propter multas eius²⁾ virtutes magna cum dignitate viveret, Lacedaemonii legatos Athenas miserunt, qui eum absentem accusarent, quod societatem cum rege Persarum ad Graeciam opprimendam fecisset. Hoc crimine absens proditoris est damnatus. Id ut audit, quod non satis tutum se Argis videbat, Corcyram demigravit. Ibi quum eius principes civitatis animadvertisset timere, ne propter se bellum his Lacedaemonii et Athenienses indicerent; ad Admetum, Molossorum regem, cum quo ei hospitium fuerat³⁾, confugit. Huc quum venisset, et in praesentia rex abesset, quo maiore religione se receptum tueretur, filiam eius parvulam arripuit, et cum ea se in sacrarium, quod summa colebatur caerimonia, coniecit. Inde non prius egressus est, quam rex eum data dextra in fidem reciperet, quam praestitit. Nam quum ab Atheniensibus

9) codd. Voss. B. Ax. ed. Long. al. *oppositam*. Sed cf. Brem. et Daehn. — 1) codd. *essent recepturi*, cf. Brem.

2) Brem. in edd. prioribus *iecerat eius*; in ed. 4. *recepit*, v. ed. Heid. — 3) Bard. e codd. Guelph. Dan. *dedit erat*; at cf. Daehn. —

et Lacedaemoniis exposceretur publice, supplicem non prodidit, monuitque, ut consuleret sibi: difficile enim esse, in tam propinquo loco tuto eum versari. Itaque Pydnam eum deduci iussit, et, quod satis esset
 6 praesidii, dedit. Hic in navem omnibus ignotus ⁴⁾ nautis ascendit. Quae quum tempestate maxima Naxum ferretur, ubi tum Atheniensium erat exercitus; sensit Themistocles, si eo pervenisset, sibi esse pereundum. Hac necessitate coactus domino navis, qui sit,
 7 aperit, multa pollicens, si se conservasset. At ille, clarissimi viri captus misericordia, diem noctemque procul ab insula in salo navem tenuit in ancoris, neque quemquam ex ea exire passus est. Inde Ephesum pervenit, ibique Themistoclem exponit: cui ille pro meritis gratiam postea retulit.

IX. Scio, plerosque ita scripsisse, Themistoclem, Xerxe regnante, in Asiam transisse. Sed ego potissimum Thucydidi credo, quod aetate proximus erat, qui illorum temporum historiam reliquerunt, et eiusdem civitatis fuit. Is autem ait, ad Artaxerxem eum
 2 venisse, atque his verbis epistolam misisse: Themistocles veni ad te, qui plurima mala omnium Graiorum in domum tuam intuli, quum mihi necesse fuit, adversus patrem tuum bellare, patriamque meam de
 3 fendere. Idem multo plura bona feci ⁵⁾, postquam in tuto ipse, et ille in periculo esse coepit. Nam quum in Asiam reverti vellet, proelio apud Salamina facto, literis eum certiore feci, id agi, ut pons, quem in Hellesponto fecerat, dissolveretur, atque ab hostibus circumiretur: quo nuntio ille periculo est libe-
 4 ratus. Nunc autem confugi ad te, exagitatus a cuncta Graecia, tuam petens amicitiam: quam si ero adestus, non minus me bonum amicum habebis, quam

4) Ax. omnibus ignotis nautis ascendit. De voce ignotis cf. Agesil. VIII, 1; de verbo ascendit vid. Stav.

5) Daehn. bona rursus feci, vid. Dhm.

fortem inimicum ille expertus est. Ea autem rogo, tu de his rebus, quas ⁶⁾ tecum colloqui volo, annum mihi temporis ⁷⁾ des, eoque transacto ad te ⁸⁾ venire patiaris.

X. Huius rex animi magnitudinem admirans, ¹ cupiensque talem virum sibi conciliari, veniam dedit. Ille omne illud tempus literis sermonique Persarum dedit: quibus adeo eruditus est, ut multo commodius dicatur apud regem verba fecisse, quam hi poterant, qui in Perside erant nati. Hic quum multa ² regi esset pollicitus, gratissimumque illud, si suis uti consiliis vellet, illum Graeciam bello oppressurum; magnis muneribus ab Artaxerxe donatus in Asiam rediit, domiciliumque Magnesia^e sibi constituit. Nam- ³ que hanc urbem ei rex donarat, his quidem verbis, quae ei panem praeberet (ex qua regione quinquaginta talenta quotannis redibant); Lampsacum autem, unde vinum sumeret; Myuntem, ex qua opsonium haberet. Huius ad nostram memoriam monumenta manserunt duo: sepulcrum prope oppidum, in quo est sepultus; statu^ae in foro Magnesia^e. De cuius ⁴ morte multimodis apud plerosque scriptum est; sed nos eundem potissimum Thucydidem auctorem probamus, qui illum ait Magnesia^e morbo mortuum, neque negat, fuisse famam, venenum sua sponte sumsisse, quum se, quae regi de Graecia opprimenda pollicitus esset, praestare posse desperaret. Idem, ⁵ ossa eius clam in Attica ab amicis sepulta, quoniam legibus non concederetur, quod proditi^onis esset damnatus, memoriae prodidit.

6) Lamb. *de quibus*, v. Brem. — 7) codd. Guelph. Dan. Leid. *annuum mihi tempus* cf. Bard. — 8) vulgo *me ad te venire*, cf. Dhn.

III.

ARISTIDES.

ARGUMENTUM.

Cap. I. Aristides, cognomine Iustus appellatus, a Themistocle collabefactus exilio multatur (486 a. Chr. n.) — II. Interest pugnae apud Salamina. Praetor apud Plataeas (489 a. Chr. n.) Mardonium vincit. Atheniensibus iustitia sua omnium civitatum imperium conciliat. — III. Praest aerario, pauper moritur (471. a. Chr. n.)

- I. Aristides, Lysimachi filius, Atheniensis, aequalis fere fuit Themistocli. Itaque cum eo de principatu contendit: namque obtreclarunt inter se. In his autem cognitum est, quanto antestaret eloquentia innocentiae. Quamquam enim adeo excelebat Aristides abstinencia, ut unus post hominum memoriam, quod quidem nos audierimus, cognomine Iustus sit appellatus; tamen, a Themistocle collabefactus, testula illa exsilio decem annorum multatus est. Qui quidem quum intelligeret, reprimi concitatam multitudinem non posse, cedensque animadvertisset quemdam scribentem, ut patria pelleretur, quaesisse ab eo dicitur, quare id faceret, aut quid Aristides commisisset, cur tanta poena dignus duceretur? Cui ille respondit, se ignorare Aristidem; sed sibi non placere, quod tam cupide elaborasset, ut praeter ceteros Iustus appellaretur. Hic decem annorum legitimam poenam non pertulit. Nam postquam Xerxes in Graeciam descendit, sexto fere anno, quam erat expulsus, populiscito in patriam restitutus est.

II. Interfuit autem pugnae navali apud Salamina, quae facta est prius, quam poena liberaretur. Idem praetor fuit Atheniensium apud Plataeas in proelio, quo Mardonius fusus, barbarorumque exercitus inter-

fectus est. Neque aliud est ullum huius in re militari illustre [factum] ⁹⁾, quam huius imperii memoria; iustitiae vero, et aequitatis, et innocentiae multa: in primis, quod eius aequitate factum est, quum in communi classe esset Graeciae simul cum Pausania, quo duce Mardonius erat fugatus, ut summa imperii maritimi ab Lacedaemoniis transferretur ad Athenienses. Namque ante id tempus et mari et terra ³ duces erant Lacedaemonii. Tum autem et intemperantia Pausaniae, et iustitia factum est Aristidis, ut omnes fere civitates Graeciae ad Atheniensium societatem se applicarent, et adversus barbaros hos duces deligerent sibi.

III. Quos quo ¹⁾ facilius repellerent, si forte bellum renovare conarentur, ad classes ²⁾ aedificandas exercitusque comparandos quantum pecuniae quaeque civitas daret, Aristides delectus est, qui constitueret, eiusque arbitrio quadringena et sexagena talenta quotannis Delum sunt collata. Id enim commune aerarium esse voluerunt. Quae omnis pecunia postero tempore Athenas translata est. Hic qua fuerit abstinentia, nullum est certius indicium, quam quod, quum tantis rebus praefuisset, in tanta paupertate decessit, ut, qui efferretur, vix reliquerit. Quo factum est, ut filiae eius publice alerentur, et de communi aerario dotibus datis collocarentur. Decessit autem fere post annum quartum, quam Themistocles Athenis erat expulsus.

9) *factum* uncis inclusi, cf. ed. Heid.

1) alii omisso pronomine *quos*, quae sequuntur: *quo facilius rep.... conarentur*, praecedenti capiti adiungunt; vid. Dahn. — 2) Ax. Guelph. *classis*.

IV.

PAUSANIAS.

ARGUMENTUM.

Cap. I. Pausanias victoria Plataeensi (die 7. Cal. Octobr. ann. 479 a. Chr. n.) elatus maiora concupiscere coepit. — II. Byzantium expugnat, cum Xerxe agit de Graecia in Persarum potestatem redigenda. — III. Medicis moribus, superbia, crudelitate se ipse prodit, scytala domum revocatur, Helotas sollicitat. — IV. Literarum cum hostibus commercium per Argilium indicatur. — V. In Minervae templum confugit, portis obstructis ibi moritur (469 a. Chr. n.)

I. PAUSANIAS, Lacedaemonius, magnus homo, sed varius in omni genere vitae fuit. Nam ut virtutibus
 2 eluxit, sic vitiis est obrutus. Huius illustrissimum est proelium apud Plataeas. Namque illo duce Mar-
 donius, satrapes regius, natione Medus, regis gener, in primis omnium Persarum et manu fortis et con-
 siliis plenus, cum ducentis millibus peditum, quos viritim legerat, et viginti millibus equitum, haud ita
 3 magna manu Graecia³⁾ fugatus est, coque ipse dux cecidit proelio. Qua victoria elatus plurima miscere
 coepit, et maiora concupiscere. Sed primum in eo est reprehensus, quod ex praeda tripodem aureum
 Delphis posuisset, epigrammate scripto, in quo erat haec sententia: suo ductu barbaros apud Plataeas
 4 dedisse. Hos versus Lacedaemonii exsculpserunt, neque aliud scripserunt, quam nomina earum civi-
 tatum, quarum auxilio Persae erant victi.

II. Post id proelium eundem Pausaniam cum classe communi Cyprum atque Hellespontum miserunt,

3) all. *Graeciae*, cf. Günth.

ut ex his regionibus barbarorum praesidia depelleret. Pari felicitate in ea re usus elatius se gerere coepit, maioresque appetere res. Nam quum, Byzantio expugnato, cepisset complures Persarum nobiles, atque in his nonnullos regis propinquos, hos clam Xerxi remisit, simulans, ex vinculis publicis effugisse; et cum his Gongylum Eretriensem, qui literas regi redderet, in quibus haec fuisse scripta Thucydides memoriae prodidit: Pausanias, dux Spartaë, quos Byzantii ceperat, postquam propinquos tuos cognovit, tibi muneri misit, seque tecum affinitate coniungi cupit: quare, si tibi videtur, des ei filiam tuam nuptum. Id si feceris, et Spartam et ceteram Graeciam sub tuam potestatem, se adiuvante, te redacturum ⁴⁾ pollicetur. His de rebus si quid geri volueris, certum hominem ad eum mittas face, cum quo colloquatur. Rex, tot hominum salute, tam sibi necessariorum, magnopere gavisus, confestim cum epistola Artabazum ad Pausaniam mittit, in qua eum collaudat, ac petit, ne cui rei parcat ad ea perficienda, quae pollicetur ⁵⁾. Si fecerit, nullius rei a se repulsam laturum. Huius Pausanias voluntate cognita, alacrior ad rem gerendam factus, in suspicionem cecidit Lacedaemoniorum. In quo facto domum revocatus, accusatus capitis; absolvitur; multatur tamen pecunia: quam ob causam ad classem remissus non est.

III. At ille post non multo sua sponte ad exercitum rediit, et ibi non callida, sed dementi ratione cogitata patefecit. Non enim mores patrios solum, sed etiam cultum vestitumque mutavit. Apparatu regio utebatur, veste Medica; satellites Medi et Aegyptii sequebantur; epulabatur more Persarum luxuriosius, quam, qui aderant, perpeti possent; aditum

⁴⁾ alii: *se, adiuvante te, redacturum*, cf. ed. Heid. — plurimi codd. omittunt *te*. — ⁵⁾ ed. Ultr. *quae polliceretur*. Riekl. Tzsch. Günth. *polliceatur* contra codd. fidem.

petentibus conveniendi non dabat; superbe respondebat, [et] ⁶⁾ crudeliter imperabat. Spartam redire nolebat. Colonas, qui locus in agro Troadis ⁷⁾ est, se contulerat: ibi consilia quum patriae, tum sibi inimica capiebat. Id postquam Lacedaemonii rescierunt, legatos ad eum cum scytala miserunt, in qua more illorum erat scriptum: nisi domum reverteretur, se ⁵⁾ capitis eum damnaturos. Hoc nuntio commotus, sperans, se etiam tum pecunia et potentia instans periculum posse depellere, domum rediit. Huc ut venit, ab ephoris in vincula publica coniectus est. Licet enim legibus eorum cuius ephoro hoc facere regi. Hinc tamen se expedivit; neque eo magis carebat suspitione. Nam opinio manebat, eum cum rege habere societatem. Est genus quoddam hominum, quod Ilotae ⁸⁾ vocatur, quorum magna multitudo agros Lacedaemoniorum colit, servorumque munere fungitur. Hos quoque sollicitate spe libertatis existimatur ⁷⁾ Sed quod harum rerum nullum erat apertum crimen, quo argui posset, non putabant, de tali tamque claro viro suspitionibus oportere iudicari, sed expectandum ⁹⁾; dum se ipsa res aperiret.

IV. Interim Argilius quidam, adolescentulus, quem puerum Pausanias amore Venereo dilexerat, quum epistolam ab eo ad Artabazum accepisset, eique in suspicionem venisset, aliquid in ea de se esse scriptum, quod nemo eorum rediisset, quistper tali causa eodem missi erant; vincula epistolae laxavit, signoque detracto cognovit, si pertulisset, sibi esse periculis eundum. Erant in eadem epistola, quae ad ea pertinebant, quae inter regem Pausaniamque convenerant.

6) et deest in codd. Guelph. Ax. al. — 7) Daehn. cum Brem. et Günth. dedit *Troade*. — 8) hanc scripturam codd. tuerunt; Lamb. al. *Helotes*. Ultr. *Helotae*. — 9) Brem. Bard. e. codd. Ax. Guelph. al. dederunt et *expectandum*. At vid. Günth. ad h. l. atque ed. Heid. ad Datam. VI, 4.

Has ille literas ephoris tradidit. Non est praeter- 3
eunda gravitas Lacedaemoniorum hoc loco. Nam
ne huius quidem indicio impulsus sunt, ut Pausaniam
comprehenderent; neque prius vim adhibendam pu-
taverunt, quam se ipse indicasset. Itaque huic indici, 4
quid fieri vellent, praeceperunt. Fanum Neptuni est
Taenari, quod violari nefas putant Graeci. Eo ille
index confugit; in ara consedit. Hanc iuxta locum
fecerunt sub terra, ex quo posset audiri, si quis
quid loqueretur cum Argilio. Huc ex ephoris qui-
dam descenderunt. Pausanias, ut audivit, Argilium 5
confugisse in aram, perturbatus venit eo. Quem
quum supplicem Dei videret in ara sedentem, quae-
rit, causae quid sit tam repentino consilio ¹⁾. Huic
ille, quid ex literis comperisset, aperit. Modo magis 6
Pausanias perturbatus orare coepit, ne enuntiaret,
nec se, meritum de illo optime, proderet. Quod si
eam veniam sibi dedisset, tantisque implicatum rebus
sublevasset, magno ei praemio futurum.

V. His rebus ephori cognitis satius putaverunt, 1
in urbe eum comprehendi. Quo quum essent pro-
fecti, et Pausanias, placato Argilio, ut putabat, La-
cedaemonem reverteretur; in itinere, quum iam in
eo esset, ut comprehenderetur, ex vultu cuiusdam
ephorum, qui eum admonere cupiebat, insidias sibi fieri
intellexit. Itaque paucis ante gradibus, quam qui se- 2
quebantur, in aedem Minervae, quae Χαλκιοικος vo-
catur, confugit. Hinc ne exire posset, statim ephori
valvas eius aedis obstruxerunt, tectumque sunt de-
moliti, quo facilius sub divo interiret. Dicitur, eo 3
tempore matrem Pausaniae vixisse, eamque iam magno
natu, postquam de scelere filii comperit, in primis
ad filium claudendum lapidem ad introitum aedis at-
tulisse. Sic Pausanias magnam belli gloriam turpi 4
morte maculavit. Hic quum semianimis de templo

1) al. *repentini consilii*, vid. Stav. et Dachn.

5 elatus esset, confestim animam efflavit. Cuius mortui corpus quum eodem nonnulli dicerent inferri oportere, quo hi, qui ad supplicium essent dati; displicuit pluribus, et procul ²⁾ ab eo loco infoderunt, quo erat mortuus. Inde posterius [dei] ³⁾ Delphici responso erutus, atque eodem loco sepultus, ubi vitam posuerat,

V.

CIMON.

ARGUMENTUM.

Cap. I. Heres paternorum vinculorum Cimon a sorore liberatur (489 a. Chr. n.) — II. Eius virtutes et res gestae: Persas eodem die navali et terrestri proelio vincit (469 a. Chr. n.) — III. Ostracismo in exilium mittitur. Revocatus pacem cum Lacedaemoniis conciliat. Persis in Cypro victis (449 a. Chr. n.) Citii moritur. — IV. Laudatur eius liberalitas.

I. CIMON, Miltiadis filius, Atheniensis, duro admodum initio usus est adolescentiae. Nam quum pater eius litem aestimatam populo solvere non potuisset, ob eamque causam in vinculis publicis decessisset; Cimon eadem custodia tenebatur, neque legibus Atheniensium emitti poterat, nisi pecuniam, qua pater multatus erat, solvisset. Habebat autem in matrimonio sororem germanam suam, nomine Elpinicen, non magis amore, quam more ductus. Nam Atheniensibus licet eodem patre natas uxores ducere. Huius coniugii cupidus Callias quidam, non tam generosus, quam pecuniosus, qui magnas pecunias ex metallis

2) al. coni. *haud procul*; sed cf. Dhn. et Bard. — 3) *dei* abest a codd. v. Dhn.

fecerat, egit cum Cimone, ut eam sibi uxorem daret: id si impetrasset, se pro illo pecuniam soluturum. Is quum talem conditionem aspernaretur, Elpinice 4 negavit, se passuram, Miltiadis progeniem in vinculis publicis interire, quoniam prohibere posset, seque Calliae nupturam, si ea, quae polliceretur, praestitisset.

II. Tali modo custodia liberatus Cimon celeriter 1 ad principatum pervenit. Habebat enim satis eloquentiae, summam liberalitatem, magnam prudentiam quum iuris civilis, tum rei militaris, quod cum patre a puero in exercitiis fuerat versatus. Itaque hic et populum urbanum in sua tenuit potestate, et apud exercitum plurimum valuit auctoritate. Primum im- 2 perator apud flumen Strymona magnas copias Thracum fugavit, oppidum Amphipolim constituit, eoque decem millia Atheniensium in coloniam misit. Idem iterum apud Mycalen Cypriorum et Phoenicum ducentarum navium classem devictam cepit: eodemque 3 die pari fortuna in terra usus est. Namque hostium navibus captis, statim ex classe copias suas eduxit, barbarorum uno concursu maximam vim prostravit. Qua victoria magna praeda potitus quum domum 4 reverteretur, quod iam nonnullae insulae propter acerbitem imperii defecerant, bene animatas confirmavit, alienatas ad officium redire coëgit. Scyrum, 5 quam eo tempore Dolopes incolebant, quod contumaciis se gesserant, vacuefecit, sessores veteres urbe insulaque eiecit, agros civibus divisit. Thasios opulentia fretos suo adventu fregit. His ex manubiis Athenarum arx, qua ad meridiem vergit, est ornata.

III. Quibus rebus quum unus in civitate maxime 1 floreret, incidit in eandem invidiam, quam pater suus ceterique Atheniensium principes. Nam testarum suffragiis, quod illi ostracismum vocant, decem annorum exsilio multatus est. Cuius facti celerius Athenienses, 2 quam ipsum, poenituit. Nam quum ille animo forti

invidiae ingratorum civium cessisset, bellumque Lacedaemonii Atheniensibus indixissent; confestim notae
 3 eius virtutis desiderium consecutum est. Itaque post annum quintum, quam expulsus erat, in patriam revocatus est. Ille, quod hospitio Lacedaemoniorum utebatur, satius existimans verbis ⁴⁾ contendere, Lacedaemonem sua sponte est profectus, pacemque inter
 4 duas potentissimas civitates conciliavit. Post, neque ita multo, Cyprum cum ducentis navibus imperator missus, quum eius maiorem partem insulae devicisset, in morbum implicitus, in oppido Citio est mortuus.

IV. Hunc Athenienses non solum in bello, sed in pace diu desideraverunt. Fuit enim tanta liberalitate, quum compluribus locis praedia hortosque haberet, ut numquam in eis custodem imposuerit fructus servandi gratia, ne quis impediretur, quo minus eius
 2 rebus, quibus quisque vellet, frueretur. Semper eum pedisequi cum nummis sunt secuti, ut, si quis opis eius indigeret, haberet, quod statim daret, ne differendo videretur negare. Saepe, quum aliquem offensum fortuna videret minus bene vestitum, suum
 3 amiculum dedit. Quotidie sic coena ei coquebatur, ut, quos invocatos vidisset in foro, omnes devocaret: quod facere nullum diem praetermittebat. Nulli fides eius, nulli opera, nulli res familiaris defuit; multos locupletavit; complures pauperes mortuos, qui, unde efferrentur, non reliquissent, suo sumtu
 4 extulit. Sic se gerendo minime est mirandum, si et vita eius fuit securo, et mors acerba.

4) *verbis* e cod. Ox. recepti, cf. ed. Heid. — vulgo: *satius existimans, contendere Lacedaemonem, sua cet. vel: satius existimans contendere, Lacedaemonem cet.*

VI.

L Y S A N D E R.

ARGUMENTUM.

Cap. I. Lysander Athenienses apud Aegos flumen vincit (mense Decembri ann. 405 a. Chr. n.); decemviros Graeciae civitatibus imponit. — II. Crudelis in Thasios. — III. Reges Lacedaemoniorum tollere et oracula corrumpere conatur; accusatus absolvitur; apud Haliartum cecidit (394 a. Chr. n.) — IV. Pharnabazi fraude Lysander se ipse accusat.

I. LYSANDER, Lacedaemonius, magnam reliquit sui 1
famam, magis felicitate quam virtute partam. Athe-
nienses enim in Peloponnesios sexto et vicesimo anno
bellum gerentes confecisse apparet. Nec⁵⁾ qua ratione 2
consecutus sit, latet. Non enim virtute sui exerci-
tus, sed immodestia factum est adversariorum, qui,
quod dicto audientes imperatoribus suis non erant,
dispalati in agris, relictis navibus, in hostium vene-
runt potestatem. Quo facto Athenienses se Lacedaemoniis 3
dediderunt. Hac victoria Lysander elatus, 3
quum antea semper factiosus audaxque fuisset, sic
sibi indulgit, ut eius opera in maximum odium Graeciae
Lacedaemonii pervenerint. Nam quum hanc 4
causam Lacedaemonii dictitassent sibi esse belli, ut
Atheniensium impotentem dominationem refringerent,
postquam apud Aegos flumen Lysander classis hostium
est potitus, nihil aliud molitus est, quam ut omnes
civitates in sua teneret potestate, quum id se
Lacedaemoniorum causa facere simularet. Namque 5
undique, qui Atheniensium rebus studuissent, eiectis,
decem delegerat in unaquaque civitate, quibus sum-
mum imperium potestatemque omnium rerum com-

5) vulgo *id qua*; at cf. ed. Heid.

mitteret. Horum in numerum nemo admittebatur, nisi qui aut eius hospitio contineretur, aut se illius fore proprium fide confirmarat.

- II. Ita decemvirali potestate in omnibus urbibus constituta, ipsius nutu omnia gerebantur. Cuius crudelitate ac perfidia satis est unam rem, exempli gratia, proferre, ne de eodem plura enumerando
 2 defatigemus lectores. Victor ex Asia quum revertetur, Thasumque devertisset, quod ea civitas praecipua fide fuerat erga Athenienses, proinde ac si iidem firmissimi solerent esse amici, qui constantes fuissent inimici, eam pervertere concupivit. Vidit autem,
 3 nisi in eo occultasset voluntatem, futurum, ut Thasii dilaberentur, consulerentque rebus suis. † † † 6)

- III. † † † Itaque hi decemviralem suam potestatem ab illo constitutam 7) sustulerunt. Quo dolore incensus iniit consilia, reges Lacedaemoniorum tollere. Sed sentiebat, id se sine ope deorum facere non posse, quod Lacedaemonii omnia ad oracula referre consueverant. Primum Delphos corrumpere est conatus.
 2 Quum id non potuisset, Dodonam adortus est. Hinc quoque repulsus dixit, se vota suscepisse, quae Iovi Hammoni solveret: existimans, se Afros facilius cor-
 3 rupturum. Hac spe quum profectus esset in Africam, multum eum antistites Iovis fefellerunt. Nam non solum corrumpi non potuerunt, sed etiam legatos Lacedaemonem miserunt, qui Lysandrum accusarent, quod sacerdotes fani corrumpere conatus esset.
 4 Accusatus hoc crimine, iudicumque absolutus sententiis, Orchomeniis missus subsidio, occisus est a
 5 Thebanis apud Haliartum. Quam vere de eo foret indicatum, oratio indicio fuit, quae post mortem in domo eius reperta est, in qua suadet Lacedaemoniis, ut, regia potestate dissoluta, ex omnibus dux deliga-

6) desunt multa, cf. Heus.

7) ita codd. Ax. Guelph. Dan. — alii aliter. Bosio suadente itaque vulgo ante lacunam ponunt.

tur ad bellum gerendum; sed ita scripta, ut deorum videretur congruere sententiae, quam ille se habiturum, pecunia fidens, non dubitabat. Hanc ei scripsisse Cleon Halicarnasseus dicitur.

IV. Atque hoc loco non est praetereundum factum Pharnabazi, satrapis regii. Nam quum Lysander praefectus classis in bello multa crudeliter avaraeque fecisset, deque his rebus suspicaretur ad cives suos esse perlatum, petiit a Pharnabazo, ut ad ephoros sibi testimonium daret, quanta sanctitate bellum gessisset sociosque tractasset deque ea re accurate scriberet: magnam enim eius auctoritatem in ea re futuram. Huic ille liberaliter pollicetur; librum gravem⁸⁾ 2 multis verbis conscripsit, in quo summis eum fert laudibus. Quem quum legisset probassetque, dum signatur, alterum pari magnitudine, tanta similitudine, ut discerni non posset, signatum subiecit, in quo accuratissime eius avaritiam perfidiamque accusaret. Hinc Lysander domum quum redisset, postquam de 4 suis rebus gestis apud maximum magistratum⁹⁾, quae voluerat, dixerat, testimonii loco librum a Pharnabazo datum tradidit. Hunc summo Lysandro, quum ephori cognoscent, ipsi legendum dederunt. Ita ille imprudens ipse suus fuit accusator.

VII.

ALCIBIADES.

ARGUMENTUM.

Cap. I. De Alcibiadis genere et virtutibus. — II. De educatione et moribus. — III. Dux contra Syracusanos delectus (416 a Chr. n.) in suspicionem civium suorum incidit. — IV. Domum

8) al. *librum grandem*, cf. Brem. — 9) Günth. e cod. Leid. A. *maximos magistratus*, non male! cf. Dhñ. ibiq. laud.

revocatus aufugit Lacedaemonem atque arma contra patriam capit (413 a. Chr. n.) — V. Lacedaemoniis suspectus transit ad Persas (412 a. Chr. n.) Atheniensibus reconciliatur (411 a. Chr. n.), Lacedaemonios vincit. — VI. Insigni civium benevolentia in urbe recipitur (408 a. Chr. n.) — VII. Classe Atheniensium devicta a Lacedaemoniis, in invidiam recidit. In Thracia prospere pugnat. — VIII. Atheniensium exercitum apud Aegos flumen consilio adiuvare tentat (405 a. Chr. n.) — IX. Ad Pharnabazum in Asiam transit. — X. A Persis per insidias interficitur (404 a. Chr. n.) — XI. Alcibiades in omni vitae genere excelluit.

- I. ALCIBIADES, Cliniae filius, Atheniensis. In hoc natura, quid efficere possit, videtur experta. Constat enim inter omnes, qui de eo memoriae prodiderunt, nihil illo fuisse excellentius, vel in vitiis, vel in virtutibus. Natus in amplissima civitate, summo genere, omnium aetatis suae multo formosissimus, ad omnes res aptus, consiliique plenus, (namque imperator fuit summus et mari et terra), disertus, ut inprimis dicendo valeret, quod tanta erat commendatio oris atque orationis, ut nemo ei dicendo posset resistere; 3) deinde ¹⁾, quum tempus posceret, laboriosus, patiens, liberalis, splendidus non minus in vita, quam victu; affabilis, blandus, temporibus callidissime inserviens. 4) Idem, simul ac se remiserat, neque causa suberat, quare animi laborem perferret, luxuriosus, dissolutus, libidinosus, intemperans reperiebatur, ut omnes admirarentur, in uno homine tantam esse dissimilitudinem, tamque diversam naturam.

II. Educatus est in domo Pericli ²⁾ (privignus enim eius fuisse dicitur), eruditus a Socrate. Socerum habuit Hipponicum, omnium Graeca lingua loquentium divitissimum ³⁾, ut, si ipse fingere vellet, neque plura

1) plur. codd. et edd. (Günth. Brem.) *dives* pro *deinde*; at v. ed. Heid. — Lamb. dedit *idemque*. Nostram scripturam tumentur codd. Ax. Boeckl. Voss. B. —

2) ita Daehn. e fide codd. Guelph. Leid. A. Dan. — vulgo *Periclis*. — 3) codd. Voss. Guelph. et ed. Ultr. *ditissimum*, cetera autem corrupta, cf. Daehn.

bona reminisci, neque maiora posset consequi, quam vel fortuna vel natura tribuerat. Ineunte adolescentia amatus est a multis more Graecorum; in eis a Socrate, de quo mentionem facit Plato in Symposio. Namque eum induxit commemorantem, se pernoctasse cum Socrate, neque aliter ab eo surrexisse, ac filius a parente debuerit. Posteaquam robustior est factus, non minus multos amavit, in quorum amore, quoad licitum est, odiosa multa delicate iocoseque fecit: quae referremus, nisi maiora potioraque haberemus.

III. Bello Peloponnesio huius consilio atque auctoritate Athenienses bellum Syracusanis indixerunt: ad quod gerendum ipse dux delectus est; duo praeterea collegae dati, Nicias et Lamachus. Id quum appareretur, prius quam classis exiret, accidit, ut una nocte omnes Hermae, qui in oppido erant Athenis, deiicerentur, praeter unum, qui ante ianuam erat Andocidis. (Itaque ille postea Mercurius Andocidis vocitatus est)⁴⁾. Hoc quum appareret non sine magna multorum consensione esse factum; quod non ad privatam, sed ad publicam rem pertineret, magnus multitudini timor est iniectus, ne qua repentina vis in civitate existeret, quae libertatem opprimeret populi. Hoc maxime convenire in Alcibiadem videbatur, quod et potentior et maior, quam privatus, existimabatur. Multos enim liberalitate devinxerat, plures etiam opera forensi suos reddiderat. Quare fiebat, ut omnium oculos, quotiescumque in publicum prodisset, ad se converteret, neque ei par quisquam in civitate poneretur. Itaque non solum spem in eo habebant maximam, sed etiam timorem, quod et obesse plurimum et prodesse poterat. Adspergebatur etiam infamia, quod

4) vera videtur esse lectio: ante ianuam erat Andocidi, Andocidique vocitatus est, quae cod. Ox. adiuvatur. Cf. Daehn. et ed. Heid. —

in domo sua facere mysteria dicebatur (quod nefas erat more Atheniensium): idque non ad religionem, sed ad coniurationem pertinere existimabatur.

- IV. Hoc crimine in concione ab inimicis compellabatur ⁵⁾. Sed instabat tempus ad bellum proficiscendi. Id ille intuens, neque ignorans civium suorum consuetudinem, postulabat, si quid de se agi vellent, potius de praesente quaestio haberetur, quam absens invidiae crimine accusaretur. Inimici vero eius quiescendum in praesenti, quia noceri non posse intelligebant, et illud tempus exspectandum decreverunt, quo exisset, ut sic absentem aggrederentur: itaque fecerunt. Nam postquam in Siciliam eum pervenisse crediderunt, absentem, quod sacra violasset, reum fecerunt. Qua de re quum ei nuntius a magistratu in Siciliam missus esset, ut domum ad causam dicendam rediret, essetque in magna spe provinciae bene administrandae, non parere noluit, et in triremem ⁶⁾, quae ad eum deportandum erat missa, ascendit. Hac Thurios in Italiam pervectus, multa secum reputans de immoderata civium suorum licentia crudelitateque erga nobiles, utilissimum ratus, imponentem evitare tempestatem, clam se a custodibus subduxit, et inde primum Elidem, deinde Thebas venit. Postquam autem se capitis damnatum, bonis publicatis, audivit, et, id quod usu venerat, Eumolpidas sacerdotes a populo coactos, ut se devoverent, eiusque devotionis, quo testatior esset memoria, exemplum, in pila lapidea incisum, esse positum in publico, Lacedaemonem demigravit. Ibi, ut ipse praedicare consueverat, non adversus patriam, sed inimicos suos bellum gessit, quod iidem hostes essent civitati. Nam quum intelligerent, se plurimum

5) Tzsch. dedit: *in contentionem compellebatur*, cf. Daehn. — 6) Bos. *trierem*, v, Stav. et Bard.

prodesse posse ⁷⁾ reipublicae, ex ea eiecisse, plusque irae suae, quam utilitati communi paruisse. Itaque huius consilio Lacedaemonii cum Persarum rege amicitiam fecerunt; deinde Deceleam ⁸⁾ in Attica munierunt, praesidioque ibi perpetuo posito in obsidione Athenas tenuerunt. Eiusdem opera Ioniam a societate averterunt Atheniensium. Quo facto multo superiores bello esse coeperunt.

V. Neque vero his rebus tam amici Alcibiadi sunt facti, quam timore ab eo alienati. Nam quum acerrimi viri praestantem prudentiam in omnibus rebus cognoscerent, pertimuerunt, ne caritate patriae ductus aliquando ab ipsis descisceret, et eum suis in gratiam rediret. Itaque tempus eius interficiendi quaerere instituerunt. Id Alcibiadi diutius celari non potuit: ² erat enim ea sagacitate, ut decipi non posset, praesertim quum animum attendisset ad cavendum. Itaque ad Tissaphernem, praefectum regis Darii, se contulit. Cuius quum in intimam amicitiam pervenisset, et ³ Atheniensium, male gestis in Sicilia rebus, opes senescere, contra Lacedaemoniorum crescere videret; initio cum Pisandro praetore, qui apud Samum exercitum habebat, per internuntios colloquitur, et de reditu suo facit mentionem. Erat enim eodem, quo Alcibiades, sensu, populi potentiae non amicus, et optimatum fautor. Ab hoc destitutus primum per ⁴ Thrasybulum, Lyci filium, ab exercitu recipitur, praetorque fit apud Samum; post, suffragante Theramene, populiscito restituitur, parique absens imperio praeficitur simul cum Thrasybulo et Theramene. Horum ⁵ in imperio tanta commutatio rerum facta est, ut Lacedaemonii, qui paullo ante victores vigerant, perterriti pacem peterent. Victi enim erant quinque proeliis terrestribus, tribus navalibus, in quibus ducentas naves triremes amiserant, quae captae in ho-

⁷⁾ Günth. Wetz. all. omittunt *posse*. — ⁸⁾ al. *Deceliam*, v. Bard.

- 6 stium venerant potestatem. Alcibiades simul cum collegis receperat Ioniam, Hellespontum, multas praeterea urbes Graecas, quae in ora sitae sunt Asiae, quarum expugnarent complures, in his Byzantium; neque minus multas consilio ad amicitiam adiunxerant, 7 quod in captos clementia fuerant usi. Ita praeda onusti, locupletato exercitu, maximis rebus gestis, Athenas venerunt.

- VI. His quum obviam universa civitas in Piraeum descendisset, tanta fuit omnium expectatio visendi Alcibiadis, ut ad eius triremem vulgus conflueret proinde ac si solus advenisset. Sic enim populo erat persuasum, et adversas superiores, et praesentes secundas res accidissee eius opera. Itaque et Siciliae amissum⁹⁾, et Lacedaemoniorum victorias culpaee suae tribuebant, quod talem virum e civitate expulissent. Neque id sine causa arbitrari videbantur. Nam postquam exercitui praeesse coeperat, neque terra, neque 3 mari hostes pares esse potuerant. Hic ut e navi egressus est, quamquam Theramenes et Thrasybulus eisdem rebus praefuerant, simulque venerant in Piraeum; tamen illum unum omnes prosequiebantur, et, id quod numquam antea usu venerat nisi Olympiae victoribus, coronis aureis aeneisque¹⁾ vulgo donabatur. Ille lacrimans talem benevolentiam civium suorum accipiebat, reminiscens pristini temporis acerbissimam. Postquam astu venit, concione advocata sic 4 verba fecit, ut nemo tam ferus fuerit, quin eius casum lacrimaret, inimicumque his se ostenderit, quorum opera patria pulsus fuerat, proinde ac si alius populus, non ille ipse, qui tum flebat, eum sacrilegii 5 damnasset. Restituta ergo huic sunt publice bona; iidemque illi Eumolpidae sacerdotes rursus resacrare sunt coacti, qui eum devoverant; pilaeque illae, in quibus devotio fuerat scripta, in mare praecipitatae.

9) Voss. *A. Siciliae amissum imperium*; al. *Siciliam amissam*. Vid. Brem. — 1) Mureto (V. L. XV, 7) placuit: coronis aureis aeneisque. —

VII. Haec Alcibiadi laetitia non nimis fuit diuturna. 1
 Nam quum ei omnes essent honores decreti, totaque
 respublica domi bellicae tradita, ut unius arbitrio
 gereretur; et ipse postulasset, ut duo sibi collegae
 darentur, Thrasybulus et Adimantus, neque id nega-
 tum esset: classe iam in Asiam profectus, quod apud
 Cymen minus ex sententia rem gesserat, in invidiam
 recidit. Nihil enim eum non efficere posse ducebant. 2
 Ex quo fiebat, ut omnia minus prospere gesta eius
 culpa tribuerent, quum eum aut negligenter, aut
 malitiose fecisse loquerentur: sicut tum accidit. Nam,
 corruptum a rege capere Cymen noluisse, arguebant.
 Itaque huic maxime putamus malo fuisse 2) nimiam 3
 opinionem ingenii atque virtutis. Timebatur enim, non
 minus quam diligebatur, ne secunda fortuna magnis-
 que opibus elatus tyrannidem concupisceret. Quibus
 rebus factum est, ut absenti magistratum abrogarent,
 et alium in eius locum substituerent. Id ille ut au- 4
 divit, domum reverti noluit, et se Pactyen contulit,
 ibique tria castella communivit, Bornos, Bysanthen,
 Neontichos; manuque collecta primus Graeciae civita-
 tis in Thraciam introiit, gloriosius existimans, bar-
 barorum praeda locupletari, quam Graiorum. Qua ex 5
 re creverat quum fama, tum opibus, magnamque ami-
 citiam sibi cum quibusdam regibus Thraciae pepererat.

VIII. Neque tamen a caritate patriae potuit rece- 1
 dere. Nam quum apud Aegos flumen Philocles, prae-
 tor Atheniensium, classem constituisset suam, neque
 longe abesset Lysander, praetor Lacedaemoniorum,
 qui in eo erat occupatus, ut bellum quam diutissime
 duceret, quod ipsis pecunia a rege suppeditabatur,
 contra Atheniensibus exhaustis praeter arma et na-
 ves nihil erat super: Alcibiades ad exercitum venit 2

2) cod. Voss. A. et qdd. edd: *maxime putamus malo causam fuisse*; alii aliter, cf. Daehn.

Atheniensium, ibique praesente vulgo agere coepit, si
 vellent, se coacturum Lysandrum aut dimicare, aut
 pacem petere: Lacedaemonios eo nolle configere
 classe, quod pedestribus copiis plus, quam navibus,
 3 valerent; sibi autem esse facile, Seuthen, regem Thra-
 cum, deducere, ut eos terra depelleret: quo facto
 necessario aut classe conflicturos, aut bellum compo-
 4 situros. Id etsi vere dictum Philocles animadvertibat,
 tamen postulata facere noluit, quod sentiebat, se Al-
 cibiade recepto, nullius momenti apud exercitum fu-
 turum, et, si quid secundi evenisset, nullam in ea re
 suam partem fore; contra ea, si quid adversi acci-
 5 disset, se unum eius delicti futurum reum. Ab hoc
 discedens Alcibiades, quoniam, inquit, victoriae pa-
 triae repugnans, illud moneo, iuxta hostem castra
 habeas nautica; periculum est enim, ne immodestia
 militum nostrorum occasio detur Lysandro nostri
 6 opprimendi exercitus. Neque ea res illum fefellit.
 Nam Lysander, quum per speculatores comperisset,
 vulgum Atheniensium in terram praedatum exisse,
 navesque paene inanes relictas, tempus rei gerendae
 non dimisit, eoque impetu totum bellum delevit.

IX. At Alcibiades, victis Atheniensibus non satis
 tuta eadem loca sibi arbitratus, penitus in Thraciam
 se supra Propontidem abdidit, sperans, ibi facillime
 2 suam fortunam oculi posse. Falso 3). Nam Thraces,
 postquam eum cum magna pecunia venisse senserunt,
 insidias fecerunt 4): qui ea, quae apportarat, abstule-
 3 runt, ipsum capere non potuerunt. Ille cernens,
 nullum locum sibi tutum in Graecia propter poten-
 tiam Lacedaemoniorum, ad Pharnabazum in Asiam
 transiit: quem quidem adeo sua cepit humanitate, ut
 eum nemo in amicitia anteeederet. Namque ei Gru-
 nium dederat in Phrygia castrum, ex quo quinquagena

3) Ax. sed falso. Vid. Daehn. — 4) vulgo ei fecerunt.
 Bard. pronomen uncis inclusit, cf. Daehn.

talenta vectigalis capiebat. Qua fortuna Alcibiades 4
non erat contentus, neque Athenas victas Lacedae-
moniiis servire poterat pati. Itaque ad patriam libe-
randam omni ferebatur cogitatione. Sed videbat, id 5
sine rege Persarum non posse fieri: ideoque eum
amicum sibi cupiebat adiungi; neque dubitabat, facile
se consecuturum, si modo eius conveniendi habuisset
potestatem. Nam Cyrum fratrem ei bellum clam 6
parare, Lacedaemoniis adjuvantibus, sciebat: id si
aperuisset 5), magnam se initurum gratiam videbat.

X. Haec quum moliretur, peteretque a Pharna- 1
bazo, ut ad regem mitteretur, eodem tempore Critias
ceterique tyranni Atheniensium certos homines ad
Lysandrum in Asiam miserunt, qui eum certiorum
facerent, nisi Alcibiadem sustulisset, nihil earum
rerum fore ratum, quas ipse Athenis constituisset.
Quare, si suas res gestas manere vellet, illum perse- 2
queretur. His Laco rebus commotus statuit, accuratius
sibi agendum cum Pharnabazo. Huic ergo renunciat,
quae regi cum Lacedaemoniis essent, irrita futura,
nisi Alcibiadem vivum aut mortuum tradidisset. Non 3
tulit hoc satrapes, et violare clementiam, quam regis
opes minui maluit. Itaque misit Susamithren et Ba-
gaeum ad Alcibiadem interficiendum, quum ille esset
in Phrygia, iterque ad regem compararet. Missi clam 4
vicinitati, in qua tum Alcibiades erat, dant negotium,
ut eum interficiant. Illi quum ferro 6) aggredi non
auderent, noctu ligna contulerunt circa casam eam,
in qua quiescebat, eamque succenderunt: ut incendio
conficerent, quem manu superari posse diffidebant.
Ille autem ut sonitu flammae est excitatus, etsi gla- 5
dius ei erat subductus, familiaris sui subalare telum
eripuit. Namque erat cum eo quidam ex Arcadia ho-
spes, qui numquam discedere voluerat. Hunc sequi

5) vulgo: si ei aperuisset: v. Bard.

6) al. quum eum ferro; deest hoc pronomen in codd.

se iubet, et id, quod in praesentia vestimentorum fuit, arripuit. His in ignem eiectis, flammæ vim transiit.
 6 Quem ut barbari incendium effugisse viderunt, telis
 7 eiminus ⁷⁾ missis interfecerunt, caputque eius ad
 Pharnabazum retulerunt. At mulier, quæ cum eo
 vivere consuerat, muliebri sua veste contactum aedi-
 ficii incendio mortuum cremavit, quod ad vivum in-
 terimendum erat comparatum. Sic Alcibiades, annos
 circiter quadraginta natus, diem obiit supremum.

XI. Hunc infamatum a plerisque tres gravissimi
 historici summis laudibus extulerunt: Thucydides,
 qui eiusdem ætatis fuit; Theopompus, qui fuit post
 aliquanto natus, et Timæus: qui quidem duo maledi-
 centissimi, nescio quo modo, in illo uno laudando
 2 conscrierunt. Namque ea, quæ supra diximus, de
 eo prædixerunt, atque hoc amplius: quam Athenis,
 splendidissima civitate, natus esset, omnes splendore
 3 ac dignitate superasse vitæ. Postquam inde expulsus
 Thebas venerit, adeo studiis eorum inservisse, ut
 nemo eum labore corporisque viribus posset æqui-
 parare (omnes enim Boeotii magis firmitati corporis,
 4 quam ingenii acuminis inserviunt). Eundem apud
 Lacedæmonios, quorum moribus summa virtus in
 patientia ponebatur, sic duritiæ se dedisse, ut par-
 simonia victus atque cultus omnes Lacedæmonios
 vinceret. Fuisse apud Thracas, homines vinolentos
 rebusque veneris deditos: hos quoque in his rebus
 5 antecessisse. Venisse ad Persas, apud quos summa
 laus esset fortiter venari, luxuriose vivere: horum
 sic imitatum consuetudinem, ut illi ipsi eum in his
 maxime admirarentur. Quibus rebus effecisse, ut,
 apud quoscumque esset, princeps poneretur, habe-
 returque carissimus. Sed satis de hoc; reliquos
 ordiamur.

7) olim particula *eminus* omittebatur, quam tuentur codd.
 Guelph. Dan. Leid. A.

VIII. THRASYBULUS.

ARGUMENTUM.

Cap. I. Thrasybulus iam antea optime de patria meritus triginta tyrannos expellere conatur. — II. Ex Phyle castello cum exigua manu progressus Munychiam occupat, tyrannorum copias duobus proeliis fugat (403 a. Chr. n.). — III. Reconciliata pace legem oblivionis tulit. — IV. Quum parvo honore contentus aliquamdiu Athenis vixisset, praetor in Ciliciam missus ibique interfectus est (390 a. Chr. n.).

I. THRASYBULUS, Lyci filius, Atheniensis. Si per
se virtus sine fortuna ponderanda sit, dubito, an hunc
primum omnium ponam. Illud sine dubio: neminem
huic praefero fide, constantia, magnitudine animi, in
patriam amore. Nam quod multi voluerunt, pauci
potuerunt, ab uno tyranno patriam liberare; huic
contigit, ut a triginta oppressam tyrannis ex servi-
tute in libertatem vindicaret. Sed, nescio quo modo,
quum cum nemo anteiret his virtutibus, multi nobili-
tate praecurrerunt. Primum Peloponnesio bello multa
hic sine Alcibiade gessit, ille nullam rem sine hoc:
quae ille universa naturali quodam bono fecit lucri.
Sed illa tamen omnia communia imperatoribus cum
militibus et fortuna, quod in proelii concursu abit res
a consilio ad vires vimque pugnantium. Itaque iure
suo nonnulla ab imperatore miles, plurima vero for-
tuna vindicat, sequae hic plus valuisse, quam ducis
prudentiam, vere potest praedicare. Quare illud
magnificentissimum factum proprium est Thrasybuli.
Nam quum triginta tyranni, praepositi a Lacedaemo-
niis, servitute oppressas tenerent Athenas, plurimos
cives, quibus in bello parserat fortuna, partim patria
expulissent, partim interfecissent, plurimorum bona

publicata inter se divisissent: non solum princeps, sed et solus initio bellum his indixit.

- II. Hic enim quum Phylen confugisset, quod est castellum in Attica munitissimum, non plus habuit secum, quam triginta de suis. Hoc initium fuit salutis Actaeorum⁸⁾; hoc robur libertatis clarissimae civitatis. Neque vero hic non contemptus est primo a tyrannis, atque eius solitudo. Quae quidem res et illis contemnentibus pernicioei, et huic despecto saluti fuit. Haec enim illos ad persequendum segnes, hos autem, tempore ad comparandum dato, fecit robustiores.
- 3 Quo magis praeceptum illud omnium in animis esse debet: Nihil in bello oportere contemni; nec sine
- 4 causa dici: Matrem timidi flere non solere. Neque tamen pro opinione Thrasybuli auctae sunt opes. Nam iam tum illis temporibus fortius boni pro libertate loquebantur, quam pugnabant. Hinc in Piraeum transiit, Munychiamque munivit. Hanc bis tyranni oppugnare sunt adorti; ab eaque turpiter repulsi protinus in urbem, armis impedimentisque amissis, refugerunt.
- 6 Usus est Thrasybulus non minus prudentia, quam fortitudine. Nam cedentes violari vetuit: cives enim civibus parcere aequum censebat. Neque quisquam est vulneratus, nisi qui prior impugnare voluit. Neminem iacentem veste spoliavit; nil attigit, nisi arma, quorum indigebat, et quae ad victum pertinebant.
- 7 In secundo proelio cecidit Critias, dux tyrannorum, quum quidem exadversus Thrasybulum fortissime pugnaret.

III. Hoc deiecto Pausanias venit Atticis auxilio, rex Lacedaemoniorum. Is inter Thrasybulum et eos, qui urbem tenebant, fecit pacem his conditionibus: ne qui praeter triginta tyrannos et decem, qui postea praetores creati superioris more crudelitatis erant

8) ita codd. Guelph. Dan. ed. Bard. al. — vulgo; Atticorum; sed cf. Stav. et Bard.

usi, afficerentur exsilio; neve bona publicarentur; reipublicae procuratio populo redderetur. Praeclarum hoc quoque Thrasybuli, quod, reconciliata pace, quum plurimum in civitate posset, legem tulit: ne quis ante actarum rerum accusaretur, neve multaretur; eamque illi oblivionis ⁹⁾ appellarunt. Neque vero ³ hanc tantum ferendam curavit, sed etiam, ut valeret, effecit. Nam quum quidam ex his, qui simul cum eo in exsilio fuerant, caedem facere eorum vellent, cum quibus in gratiam reditum erat publice, prohibuit, et id, quod pollicitus erat, praestitit.

IV. Huic pro tantis meritis honoris corona a populo ¹ data est, facta duabus virgulis oleaginis, quam quod amor civium, non vis expresserat, nullam habuit invidiam, magnaque fuit gloria. Bene ergo Pittacus ² ille, qui septem sapientum numero est habitus, quum ei Mytilenaei multa millia iugerum agri munera ¹⁾ darent, Nolite, oro vos, inquit, id mihi dare, quod multi invideant, plures etiam concupiscant. Quare ex istis nolo amplius, quam centum iugera, quae et meam animi aequitatem et vestram voluntatem indicent. Nam parva munera diutina, locupletia non propria esse consueverunt. Illa igitur corona contentus Thrasybulus ³ neque amplius requisivit, neque quemquam honore se antecessisse existimavit. Hic sequenti tempore, ⁴ quum praetor classem ad Ciliciam appulisset, neque satis diligenter in castris eius agerentur vigiliae, a barbaris, ex oppido noctu eruptione facta, in tabernaculo interfectus est.

⁹⁾ vulgo *legem oblivionis*. Deest haec vox in codd. Guelph. Ax. Voss. A. al. — Daehn. Brem. al. eiecerunt.

¹⁾ alii: *muneri*. Nostram scripturam tuentur codd. Guelph. Dan. ed. Iens. Ultr. Cf. Bos. et Stav.

IX,
CONON,

ARGUMENTUM,

Cap. I. Peloponnesio bello Conon bene meretur de republica. — II. Atheniensibus devictis cum in Asiam transisset, Persarum regem simulque patriam suam contra Lacedaemonios multum adiuvit. — III. Tissaphernem proditoris accusaturus ad regem Persarum proficiscitur. — IV. Regis copiis praefectus Conon Lacedaemonios apud Cnidum devincit (394 a. Chr. n.); in patriam reversus Athenarum muros reficiendos curat (393 a. Chr. n.). — V. Cum patriae opes nimium augere cōtineretur, a Tiribazo evocatus non rediit.

I. CONON ²⁾, Atheniensis, Peloponnesio bello accessit ad rempublicam, in eoque eius opera magni fuit. Nam et praetor pedestribus exercitibus praefuit, et praefectus classis res magnas mari gessit. Quas ob causas praecipuus ei honos habitus est. Namque omnibus unus insulis praefuit: in qua potestate Pheras cepit, coloniam Lacedaemoniorum. Fuit etiam extremo Peloponnesio bello praetor, quum apud Aegos flumen cōpiae Atheniensium a Lysandro sunt devictae. Sed tum abfuit, eoque peius res administrata est. Nam
 2 et prudens rei militaris, et diligens erat imperii ³⁾. Itaque nemine erat his temporibus dubium, si affuisset, illam Athenienses calamitatem accepturos non fuisse.

II. Rebus autem afflictis, quum patriam obsideri audisset, non quaesivit, ubi ipse tuto viveret, sed unde praesidio posset esse civibus suis. Itaque contulit se ad Pharnabazum, satrapen Ioniae et Lydiae,

2) Günth. edidit *Cono*, *Dio*, cet.; sed cf. ed. Heid. — 3) ita codd. Guelph. Voss. A. B, Leid. B. ed. Ascena. — Bos. al. *imperator*; sed v. Stav.

eumdemque generum regis et propinquum: apud quem ut multum gratia valeret, multo labore multisque effecit periculis. Nam quum Lacedaemonii, Atheniensibus devictis, in societate non manerent, quam cum Artaxerxe fecerant, Agesilaumque bellatum misissent in Asiam, maxime impulsus a Tissapherne, qui ex intimis regis ab amicitia eius defecerat, et cum Lacedaemoniis coierat societatem: hunc adversus Pharnabazus habitus est imperator; re quidem vera exercitui praefuit Conon, eiusque omnia arbitrio gesta sunt. Hic multum ducem summum, Agesilaum, impedivit, saepeque eius consiliis obstitit; neque vero non fuit apertum, si ille non fuisset, Agesilaum Asiam Tauro tenuis regi fuisse erepturum. Qui posteaquam domum a suis civibus revocatus est, quod Boeotii et Athenienses Lacedaemoniis bellum indixerant, Conon nihilo secius apud praefectos regis versabatur, hisque omnibus maximo erat usui.

III. Defecerat a rege Tissaphernes, neque id tam Artaxerxi, quam ceteris, erat apertum. Multis enim magnisque meritis apud regem, etiam quum in officio non maneret, valebat. Neque id mirandum, si non facile ad credendum adducebatur, reminiscens, eius se opera Cyrum fratrem superasse. Huius accusandi gratia Conon a Pharnabazo ad regem missus, posteaquam venit, primum ex more Persarum ad chiliarchum, qui secundum gradum imperii tenebat, Tithrausten accessit, seque ostendit cum rege colloqui velle. Nemo enim sine hoc admittitur. Huic ille, nulla, inquit, mora est; sed tu delibera, utrum colloqui malis, an per literas agere, quae cogitas. Necesse est enim, si in conspectum veneris, venerari te regem (quod *προσκυνησθαι* illi vocant). Hoc si tibi grave est, per me nihilo secius editis mandatis conficies, quod studes. Tum Conon, mihi vero, inquit, non est grave, quemvis honorem habere regi; sed vereor, ne civitati meae sit opprobrium, si, quum ex ea sim profectus, quae ceteris gentibus imperare

consueverit, potius barbarorum, quam illius, more fungar. Itaque [huic]⁴⁾, quae volebat, scripta tradidit.

IV. Quibus cognitis, rex tantum auctoritate eius motus est, ut et Tissaphernem hostem iudicaverit, et Lacedaemonios bello persequi iusserit, et ei permiserit, quem vellet, eligere ad dispensandam pecuniam. Id arbitrium Conon negavit sui esse consilii, sed ipsius, qui optime suos nosse deberet; sed se suadere, 2 Pharnabazo id negotii daret. Hinc magnis muneribus donatus ad mare est missus, ut Cypriis et Phoenicibus ceterisque maritimis civitatibus naves⁵⁾ longas imperaret, classemque, qua proxima aestate mare tueri posset, compararet: dato adiutore Pharnabazo, sicut 3 ipse voluerat. Id ut Lacedaemoniis est nuntiatum, non sine cura rem administrarunt, quod maius bellum imminere arbitrabantur, quam si cum barbaro solum contenderent. Nam ducem fortem prudentemque regis opibus praefecturum ac secum dimicaturum videbant, quem neque consilio, neque copiis superare 4 possent. Hac mente magnam contrahunt classem; proficiscuntur Pisandro duce. Hos Conon apud Cnidum adortus magno proelio fugat, multas naves capit, complures deprimit. Qua victoria non solum Athenae, sed etiam cuncta Graecia, quae sub Lacedaemoniorum fuerat imperio, liberata est. Conon cum parte 5 navium in patriam venit, muros dirutos a Lysandro, utrosque et Piraei et Athenarum, reficiendos curat, pecuniaeque quinquaginta talenta, quae a Pharnabazo acceperat, civibus suis donat.

V. Accidit huic, quod ceteris mortalibus, ut inconsiderator in secunda, quam in adversa esset fortuna. Nam classe Peloponnesiorum devicta quum ultum se iniurias patriae putaret, plura concupivit, 2 quam efficere potuit. Neque tamen ea non pia et

4) vario loco pronomen hoc transponunt. vid. Daebl.

5) eodd. Guelph. Voss. A. navis.

probanda fuerunt, quod potius patriae opes augeri, quam regis maluit. Nam quum magnam auctoritatem sibi pugna illa navali, quam apud Cnidum fecerat, constituisset non solum inter barbaros, sed etiam omnes Graeciae civitates, clam dare operam coepit, ut Ioniam et Aeoliam restitueret Atheniensibus. Id 3 quum minus diligenter esset celatum, Tiribazus, qui Sardibus praeerat, Cononem evocavit, simulans, ad regem eum se mittere velle magna de re ⁶⁾. Huius nuntio parens quum venisset, in vincula coniectus est, in quibus aliquamdiu fuit. Inde nonnulli eum 4 ad regem abductum ibique perisse scriptum reliquerunt. Contra ea Dinon historicus, cui nos plurimum de Persicis rebus credimus, effugisse, scripsit: illud addubitat, utrum Tiribazo sciente, an imprudente sit factum.

X.

D I O N .

ARGUMENTUM.

Cap. I. De Dionis genere et virtutibus. — II. Dione auctore Plato Syracusas venit. Dionysius filii scelere moritur (367 a. Chr. n.). — III. Plato Dionysio secundo regnante iterum Syracusas venit; diversa Platonis et Philisti consilia. — IV. Dionysius Dionem Corinthum dimittit (360 a. Chr. n.). — V. In Siciliam regressus Dion Syracusarum potitur (358 a. Chr. n.). — VI. Dion invidiam sibi peperit nece Heraclidis. — VII. Crudelior esse coepit, in maiorem invidiam incidit. — VIII. Callicratis consilio decipitur. — IX. Domi suae occiditur (354 a. Chr. n.). — X. Interfecto Dione odium cedit misericordiae.

6) Titz. e codd. Az. Leid. B. dedit: *velle. Magna festinatione huius cet.*

I. Dion, Hipparini filius, Syracusanus, nobili genere natus, utraque implicatus tyrannide Dionysiorum. Namque ille superior Aristomachen, sororem Dionis, habuit in matrimonio: ex qua duos filios, Hipparinum et Nysaeum, procreavit; totidemque filias, nomine Sophrosynen et Areten: quarum priorem Dionysio filio, eidem, cui regnum reliquit, nuptum
 2 dedit, alteram, Areten, Dioni. Dion autem praeter nobilem propinquitatem generosamque maiorum famam multa alia ab natura habuit bona: in his ingenium docile, come, aptum ad artes optimas; magnam corporis dignitatem, quae non minimum commendatur ⁷⁾; magnas praeterea divitias a patre relictas, quas
 3 ipse tyranni muneribus auxerat. Erat intimus Dionysio priori, neque minus propter mores, quam affinitatem. Namque etsi Dionysii crudelitas ei displicebat tamen salvum esse ⁸⁾ propter necessitudinem, magis etiam suorum causa, studebat. Aderat in magnis rebus; eiusque consilio multum movebatur tyrannus, nisi qua in re maior ipsius cupiditas intercesserat.
 4 Legationes vero, quae essent illustriores, per Dionem administrabantur: quas quidem ille diligenter obeundo, fideliter administrando crudelissimum nomen
 5 tyranni sua humanitate tegebat ⁹⁾. Hunc a Dionysio missum Carthaginenses suspexerunt, ut neminem umquam Graeca lingua loquentem magis sint admirati.

II. Neque vero haec Dionysium fugiebant, Nam, quanto esset sibi ornamento, sentiebat. Quo fiebat, ut uni huic maxime indulgeret, neque eum secus
 2 diligeret, ac filium, Qui quidem, quum, Platonem Tarentum venisse, fama in Sicillam esset perlata, adolescenti negare non potuit ¹⁾, quin eum arcesseret,

7) Lamb. *commendat*; vid. Bard. et Daehn. — 8) *esse* deest in codd. — Bard. inclusit, Daehn. omisit; at cf. ed. Heid. — 9) Voss. A. *leniebat*, non male! Guelph. Gif. Dan. al. huic lectioni favent exhibentes: *tenebat*.

1) Daehn. *non potuerit*.

quum Dion eius audlendi cupiditate flagraret. Dedit ergo huic veniam, magnaque eum ambitione Syracusas perduxit. Quem Dion adeo admiratus est atque 3 adamavit, ut se totum ei traderet. Neque vero minus Plato delectatus est Dione. Itaque quum a Dionysio [tyranno] ²⁾ crudeliter violatus esset, quippe quem venumdari iussisset, tamen eodem rediit, eiusdem Dionis precibus adductus. Interim in morbum incidit 4 Dionysius. Quo quum gravi ³⁾ conflictaretur, quaesivit a medicis Dion, quemadmodum se haberet? simulque ab his petiit, si forte maiori esset periculo, ut sibi faterentur: nam velle se cum eo colloqui de partiendo regno; quod sororis suae filios ex illo natos partem regni putabat debere habere. Id medici non tacue- 5 runt, et ad Dionysium filiam sermonem retulerunt. Quo ille commotus, ne agendi esset Dioni potestas, patri soporem medicos dare coëgit. Hoc aeger sumto, ut ⁴⁾ somno sopitus, diem obiit supremum.

III. Tale initium fuit Dionis et Dionysii simultatis, eaque multis rebus aucta est. Sed tamen primis temporibus aliquamdiu simulata inter eos amicitia mansit. Quumque Dion non desisteret obsecrare Dionysium, ut Platonem Athenis arcesseret, et eius consiliis uteretur: ille, qui in aliqua re vellet patrem imitari, morem ei ⁵⁾ gessit. Eodemque tempore Philistum, historicum, Syracusas reduxit, hominem amicum non magis tyranno, quam tyrannidi ⁶⁾. Sed de hoc in eo meo libro plura sunt exposita, qui de historicis ⁷⁾ conscriptus est. Plato autem tantum apud Dionysium 3

2) tyranno deest in codd. Leid. B. Guelph, cf. Bard. —

3) olim vulgo: *graviter*. Nostram scriptur. tuentur optimi codd. (Guelph. Ax. Ox.) v. Brem. — 4) Longol. Titz. Wetz. al. omiserunt *ut*. — Titz. etiam *hoc ergo pro hoc aeger*.

5) abest hoc pronomen a codd. Voss. B. Ax., inclusit Daehn. — 6) codd. *tyrannis*; edd. Ald. Ascens. *tyrannidi*. Cf. Bard. — 7) al. *historicis Graecis*; poster. vox deest in cod. Ax. ed. Lamb. al. — Bard. inclusit, vid. ed. Heid.

auctoritate potuit valuitque eloquentia, ut ei persuaserit, tyrannidis facere finem, libertatemque reddere Syracusanis: a qua voluntate Philisti consilio deteritus aliquanto crudelior esse coepit.

IV. Qui quidem quum a Dione se superari videret ingenio, auctoritate, amore populi, verens, ne, si eum secum haberet, aliquam occasionem sui daret opprimendi, navem ei triremem dedit, qua Corinthum deveheretur: ostendens, se id utriusque facere causa, ne, quum inter se timerent, alteruter alterum
 2 praeoccuparet. Id quum factum multi indignarentur, magnaeque esset invidiae tyranno; Dionysius omnia, quae moveri poterant Dionis, in naves⁸⁾ imposuit, ad eumque misit. Sic enim existimari volebat, id se non
 3 odio hominis, sed suae salutis fecisse causa. Postea vero quam audivit, eum in Peloponneso manum comparare, sibi que bellum facere conari; Areten, Dionis uxorem, alii nuptum dedit, filiumque eius sic educari iussit, ut indulgendo turpissimis imbueretur cupiditibus. Nam puero, priusquam pubes esset, scorta
 4 adducebantur; vino epulisque obruebatur; neque ul-
 5 lum tempus sobrio relinquebatur. Is usque eo vitae statum commutatum ferre non potuit, postquam in patriam rediit pater (namque appositi erant custodes, qui eum a pristino victu deducerent), ut se de superiore parte aedium deiecerit, atque ita interierit. Sed illuc revertor.

V. Postquam Corinthum pervenit Dion, et eodem perfugit Heraclides, ab eodem expulsus Dionysio, qui praefectus fuerat equitum: omni ratione bellum
 2 comparare coeperunt. Sed non multum proficiebant, quod multorum annorum tyrannis magnarum opum putabatur. Quam ob causam pauci ad societatem
 3 periculi perducebantur. Sed Dion, fretus non tam

8) Daehn. dedit *in navis* e codd. Leid. B. Voss. A. B. et Ax. —

suis copiis, quam odio tyranni, maximo animo duabus onerariis navibus quinquaginta annorum imperium, munitum quingentis longis navibus, decem equitum, centum peditum millibus, profectus oppugnatum, (quod omnibus gentibus admirabile est visum) adeo facile perculit, ut post diem tertium, quam Siciliam attigerat, Syracusas introierit. Ex quo intelligi potest, nullum esse imperium tutum, nisi benevolentia munitum. Eo tempore aberat Dionysius, et in Italia classem operiebatur, adversariorum ratus neminem sine magnis copiis ad se venturum. Quae res eum fefellit. Nam Dion iis ipsis, qui sub adversarii fuerant potestate, regiones spiritus repressit, totiusque eius partis Siciliae potitus est, quae sub Dionysii potestate fuerat; parique modo urbis Syracusarum, praeter arcem et insulam adiunctam oppido; eoque rem perduxit, ut talibus pactionibus pacem tyrannus facere vellet: Siciliam Dion obtineret, Italiam Dionysius, Syracusas Apollocrates, cui maximam fidem uni habebat. [Dion] ⁹⁾.

VI. Has tam prosperas tamque inopinatas res consecuta est subita commutatio, quod fortuna sua mobilitate, quem paullo ante extulerat, demergere est adorta. Primum in filio, de quo commemoravi supra, suam vim ¹⁾ exercuit. Nam quum uxorem reduxisset, quae alii fuerat tradita, filiumque vellet revocare ad virtutem a perdita luxuria, accepit gravissimum parens vulnus morte filii. Deinde orta dissensio est inter eum et Heraclidem, qui, quod principatum non concedebat ²⁾, factionem comparavit. Neque is minus valebat apud optimates, quorum consensu prae-

9) ita codd. — Lamb. emendavit *Dionysius*. — Titz. edidit: *habebat*. Cap. VI. *Dionis tam prosperas cet. v. Dhn.* —

1) Boeckl. al. *saevitiam suam*; al. *vim suam* v. Bard. — 2. Brem. Günth. al. *qui quidem principatum non concedens*, vid. Bard.

- erat classi, quum Dion exercitum pedestrem teneret.
 4 Non tulit hoc animo aequo Dion, et verum illum
 Homeri retulit ex secunda rhapsodia, in quo haec
 sententia est: *Non posse bene geri rempublicam multo-*
rum imperiis. Quod dictum magna invidia consecuta
 est. Namque aperuisse videbatur, omnia in sua po-
 5 testate esse velle. Hanc ille non lenire obsequio, sed
 acerbitate opprimere studuit, Heraclidemque, quum
 Syracusas venisset, interficiendum curavit.

- VII. Quod factum omnibus maximum timorem
 iniecit. Nemo enim, illo interfecto, se tutum puta-
 bat. Ille autem, adversario remoto, licentius eorum
 bona, quos sciebat adversus se sensisse, militibus dis-
 2 pertivit. Quibus divisus, quum quotidiani maximi fie-
 rent sumtus, celeriter pecunia deesse coepit; neque,
 quo manus porrigeret, suppetebat, nisi in amicorum
 possessiones. Id huiusmodi erat, ut, quum milites
 3 reconciliasset, amitteret optimates. Quarum rerum
 cura frangebatur, et insuetus male audiendi non aequo
 animo ferebat, de se ab iis male existimari, quorum
 paullo ante in coelum fuerat elatus laudibus. Vulgus
 autem, offensa in eum militum voluntate, liberior
 loquebatur, et tyrannum non ferendum dictitabat.

- VIII. Haec ille intuens, quum, quemadmodum
 sedaret, nesciret, et, quorsum evaderent, timeret:
 Callicrates quidam, civis Atheniensis, qui simul cum
 eo ex Peloponneso in Siciliam venerat, homo et
 callidus et ad fraudem acutus, sine ulla religione ac
 2 fide, adit ad Dionem, et ait: eum [in] ²⁾ magno pericu-
 lo esse propter offensionem populi et odium mili-
 tum, quod nullo modo evitare posset, nisi alicui suo-
 rum negotium daret, qui se simularet illi inimicum.
 Quem si invenisset idoneum, facile omnium animos
 cogniturum; adversariosque sublaturum, quod ini-

2) *in* deest in codd. Boeckl. Voss. A. al., mutato loco
 ponitur in Guelph. —

mici eius dissidenti suos sensus aperturi forent. Tali 3
 consilio probato excepit has partes ipse Callicrates,
 et se armat imprudentia Dionis. Ad eum interficien-
 dum socios cónquirit; adversarios eius convenit,
 coniuratione 4) confirmat. Res, multis consciis quae 4
 gereretur, elata deferitur ad Aristomachen, sororem
 Dionis, uxoremque Areten. Illae timore perterritae
 conveniunt, cuius de periculo timebant. At ille ne-
 gat, a Callicrate fieri sibi insidias, sed illa, quae
 agerentur, fieri praecepto suo. Mulieres nihilo secius 5
 Callicratem in aedem Proserpinae deducunt, ac iu-
 rare cogunt, nihil ab illo periculi fore Dionis. Ille
 hac religione non modo non deterritus, sed ad ma-
 turandum concitatus est, verens, ne prius consilium
 aperiretur suum, quam conata perfecisset.

IX. Hac mente proximo die festo, quum a 1
 conventu se remotum Dion domi teneret, atque in
 conclavi edito recubisset, consciis loca munitiora
 oppidi tradit; domum custodiis sepiat; a foribus qui
 non discedant, certos praeficit; navem triremem ar- 2
 matis ornat, Philostratoque, fratri suo, tradit, eam-
 que in portu agitari iubet, ut si exercere remiges
 vellet: cogitans, si forte consiliis obstitisset fortuna,
 ut haberet, quo 5) fugeret ad salutem. Suorum au- 3
 tem e numero Zacynthios adolescentes quosdam eli-
 git, quum audacissimos, tum viribus maximis; his-
 que dat negotium, [ut] 6) ad Dionem eant inermes,
 sic ut conveniendi eius gratia viderentur venire. Hi
 propter notitiam sunt intromissi. At illi, ut limen 4
 eius intrarunt, foribus obseratis, in lecto cubantem
 invadunt, colligant; fit strepitus, adeo ut exaudiri

4) ita codd. Guelph. Dan. Leid. B. ed. Ald. al. cf. Daehn. ibiq. laud. — Bard. Brem. vulgatam secuti sunt: *coniurationem*.

5) cod. Dan. ed. Ultr. Bos. qua. cf. Bard. — 6) deest in multis codd.

5 posset foris. Hic, sicut ante saepe dictum est, quam
invisa sit singularis potentia, et miseranda vita, qui
se metui quam amari malunt, cuivis facile intellectu
6 fuit. Namque illi ipsi custodes, si propitia fuissent
voluntate, foribus effractis servare eum potuissent,
quod illi inermes, telum foris flagitantes, vivum
tenebant. Cui quum succurreret nemo, Lyco qui-
dam Syracusanus per fenestras gladium dedit, quo
Dion interfectus est.

X. Confecta caede, quum multitudo visendi gra-
tia introisset, nonnulli ab insciis pro noxiis concii-
duntur. Nam celeri rumore dilato, Dioni vim alla-
tam, multi concurrerant, quibus tale facinus displi-
cebat. Hi, falsa suspitione ducti, immerentes ut
2 sceleratos occidunt. Huius de morte ut palam fa-
ctum est, mirabiliter vulgi mutata est voluntas. Nam
qui vivum eum tyrannum vocitarunt, iidem libera-
torem patriae tyrannique expulsorem praedicabant.
Sic subito misericordia odio successerat, ut eum suo
sanguine, si possent, ab Acheronte cuperent redi-
3 mere. Itaque in urbe celeberrimo loco, elatus pu-
blice, sepulcri monumento donatus est. Diem obiit
circiter annos quinquaginta quinque natus, quantum
post annum, quam ex Peloponneso in Siciliam
redierat.

XI.

IPHICRATES.

ARGUMENTUM.

Cap. I. Iphicrates optime meritis de re militari. — II. Res
ab eo gestae: in Thracia, apud Corinthum (392 a. Chr. n.),
in Aegypto (374 a. Chr. n.), adversus Epaminondam (369 a.
Chr. n.) — III. De moribus Iphicratis corporisque forma.

I. IPHICRATES, Atheniensis, non tam magnitudine rerum gestarum 7), quam disciplina militari nobilitatus est. Fuit enim talis dux, ut non solum aetatis suae cum primis compararetur, sed ne de maioribus natu quidem quisquam anteponeretur. Multum vero in bello est versatus; saepe exercitibus praefuit; nusquam culpa sua male rem gessit; semper consilio vicit, tantumque eo valuit, ut multa in re militari partim nova attulerit, partim meliora fecerit. Namque ille pedestria arma mutavit, quum ante illum imperatorem maximis clypeis, brevibus hastis, minutis gladiis uterentur. Ille e contrario peltam pro parma fecit (a quo postea peltastae pedites appellantur), ut ad motus concursusque essent leviores. Hastae modum duplicavit; gladios longiores fecit. Idem genus loricarum mutavit, et pro sertis 8) atque aeneis lineas dedit. Quo facto expeditiores milites reddidit. Nam pondere detracto, quod aequae corporis teneret et leve esset, curavit.

II. Bellum cum Thracibus gessit; Seuthen, socium Atheniensium, in regnum restituit. Apud Corinthum tanta severitate exercitui praefuit, ut nullae umquam in Graecia neque exercitiores copiae, neque magis dicto audientes fuerint duci: in eamque consuetudinem adduxit, ut, quum proelio signum ab imperatore esset datum, sine ducis opera sic ordinatae consisterent, ut singuli ab peritissimo imperatore dispositi viderentur. Hoc exercitu moram Lacedaemoniorum interceptit: quod maxime tota celebratum est Graecia. Iterum eodem bello omnes copias eorum fugavit. Quo facto magnam adeptus est gloriam. Quum Artaxerxes Aegyptio regi bellum

7) cod. Ernst. *non tam genere quam magnitudine rerum gestarum disciplinaque militari*; probat Daehn. — Lamb. et Longol. *non tam gen. quum magn. r. g. quam discipl. mil.* —

8) pro sertis al. ferreis; vid. Brem.

- inferre voluit, Iphicratem ab Atheniensibus petivit ducem, quem praeficeret exercitui conductio, cuius numerus duodecim millium fuit. Quem ⁹⁾ quidem sic omni disciplina militari erudit, ut, quemadmodum quondam Fabiani milites Romani appellati sunt, sic Iphicratenses apud Graecos in summa laude fuerint.
- 5 Idem, subsidio Lacedaemoniis profectus, Epaminondae retardavit impetus. Nam nisi eius adventus appropinquasset, non prius Thebani Sparta abscessissent, quam captam incendio delessent.

- III. Fuit autem et animo magno et corpore, imperatoriaque forma, ut ipso aspectu cuius iniiiceret admirationem sui; sed in labore remissus nimis, parumque patiens, ut Theopompus memoriae prodidit; bonus vero civis, fideque magna. Quod quum in aliis rebus declaravit, tum maxime in Amyntae Macedonis liberis tuendis. Namque Eurydice, mater Perdictae et Philippi, cum his duobus pueris, Amynta mortuo, ad Iphicratem confugit, eiusque opibus de-
- 3 fensa est. Vixit ad senectutem, placatis in se suorum civium animis. Causam capitis semel dixit, bello sociali, simul cum Timotheo, eoque iudicio est ab-
- 4 solutus. Menesthea filium reliquit, ex Thressa natum, Coti regis filia. Is quum interrogaretur, utrum plaris patrem matremne faceret; matrem, inquit. Id quum omnibus mirum videretur: at, ille, merito, inquit, facio. Nam pater, quantum in se fuit, Thracem me creavit, contra ea mater Atheniensem.

9) pro quem, Ax. Voss. B. quos.

XII.

CHABRIAS.

ARGUMENTUM.

Cap. I. Chabrias Boeotiis auxillo missus novo militum statu Lacedaemonios sustinet, magnamque adipiscitur gloriam (377 a. Chr. n.) — II. Eius bella in Cypro, in Aegypto (362 a. Chr. n.) — III. Propter invidiam plerumque Athenis abest. — IV. In bello sociali perit desertus a suis (358 a. Chr. n.).

I. CHABRIAS, Atheniensis. Hic quoque in summis 1
habitus est ducibus, resque multas memoria dignas
gessit. Sed ex his elucet maxime inventum eius in
proelio, quod apud Thebas fecit, quum Boeotiis
subsidio venisset. Namque in eo, victoria fidente 2
summo duce Agesilao, fugatis iam ab eo conducti-
tis catervis, reliquam phalangem loco vetuit cedere,
obnixoque genu scuto, proiecta 1) hasta impetum ex-
cipere hostium docuit. Id novum Agesilaus contuens
progredi non est ausus, suosque iam incurrentes
tuba revocavit. Hoc usque eo tota Graecia fama 3
celebratum est, ut illo statu Chabrias sibi statuam
fieri voluerit, quae publice ei ab Atheniensibus in
foro constituta est. Ex quo factum est, ut postea
athletae ceterique artifices his statibus in statu is po-
nendis uterentur, quibus victoriam essent adepti.

II. Chabrias autem multa in Europa bella admi- 1
nistravit, quum dux Atheniensium esset; in Aegypto 2)
sua sponte gessit. Nam Nectanabin adiutum pro-
fectus, regnum ei constituit. Fecit idem Cypri, sed 2
publice ab Atheniensibus Evagorae adiutor datus;

1) vulgo: *proiectaque*; carent particula *que* codd. Ax. Guelph. Voss. al.

2) ed. Ernst. *nonnulla in Aegypto.*

- neque prius inde discessit, quam totam insulam bello devinceret: qua ex re Athenienses magnam gloriam sunt adepti. Interim bellum inter Aegyptios et Persas conflatum est. Athenienses cum Artaxerxe societatem habebant; Lacedaemonii cum Aegyptiis, a quibus magnas praedas Agesilaus, rex eorum, faciebat.
- 4 Id intuens Chabrias, quum in re nulla Agesilao cederet, sua sponte eos adiutum profectus Aegyptiae classi praefuit, pedestribus copiis Agesilaus.

- III. Tum praefecti regis Persiae legatos miserunt Athenas questum, quod Chabrias adversum regem bellum gereret cum Aegyptiis. Athenienses diem certam Chabriae praestituerunt, quam ante domum nisi redisset, capitis se illum damnaturos denuntiarent. Hoc ille nuntio Athenas rediit, neque ibi diutius est moratus, quam fuit necesse. Non enim libenter erat ante oculos civium suorum: quod et vivebat laute, et indulgebat sibi liberalius, quam ut invidiam vulgi posset effugere. Est enim hoc commune vitium in magnis liberisque civitatibus, ut invidia gloriae comes sit, et libenter de his detrahant, quos eminere videant altius; neque animo aequo pauperes alienam opulentium intuentur fortunam. Itaque Chabrias, quoad ei licebat, plurimum aberat.
- 4 Neque vero solus ille aberat Athenis libenter, sed omnes fere principes fecerunt idem: quod tantum se ab invidia putabant abfuturos, quantum a conspectu suorum recessissent. Itaque Conon plurimum Cypri vixit, Iphicrates in Thracia, Timotheus Lesbi, Chares in Sigeo. Dissimilis quidem Chares horum et factis et moribus, sed tamen Athenis et honoratus et potens.

- IV. Chabrias autem periit bello sociali tali modo. Oppugnabant Athenienses Chium. Erat in classe Chabrias privatus, sed omnes, qui in magistratu erant, auctoritate antebat; eumque magis milites, quam qui praeerant, adspiciebant. Quae res ei maturavit

mortem. Nam dum primus studet portum intrare, gubernatoremque iubet eo dirigere navem, ipsi sibi perniciiei fuit. Quum enim eo penetrasset, ceterae non sunt secutae. Quo facto circumfusus hostium concursu quum fortissime pugnaret, navis, rostro percussa, coepit sidere. Hinc refugere quum posset, 3 si se in mare deiecisset, quod suberat classis Atheniensium, quae exciperet natantes³⁾: perire maluit, quam armis abiectis navem relinquere, in qua fuerat vectus. Id ceteri facere noluerunt, qui nando in tutum pervenerunt. At ille, praestare honestam mortem existimans turpi vitae, comminus pugnans telis hostium interfectus est.

XIII.

TIMOTHEUS.

ARGUMENTUM.

Cap. I. Timothei virtutes et facta bellica. — II. Ipsi Lacedaemoniorum victori statua ponitur (374 a. Chr. n.). — III. Senex Menestheo in consilium datur (357 a. Chr. n.), a Charete, praetore, accusatus damnatur. — IV. Filius eius Conon muros reficere cogitur. Singularis amicitiae testimonium Iasonis erga Timotheum.

I. TIMOTHEUS, Cononis filius, Atheniensis. Hic a patre acceptam gloriam multis auxit virtutibus. Fuit enim disertus, impiger, laboriosus, rei militaris peritus, neque minus civitatis regendae. Multa huius sunt praeclare facta, sed haec maxime illustria. Olynthios et Byzantios bello subegit. Samum

3) codd. Guelph. Leid. B. al. *natanteis* vel *natantis*: al. *natantem*.

cepit, in qua oppugnanda superiore bello Athenienses mille et ducenta talenta consumserant. Id ille sine ulla publica impensa populo restituit: adversus Cotum bella gessit, ab eoque mille et ducenta talenta praedae in publicum retulit ⁴⁾. Cyzicum obsidione liberavit. Ariobarzani simul cum Agesilao auxilio profectus est: a quo quum Laco pecuniam numeratam accepisset, ille cives suos agro atque urbibus augeri maluit, quam id sumere, cuius partem domum suam ferre posset. Itaque accepit Criothoten et Sestum.

II, Idem classi praefectus circumvehens Peloponnesum, Laconicen populatus, classem eorum fugavit; Corcyram sub imperium Atheniensium redegit; sociosque idem adiunxit Epirotas, Athamanas, Chaonas, omnesque eas gentes, quae mare illud adiacent. Quo facto Lacedaemonii de diutina contentione destiterunt, et sua sponte Atheniensibus imperii maritimi principatum concesserunt; pacemque his legibus constituerunt, ut Athenienses mari duces essent. Quae victoria tantae fuit Atticis laetitiae, ut tum primum arae Paci publice sint factae, eique deae pulvinar sit institutum. Cuius laudis ut memoria maneret, Timotheo publice statuam in foro posuerunt. Qui honos huic uni ante id ⁵⁾ tempus contigit; ut, quum patri populus statuam posuisset, filio quoque daret. Sic iuxta posita recens filii veterem patris renovavit memoriam.

III. Hic quum esset magno natu, et magistratus gerere desisset, bello Athenienses undique premi sunt coepti. Defecerat Samus; descierat Hellespontus; Philippus iam tum valens Macedo multa moliebatur: cui oppositus Chares quum esset, non satis in eo praesidii putabatur. Fit Menestheus praetor,

4) Leid, Voss, A. *detulit*, vid. Brem,

5) ita opt. codd. — al. *hoc*; at cf. ed. Heid.

filius Iphicratis, gener Timothei, et, ut ad bellum
 proficiscatur, decernitur. Huic in consilium dantur
 duo usu sapientiaque praestantes, quorum consilio
 uteretur, pater et socer: quod in his tanta erat
 auctoritas, ut magna spes esset, per eos amissa
 posse recuperari. Hi quum Samum profecti essent, 3
 et eodem Chares, adventu [illorum] 6) cognito, cum
 suis copiis proficisceretur, ne quid absente se ges-
 tum videretur; accidit, quum ad insulam appropin-
 quarent, ut magna tempestas oriretur: quam evi-
 tare duo veteres imperatores utile arbitrati suam
 classem suppresserunt. At ille, temeraria usus ra- 4
 tione, non cessit maiorum natu auctoritati, et, ut
 si 7) in sua navi esset fortuna, quo contenderat, per-
 venit: eodemque ut sequerentur, ad Timotheum et
 Iphicratem nuntium misit. Hinc, male re gesta, com-
 pluribus amissis navibus, eodem, unde erat profec-
 tus, se recepit, literasque Athenas publice misit,
 sibi proclive fuisse, Samum capere, nisi a Timo-
 theo et Iphicrate desertus esset. [Ob eam rem in 5
 crimen vocabantur.] 8) Populus acer, suspicax, mo-
 bilis, adversarius, invidus etiam potentiae, domum
 revocat: accusantur proditoris. Hoc iudicio damna-
 tur Timotheus, lisque eius aestimatur centum talen-
 tis. Ille, odio ingratae civitatis coactus, Chalcidem
 se contulit.

IV. Huius post mortem quum populum iudicii 1
 sui poeniteret, multae novem partes detraxit, et
 decem talenta Cononem, filium eius, ad muri quam-
 dam partem reficiendam iussit dare. In quo fortu-
 nae varietas est animadversa. Nam quos avus Conon
 muros ex hostium praeda patriae restituerat, eosdem

6) in codd. hoc pronomen vario loco ponitur, non-
 nulli habent *eorum*. — 7) al. omittunt *si*, et mox ponunt
manu pro navi, cf. Daehn, — 8) desunt haec in cod. Voss.
 B. al. cf. Günth.

- nepos, cum summa ignominia familiae, ex sua re
 2 familiari reficere coactus est. Timothei autem moderatae sapientisque vitae quum pleraque possimus proferre testimonia, uno erimus contenti, quod ex eo facile coniici poterit, quam carus suis fuerit. Quum Athenis adolescentulus causam diceret, non solum amici privatique hospites ad eum defendendum convenerunt, sed etiam in eis Iason tyrannus,
 3 qui illo tempore fuit omnium potentissimus. Hic quum in patria sine satellitibus se tutum non arbitraretur, Athenas sine ullo praesidio venit, tantique hospitem fecit, ut mallet se capitis periculum adire, quam Timotheo de fama dimicanti deesse. Hunc adversus tamen Timotheus postea populi iussu bellum gessit, patriaeque sanctiora iura, quam hospitii, esse
 4 duxit. Haec extrema fuit aetas imperatorum Atheniensium, Iphicratis, Chabriae, Timothei: neque post illorum obitum quisquam dux in illa urbe fuit dignus memoria.

XIV.

D A T A M E S.

ARGUMENTUM.

Cap. I. Datames fortitudine excellit in bello adversus Cadusios (361 a. Chr. n.), et paternae provinciae praeficitur. — II. Thym Paphlagonem, qui a rege defecerat, vivum capit. — III. Thyo ad regem ducto, Datames exercitui adversus Aegyptum comparato praeficitur. — IV. Revocatus Aspim Cataonium, qui regi non parebat, magna celeritate vincit. — V. Aspi devicto, suadente Pandate, ipse Datames a rege deficit. — VI. In bello adversus Pisidas, filio interfecto, socer, Mithrobarzanes, ad hostes transfugit; utrosque Datames opprimit. — VII. A Scisma filio Datames regi proditur, qui Autophradatem contra eum mittit. — VIII. Autophradates

prudencia et consilio Datamis vincitur atque de pace agit. — IX. Rex per insidias Datamem interficere tentat, quas ille plerasque vitat. — X. Mithridates, fidus regi, specie defectionis Datamem capit et interficit.

I. Venio nunc ad fortissimum virum maximique consilii omnium barbarorum, exceptis duobus Carthaginensibus, Hamilcare et Hannibale. De quo hoc plura referemus, quod et obscuriora sunt eius gesta pleraque; et ea, quae prospere ei cesserunt, non magnitudine copiarum, sed consilii, quo tum ⁹⁾ omnes superabat, acciderunt: quorum nisi ratio explicata fuerit, res apparere non poterunt. Datames, patre Camissare, natione Care, matre Scythissa natus, primum militum numero fuit apud Artaxerxem eorum, qui regiam tuebantur. Pater eius Camissares, quod et manu fortis, et bello strenuus, et regi multis locis fidelis erat repertus, habuit provinciam partem Ciliciae iuxta Cappadociam, quam incolunt Leucosyri. Datames, militare munus fungens, primum, qualis esset, apparuit in bello, quod rex adversus Cadusios gessit. Namque hic, multis millibus regionum interfectis, magni fuit eius opera. Quo factum est, ut, quum in eo bello cecidisset Camissares, paterna ei traderetur provincia.

II. Pari se virtute postea praebehuit, quum Autophradates iussu regis bello persequeretur eos, qui defecerant. Namque huius opera hostes, quum castra iam intrassent, profligati sunt, exercitusque reliquus conservatus regis ¹⁾ est: qua ex re maioribus rebus praeesse coepit. Erat eo tempore Thyus dynastes Paphlagoniae, antiquo genere natus a Pylacmene illo, quem Homerus Troico bello a Patroclo interfectum ait. Is regi dicto audiens non erat.

9) al. contra codd. *tantum non omnes*.

1) deest haec vox in edd. vet., tuentur eam codd., Bard., al. iacloserunt. —

Quam ob causam bello eum persequi constituit, eique rei praefecit Datamem, propinquum Paphlagonis: namque ex fratre et sorore erant nati. Quam ob causam Datames ²⁾ primum experiri voluit, ut sine armis propinquum ad officium reduceret. Ad quem quum venisset sine praesidio, quod ab amico nullas
 4 vereretur insidias, paene interiit. Nam Thyus eum clam interficere voluit. Erat mater cum Datame, amita Paphlagonis. Ea, quid ageretur, rescit, filium-
 5 que monuit. Ille fuga periculum evitavit, bellumque indixit Thyo. In quo quum ab Ariobarzane, praefecto Lydiae et Ioniae totiusque Phrygiae, desertus esset, nihilo segnius perseveravit, vivumque Thyum cepit cum uxore et liberis.

III. Cuius facti ne prius fama ad regem, quam ipse, perveniret, dedit operam. Itaque omnibus insciis, eo, ubi erat rex, venit, posteroque die Thyum, hominem maximi corporis terribilique facie, quod et niger, et capillo longo barbaque erat promissa, optima veste textit, quam satrapae regii gerere consueverant; ornavitque etiam torque, et armillis aureis, ceteroque regio cultu; ipse agresti duplici amiculo circumdatus hirtaque tunica, gerens in capite galeam venatoriam, dextra manu clavam, sinistra copulam, qua vinctum ante se Thyum agebat, ut
 3 si feram bestiam captam duceret. Quem quum omnes prospicerent ³⁾ propter novitatem ornatus ignotamque formam, ob eamque rem magnus esset concursus; fuit non nemo, qui agnosceret Thyum, regique
 4 nuntiaret. Primo non accredidit. Itaque Pharnabazum misit exploratum. A quo ut rem gestam comperit, statim admitti iussit, magnopere delectatus quum facto, tum ornatu: in primis, quod nobilis
 5 rex in potestatem inopinanti venerat. Itaque magni-

²⁾ vulgo additur *omnia* cf. Daehn.

³⁾ codd. vel *adspicerent*, vel *conspicerent*, cf. Dhn.

fice Datamem donatum ad exercitum misit, qui tum contrahebatur duce Pharnabazo et Tithrauste ad bellum Aegyptium, parique eum, atque illos, imperio esse iussit. Postea vero quam Pharnabazum rex revocavit, illi summa imperii tradita est.

IV. Hic quum maximo studio compararet exercitum, Aegyptumque proficisci pararet, subito a rege literae sunt ei missae, ut Aspis aggredere-¹ tur, qui Cataoniam tenebat: quae gens iacet supra Ciliciam, confinis Cappadociae. Namque Aspis, saltuosam regionem castellisque munitam incolens, non solum imperio regis non parebat, sed etiam finitimas regiones vexabat, et, quae regi portarentur, abripiebat. Datames, etsi longe aberat ab his regionibus, et a³ maiore re abstrahebatur, tamen regis voluntati morem gerendum putavit. Itaque cum paucis, sed viris fortibus navem conscendit: existimans, id quod accidit, facilius se imprudentem parva manu oppressurum, quam paratum quamvis magno exercitu. Hac⁴ delatus in Ciliciam, egressus inde, dies noctesque iter faciens, Taurum transiit, eoque, quo studuerat, venit; quaerit, quibus locis sit Aspis; cognoscit, haud longe abesse, profectumque eum venatum. Quem dum speculatur, adventus eius causa cognoscitur. Pisidas cum iis, quos secum habebat, ad resistendum Aspis comparat. Id Datames ubi audivit,⁵ arma sumit, suosque sequi iubet: ipse equo concitato ad hostem vehitur. Quem procul Aspis conspiciens ad se ferentem pertimescit, atque a conatu resistendi deterritus sese dedit. Hunc Datames vinctum ad regem ducendum tradit Mithridati.

V. Haec dum geruntur, Artaxerxes, reminiscens, a quanto bello ad quam parvam rem principem ducum misisset, se ipse⁴⁾ reprehendit, et nuntium ad exercitum Acen misit, quod nondum Datamem pro-

4) ed. Ult. Stav. al. *se ipsum*.

sectum putabat, qui diceret, ne ab exercitu discederet. Hic, priusquam perveniret, quo erat profectus, 2 in itinere convenit, qui Aspim ducebant. Qua celeritate quum magnam benevolentiam regis Datames consecutus esset, non minorem invidiam aulicorum excepit, qui illum unum pluris, quam se omnes fieri videbant. Quo facto cuncti ad eum opprimendum 3 consenserunt. Haec Pandates, gazae custos regiae, amicus Datami, perscripta ei mittit, in quibus docet: eum magno fore periculo, si quid illo imperante in 4 Aegypto adversi accidisset. Namque eam esse consuetudinem regiam, ut casus adversos hominibus tribuant, secundos fortunae suae: quo fieri, ut facile impellantur ad eorum perniciem, quorum ductu res male gestae nuntientur. Illum hoc maiore fore in discrimine, quod, quibus rex maxime obediat, eos 5 habeat inimicissimos. Talibus ille literis cognitis, quum iam ad exercitum Acen venisset, quod non ignorabat, ea vere scripta, desciscere a rege constituit. Neque tamen quicquam fecit, quod fide sua 6 esset indignum. Nam Mandroclem Magnetem exercitui praefecit; ipse cum suis in Cappadociam discedit, coniunctamque huic Paphlagoniam occupat, celans, qua voluntate esset in regem; clam cum Ariobarzane facit amicitiam, manum comparat, urbes munitas suis tuendas tradit.

VI. Sed haec propter hiemale tempus minus prospere procedebant. Audit, Pisidas quasdam copias adversus se parare. Filium eo Arsideum cum exercitu mittit. Cadit in proelio adolescens. Proficiscitur eo pater non ita cum magna manu, celans, quantum vulnus acceperat; quod prius ad hostem pervenire cupiebat, quam de re male gesta fama ad suos perveniret: ne cognita filii morte animi debilitarentur 2 militum. Quo contenderat, pervenit, hisque locis castra ponit, ut neque circumiri multitudine adversariorum posset, neque impediri, quo minus ad di-

micandum manum haberet expeditam. Erat cum eo 3
 Mithrobarzanes, socer eius, praefectus equitum. Is,
 desperatis generi rebus, ad hostes transfugit. Id
 Datames ut audivit, sensit, si in turbam exisset, ab
 homine tam necessario se relictum, futurum, ut
 ceteri consilium sequerentur. In vulgus edit: suo 4
 iussu Mithrobarzanem profectum pro perfuga, quo
 facilius receptus interficeret hostes. Quare relinqui
 eum non par esse, sed 5) omnes confestim sequi. Quod
 si animo strenuo fecissent, futurum, ut adversarii
 non possent resistere, quum et intra vallum et foris
 caederentur. Hac re probata, exercitum educit, 5
 Mithrobarzanem persequitur; qui tantum quod 6) ad
 hostes pervenerat, Datames signa inferri iubet. Pisi- 6
 dae, nova re commoti, in opinionem adducuntur,
 perfugas mala fide compositoque fecisse, ut recepti
 essent maiori calamitati. Primum eos adoriuntur. Illi
 quum, quid ageretur, aut fieret, ignorarent, coacti
 sunt, cum eis pugnare, ad quos transierant, ab hisque
 stare, quos reliquerant. Quibus quum neutri parcer-
 rent, celeriter sunt concisi. Reliquos Pisidas resistent- 7
 es Datames invadit: primo impetu pellit, fugientes
 persequitur, multos interficit, castra hostium capit.
 Tali consilio uno tempore et proditores perculit, et 8
 hostes profligavit; et, quod ad perniciem fuerat cogi-
 tatum, id ad salutem convertit. Quo neque acu-
 tius ullius imperatoris cogitatum, neque celerius
 factum usquam legimus.

VII. Ab hoc tamen viro Scismas, maximo natu 1
 filius, desciiit, ad regemque transiit, et de defectione
 patris detulit. Quo nuntio Artaxerxes commotus,
 quod intelligebat sibi cum viro forti ac strenuo ne-
 gotium esse, qui, quum cogitasset, facere auderet, et
 prius cogitare, quam conari, consuesset, Autophra-
 datem in Cappadociam mittit. Hic ne intrare posset, 2

5) al. et omnes, vid. ed. Heid. — 6) Titz. e Longol.
 prosequitur tantum. Qui vixdum; sed cf. Günth.

- 3 saltum, in quo Ciliciae portae sunt sitae, Datames praecipere studuit. Sed tam subito copias contrahere non potuit. A qua re depulsus, cum ea manu, quam contraxerat, locum delegit talem, ut neque circumiretur ab hostibus, neque praeteriret adversarius, quin ancipitibus locis premeretur, et, si dimicare cum ⁷⁾ eo vellet, non multum obesse multitudo hostium suae paucitati posset.

- VIII. Haec etsi Autophradates videbat, tamen statuit congregari, quam cum tantis copiis refugere, aut tam diu uno loco sedere. Habebat barbarorum equitum viginti, peditum centum millia, quos illi Cardacas appellant, eiusdemque generis tria funditorum: praeterea Cappadocum octo, Armeniorum decem, Paphlagonum quinque, Phrygum decem, Lydorum quinque, Aspendiorum et Pisidarum circiter tria, Cilicum duo, Caspianorum ⁸⁾ totidem, ex Graecia conductorum tria millia: levis armaturae maximum numerum. Has adversus copias spes omnis consistebat Datami in se locique natura: namque huius partem non habebat vicesimam militum. Quibus fretus confligit, adversariorumque multa millia concidit, quum de ipsius exercitu non amplius hominum mille cecidisset ⁹⁾. Quam ob causam postero die tropaeum posuit, quo loco pridie pugnatum erat. Hinc quum castra movisset, semperque, inferior copiis, superior omnibus proeliis discederet ¹⁾, quod numquam manum consereret, nisi quum adversarios locorum angustiis clausisset (quod perito regionum calideque cogitanti saepe accidebat): Autophradates, quum bellum duci maiore regis calamitate, quam adversariorum, videret, ad pacem amicitiamque hortatus

⁷⁾ praepositio deest in codd. et vett. edd. cf. Daehn.

⁸⁾ vulgo *Captianorum*, cf. Cellar. et Bos. — ⁹⁾ Voss. B. Long. *cecidissent*. — ¹⁾ al. *ut inf. copiis, ita sup. omn. prosl. discedebat*. cf. Bard. —

est, ut cum rege in gratiam rediret. Quam ille etsi 6
fidam non fore putabat, tamen conditionem accepit,
seque ad Artaxerxem legatos missurum dixit. Sic
bellum, quod rex adversus Datamem susceperat,
sedatum. Autophradates in Phrygiam se recepit.

IX. At rex, quod implacabile odium in Datamem 1
susceperat, postquam bello eum opprimi non posse
animadvertit, insidiis interficere studuit: quas ille
plerasque vitavit. Sicut, quum nuntiatum esset, quos- 2
dam sibi insidiari, qui in amicorum erant numero
(de quibus, quod inimici detulerant, neque creden-
dum, neque negligendum putavit); experiri voluit,
verum falsumne esset relatum. Itaque eo profectus 3
est, quo itinere futuras insidias dixerant. Sed ele-
git corpore et statura simillimum sui, eique vestim-
tum suum dedit, atque eo loco ire, quo ipse con-
sueverat, iussit. Ipse autem ornatu vestituque 2)
militari inter corporis custodes iter facere coepit. At 4
insidiatores, postquam in eum locum agmen perve-
nit, decepti ordine atque vestitu, in eum faciunt im-
petum, qui suppositus erat. Praedixerat autem his
Datames, cum quibus iter faciebat, ut parati essent
facere, quod ipsum vidissent. Ipse, ut concurrentes 5
insidiatores animadvertit, tela in eos coniecit. Hoc
idem quum universi fecissent, priusquam pervenirent
ad eum, quem aggredi volebant, confixi ceciderunt.

X. Hic tamen tam callidus vir extremo tempore 1
captus est Mithridatis, Ariobarzanis filii, dolo. Nam-
que is pollicitus est regi, se eum interfecturum, si
ei rex permitteret, ut, quodcumque vellet, liceret
impune facere, fidemque de ea re, more Persarum,
dextra dedisset. Hanc ut recepit 3) a rege missam, 2
copias parat, et absens amicitiam cum Datame facit,
regis provincias vexat, castella expugnat, magnas

2) all. omittunt *vestitu*, v. Daehn. — 3) al. *accepit*, cf. Günth.

praedas capit, quarum partim suis dispertit, partim ⁴⁾ ad Datamem mittit; pari modo complura castella ei **3** tradit. Haec diu faciendo persuasit homini, se infinitum adversus regem suscepisse bellum; quum nihilo magis, ne quam suspicionem illi praeberet insidiarum, neque colloquium eius petivit, neque in conspectum venire studuit. Sic absens amicitiam gerebat, ut non beneficiis mutuis, sed odio communi, quod erga regem suscepserant, contineri viderentur.

XI. Id quum satis se confirmasse arbitratus est, certiozem facit Datamem, tempus esse, maiores exercitus parari, et bellum cum ipso rege suscipi; deque ea re, si ei videretur, quo loco vellet, in colloquium veniret. Probata re, colloquendi tempus sumitur, **2** locusque, quo conveniretur. Huc Mithridates cum uno, cui maximam habebat fidem, ante aliquot dies venit, compluribusque locis separatim gladios obruit, eaque loca diligenter notat. Ipso autem colloquendi die utrique, locum qui explorarent, atque ipsos scrutarentur, mittunt. **3** Deinde ipsi sunt congressi. Hic quum aliquamdiu in colloquio fuissent, et diversi discessissent, iamque procul Datames abesset: Mithridates, priusquam ad suos perveniret, ne quam suspicionem pareret ⁵⁾, in eundem locum revertitur, atque ibi, ubi telum erat impositum, resedit, ut si **[a]** ⁶⁾ lassitudine cuperet acquiescere: Datamemque **4** revocavit, simulans, se quiddam in colloquio esse oblitum. Interim telum, quod latebat, protulit, nudatumque vagina veste textit, ac Datami venienti ait, digredientem se animadvertisse, locum quemdam, qui erat in conspectu, ad castra ponenda esse idoneum. **5** Quem quum digito demonstraret, et ille con-

⁴⁾ ita codd. Ax. Boeckl. Leid. B. Voss. B. — al. *partem*. v. ed. Heid.

⁵⁾ cod. Ax. *pararet*. — ⁶⁾ praepositio, quae, a Lambino addita, vulgo servatur, deest in codd. et vet. edd.

spiceret, aversum ferro transfixit, priusque, quam quisquam posset succurrere, interfecit. Ita ille vir, qui multos consilio, neminem perfidia ceperat, simulata captus est amicitia.

XV.

EPAMINONDAE.

ARGUMENTUM.

Cap. I. Lectores monet auctor de moribus Graecis. — II. De genere et adolescentia Epaminondae, quali modo literis et artibus sit eruditus. — III. De moribus Epaminondae. — IV. Abstinencia eius exemplis probatur. — V. De eloquentia Epaminondae. — VI. Quae verba quantaque in conventu Arcadium et legatus Spartaee fecerit (372 a. Chr. n.) — VII. Iniuriarum fuisse immemorem et patriae omni modo consuluisse rebus potissimum in Peloponneso gestis demonstratur. — VIII. Ab inimicis in iudicium vocatus honorifice absolvitur. — IX. Apud Mantineam invictus moritur (362 a. Chr. n.). — X. Uxorem nunquam duxit, cuius rei criminationem acute diluit. Abhorruit a civili caede. Cum hoc Thebanorum gloria orta fuit, cum hoc interiit.

I. EPAMINONDAE, Polymni filius, Thebanus. De hoc priusquam scribamus, haec praecipienda videntur lectoribus, ne alienos mores ad suos referant; neve ea, quae ipsis leviora sunt, pari modo apud ceteros fuisse arbitrentur. Scimus enim, musicen nostris moribus abesse a principis persona; saltare vero etiam in vitiis poni: quae omnia apud Graecos et grata, et laude digna ducuntur. Quum autem exprimere imaginem consuetudinis atque ⁷⁾ vitae velimus Epaminondae, nihil videmur debere praeter-

7) Ax. non habet atque, vid. Brem.

- 4 mittere, quod pertineat ad eam declarandam. Quare dicemus primum de genere eius; deinde, quibus disciplinis et a quibus sit eruditus; tum de moribus ingenique facultatibus, et si qua alia digna memoria erunt; postremo de rebus gestis, quae a plurimis omnium anteponuntur virtutibus.

- II. Natus igitur patre, quo diximus, honesto genere, pauper iam a maioribus relictus, eruditus autem sic, ut nemo Thēbanus magis. Nam et citharizare, et cantare ad chordarum sonum doctus est a Dionysio, qui non minore fuit in musicis gloria, quam Damon aut Lamprus, quorum pervulgata sunt nomina; cantare ⁸⁾ tibiis ab Olympiodoro, saltare a Calliphrone. At philosophiae praeceptorem habuit Lysim, Tarentinum, Pythagoreum: cui quidem sic fuit deditus, ut adolescens tristem et severum senem omnibus aequalibus suis in familiaritate anteposuerit, neque prius eum a se dimiserit, quam in doctrinis tanto antecessit condiscipulos, ut facile intelligi posset, pari modo superaturum omnes in ceteris artibus.
- 3 Atque haec ad nostram consuetudinem sunt levia, et potius contemnenda; at in Graecia utique olim magnae laudi erant. Postquam ephebus factus est, et palaestrae dare operam coepit, non tam magnitudini virium servivit, quam velocitati. Illam enim ad athletarum usum, hanc ad belli existimabat utilitatem pertinere. Itaque exercebatur plurimum currendo et luctando ad eum finem, quoad stans complecti posset atque contendere. In armis plurimum studii consumebat.

III. Ad hanc corporis firmitatem plura etiam animi bona accesserant. Erat enim modestus, prudens, gravis, temporibus sapienter utens, peritus belli, fortis [manu] ⁹⁾, animo maximo; adeo veritatis

8) ita codd. Guelph. Leidd. Dan. — alii *carmina cantare tib.*

9) uncis inclusi manu; v, ed. Heid.

diligens, ut ne ioco quidem mentiretur. Idem continens, clemens, patiensque admirandum in modum, non solum populi, sed etiam amicorum ferens iniurias; inprimisque commissa celans: quod interdum non minus prodest, quam diserte dicere; studiosus audiendi: ex hoc enim facillime disci arbitrabatur. Itaque quum in circulum venisset, in quo aut de republica disputaretur, aut de philosophia sermo haberetur, numquam inde prius discessit, quam ad finem sermo esset adductus. Paupertatem adeo facile peressus est, ut de republica nihil praeter gloriam ceperit. Amicorum in se tuendo caruit facultatibus, fide ad alios sublevandos saepe sic usus est, ut possit iudicari, omnia ei cum amicis fuisse communia. Nam quum aut civium suorum aliquis ab hostibus esset captus, aut virgo amici nubilus propter paupertatem collocari non posset, amicorum concilium habebat, et, quantum quisque daret, pro facultatibus imperabat. Eamque summam quum fecerat, priusquam acciperet pecuniam, adducebat eum, qui quaerebat, ad eos, qui conferebant, eique ut ipsi numerarent, faciebat; ut ille, ad quem ea res perveniebat, sciret, quantum cuique deberet.

IV. Tentata autem eius est abstinencia a Diomedonte, Cyziceno. Namque is rogatu Artaxerxis Epaminondam pecunia corrumpendum susceperat. Hic magno cum pondere auri Thebas venit, et Micythum adolescentulum quinque talentis ad suam perduxit voluntatem, quem tum Epaminondas plurimum diligebat. Micythus Epaminondam convenit, et causam adventus Diomedontis ostendit. At ille Diomedonte coram, Nihil, inquit, opus pecunia est. Nam si ea rex vult, quae Thebanis sint ¹⁾ utilia, gratis facere sum paratus; sin autem contraria, non habet auri atque argenti satis. Namque orbis terrarum

1) *Ax. sunt utilia.*

- 3 divitias accipere nolo pro patriae caritate. Tu ²⁾ quod me incognitum tentasti, tuique similem existimasti, non miror, tibiue ignosco; sed egredere propere, ne alios corrumpas, quum me non potueris. Tu, Micythe, argentum huic redde; nisi id confestim facis, ego te tradam magistratui. Hunc Diomedon quum rogaret, ut tuto exire, suaque, quae attulisset, liceret efferre: Istud quidem, ³⁾ inquit, faciam; neque tua causa, sed mea, ne, si tibi sit pecunia adempta, aliquis dicat, id ad me ereptum ⁴⁾ pervenisse, quod delatum accipere noluissem. A quo quum quaesisset, quo se deduci vellet, et ille, Athenas, dixisset; praesidium dedit, ut [eo] ⁴⁾ tuto perveniret. Neque vero id satis habuit, sed etiam, ut inviolatus in navem ascenderet, per Chabriam Atheniensem, de quo supra mentionem fecimus, effecit.
- 6 Abstinentiae erit hoc satis testimonium. Plurima quidem proferre possemus; sed modus adhibendus est, quoniam uno hoc volumine vitam ⁵⁾ excellentium virorum complurium concludere constituimus, quorum separatim multis millibus versuum complures scriptores ante nos explicarunt.

- V. Fuit etiam disertus, ut nemo ei Thebanus ⁶⁾ par esset eloquentia: neque minus concinnus in brevitate respondendi, quam in perpetua oratione ornatus. Habuit obtrectatorem Meneclidam quemdam, indidem Thebis, et adversarium in administranda republica, satis exercitatum in dicendo, ut Thebanum scilicet. Namque illi genti plus inest virium, quam ingenii. Is, quod in re militari florere Epaminondam videbat, hortari solebat Thebanos, ut

2) ita codd. Guelph. Ax. Dan. ed. Ultr. Heus. Bard. — alii: *te*, qui vel *tu*, *qui*. cf. ed. Heid. — 3) *quidem* vulgo deest. Bard. recepit e codd. Guelph. Ax. ed. Ultr. — 4) *eo* abest a codd. — 5) codd. Boeckl. Long. ed. Lamb. *vitae*. — mox vulgo male omittitur *complurium*. cf. Bard.

6) Ax. et Boeckl. *nemo ex Thebanis*, al. *nemo Thebanus*.

pacem bello anteferrent, ne illius imperatoris opera desideraretur. Huic ille, Fallis, inquit, verbo cives tuos, quod hos a bello avocas: otii enim nomine servitutem concilias. Nam paritur pax bello. Itaque 4 qui ea diutina volunt frui, bello exercitati esse debent. Quare si principes Graeciae esse vultis, castris est vobis utendum, non palaestra. Idem ille Meneclidas quum huic obilceret, quod liberos non haberet, neque uxorem duxisset; maximeque insolentiam, quod sibi Agamemnonis belli gloriam videretur consecutus: at, ille, desine, inquit, Meneclida, de uxore mihi exprobrare: nam nullius in ista re minus uti consilio voto. (Habebat enim Meneclidas suspicionem adulterii.) Quod autem me Agamemnonem 6 aemulari putas, falleris. Namque ille cum universa Graecia vix decem annis unam cepit urbem; ego contra ea 7) una urbe nostra dieque uno totam Graeciam, Lacedaemoniis fugatis, liberavi.

VI. Idem quum in conventum venisset Arcadum, 1 petens, ut societatem cum Thebanis et Argivis facerent: contraque Callistratus, Atheniensium legatus, qui eloquentia omnes eo praestabat tempore, postularet, ut potius amicitiam sequerentur Atticorum, et in oratione sua multa 8) in vectus esset in Thebanos et Argivos, in eisque hoc posuisset, animadvertere debere Arcadas, quales utraque civitas cives 2 procreasset, ex quibus de ceteris possent iudicare: Argivos enim fuisse Orestem et Alcmaeonem, matricidas, Thebis Oedipum natum, qui, quum patrem suum interfecisset, ex matre liberos procreasset: hic in respondendo Epaminondas, quum de ceteris 3 perorasset, postquam ad illa duo opprobria pervenit, admirari se dixit stultitiam rhetoris Attici, qui non

7) pronomen *ea* e eodd. Bard. restituit; in Ax. omittitur; vulgo *ex una urbe*.

8) decet haec vox in eodd. Axen. Boeckl. Voss. B.

animadverterit, innocentes illos natos domi⁹⁾, scelere admissio quum patria essent expulsi, receptos
 4 esse ab Atheniensibus. Sed maxime eius eloquentia eluxit Spartae, legati ante pugnam Leuctricam¹⁾. Quo quum omnium sociorum convenissent legati, coram frequentissimo legationum conventu sic Lacedaemoniorum tyrannidem coarguit, ut non minus illa oratione opes eorum concusserit, quam Leuctrica pugna. Tum enim perfecit, quod post apparuit, ut auxilio sociorum Lacedaemonii privarentur.

VII. Fuisse patientem suorumque iniurias ferentem civium, quod se patriae irasci nefas esse duceret, haec sunt testimonia. Quum eum propter invidiam cives praeficere exercitui noluissent, duxque esset delectus belli imperitus, cuius errore eo esset deducta res [militum]²⁾, ut omnes de salute pertimescerent, quod locorum angustiis clausi ab hostibus obsidebantur: desiderari coepta est Epaminondae diligentia. Erat enim ibi privatus numero militis. A quo quum peterent opem, nullam adhibuit memoriam contumeliae, et exercitum, obsidione
 3 liberatum, domum reduxit incolumem. Neque vero hoc semel fecit, sed saepius. Maxime autem fuit illustre, quum in³⁾ Peloponnesum exercitum duxisset adversus Lacedaemonios, haberetque collegas duos, quorum alter erat Pelopidas, vir fortis ac strenuus. Hi quum criminibus adversariorum omnes in invidiam venissent, ob eamque rem imperium his

9) Bard. alique ita interpungunt: *innocentes illos natos: domi scelere admissio*, quum cet. cf. ed. Heid. — 1) multae vett. edd. non habent ante pugnam Leuctricam; Heus. al. incluserunt.

2) ita Günth. Bard. ed. min. habent e fide cod. Voss. B. ed. Ultr. — Titz. omisit *militum*, quod probat Daehn.; Stav. et Bard. ed. mai. al. eo esset deducta illa multitudo militum. Lamb. al. deducta res illa militum. — 3) in deest in codd. Ax. Boeckl. Voss. B. cf. Daehn.

esset abrogatum, atque in eorum locum alii praetores successissent: Epaminondas populiscito non paruit, 4 idemque ut facerent, persuasit collegis, et bellum, quod susceperat, gessit. Namque animadvertibat, nisi id fecisset, totum exercitum propter praetorum imprudentiam inscientiamque belli periturum. Lex 5 erat Thebis, quae morte multabat, si quis imperium diutius retinuisset, quam lege praefinitum foret. Hanc Epaminondas quum reipublicae conservandae causa latam videret, ad perniciem civitatis conferre noluit; et quatuor mensibus diutius, quam populus iusserat, gessit imperium.

VIII. Postquam domum reditum est, collegae 1 eius hoc crimine accusabantur. Quibus ille permisit, ut omnem causam in se transferrent, suaque opera factum contenderent, ut legi non obedirent. Qua defensione illis periculo liberatis, nemo Epaminondam responsurum putabat, quod, quid 4) diceret, non haberet. At ille in iudicium venit: nihil eorum 2 negavit, quae adversarii crimini dabant, omniaque, quae collegae dixerant, confessus est, neque recusavit, quo minus legis poenam subiret; sed unum ab iis petivit, ut in periculo suo inscriberent: Epaminondas a Thebanis morte multatus est, quod eos coëgit apud Leuctra superare Lacedaemonios, quos ante se imperatorem nemo Boeotiorum ausus fuit adspicere in acie; quodque uno proelio non solum 4 Thebas ab interitu retraxit, sed etiam universam Graeciam in libertatem vindicavit, eoque res utrorumque perduxit, ut Thebani Spartam oppugnarent, Lacedaemonii satis haberent, si salvi esse possent; neque prius bellare destitit, quam Messena constituta 5 urbem eorum obsidione clausit. Haec quum dixisset, risus omnium cum hilaritate coortus est: neque quisquam iudex ausus est de eo ferre suffragium. Sic a iudicio capitis maxima discessit gloria.

4) Günth. *qui, quod.* cf. Daehn.

IX. Hic extremo tempore imperator apud Mantineam quum acie instructa audacius instaret hostes ⁵⁾ cognitus a Lacedaemoniis; quod in unius perniciem eius ⁶⁾ patriae sitam putabant salutem, universi in unum impetum fecerunt, neque prius abscesserunt, quam magna caede facta ⁷⁾ multisque occisis fortissime ipsum Epaminondam pugnantes, sparo eminua
 2 percussum, concidere viderunt. Huius casu aliquantum retardati sunt Boeotii; neque tamen prius pugna
 3 excesserunt, quam repugnantes profligarunt. At Epaminondas quum animadverteret, mortiferum se vulnus accepisse, simulque, si ferrum, quod ex hastili in corpore remanserat, extraxisset, animam statim emissurum: usque eo retinuit, quoad renuntiatum
 4 est, vicisse Boeotios. Id postquam audivit; satis, inquit, vixi: invictus enim morior. Tum ferro extracto confestim exanimatus est.

X. Hic uxorem numquam duxit. In quo quum reprehenderetur, quod liberos non relinqueret, a Pelopida, qui filium habebat infans, maleque eum
 2 in eo patriae consulere diceret: vide, inquit, ne tu peius consulas, qui talem ex te natum relicturus sis. Neque vero stirps mihi potest deesse. Namque ex me natam relinquo pugnam Leuctricam, quae non modo mihi superstes, sed etiam immortalis sit necesse est. Quo tempore, duce Pelopida, exsules
 3 Thebas occuparunt, et praesidium Lacedaemoniorum ex arce expulerunt, Epaminondas, quamdiu facta est caedes civium, domo ⁸⁾ se tenuit: quod neque malos defendere volebat, neque impugnare, ne manus suorum sanguine cruentaret. Namque omnem civilem

5) Codd. praeter Dan. habent *hostibus*, probat Daehn. —

6) Lamb. dedit *eius unius perniciem*. Deest *eius* in codd. Leid. B. Voss. B. — 7) *facta* deest in codd. plur. — omiserunt Titz. Daehn. cf. Brem.

8) Wetz. *domi* e quibusdam edd. vett.

victoriam funestam putabat. Idem, postquam apud Cadmeam cum Lacedaemoniis pugnari coeptum est ⁹⁾, in primis stetit. Huius de virtutibus vitaeque satis 4 erit dictum, si hoc unum adiunxero, quod nemo eat infitias, Thebas et ante Epaminondam natum, et post eius interitum, perpetuo alieno paruisse imperio; contra ea, quamdiu ille praefuerit reipublicae, caput fuisse totius Graeciae. Ex quo intelligi potest, unum hominem pluris, quam civitatem, fuisse.

XVI.

PELOPIDAS.

ARGUMENTUM.

Cap. I. Lacedaemonii Cadmeam, Thebarum arcem, occupant, summas potestates suis amicis dant, alios, in his Pelopidam, in exilium eiiciunt (383 a. Ch. n.). — II. Pelopidas, Athenis coniuratione facta, cum duodecim exulibus Thebas revertitur. — III. Interfectis tyrannis libertatem patriae restituit (378 a. Chr. n.). — IV. De propria Pelopidae laude aliisque cum Epaminondae communibus. — V. Contra Alexandrum Pheraeum pugnans cadit (364 a. Chr. n.).

I. PELOPIDAS, Thebanus, magis historicis, quam vulgo, notus. Cuius de virtutibus dubito quemadmodum exponam, quod vereor, ne ¹⁾, si res explicare incipiam, non vitam eius enarrare, sed historiam videar scribere; si tantummodo summas attigero, ne rudibus literarum Graecarum minus lucide appareat, quantus fuerit ille vir. Itaque utrique rei oc-

9) Dhn. *coepit*, non male; codd. Leid. B. Voss. A. *pugnare coepit*.

1) hanc particulam Lamb. primus addidit, codd. non agnoscunt. Heus. legit *ne non vitam cet.*

curram, quantum potuero ²⁾, et medebor quum
 2 satietati, tum ignorantiae lectorum. Phoebidas, Lacedaemonius, quum exercitum Olynthum duceret, iterque per Thebas faceret, arcem oppidi, quae Cadmea nominatur, occupavit impulsu perpaucorum Thebanorum, qui, adversariae factioni quo facilius resisterent, Laconum rebus studebant: idque suo
 3 privato, non publico, fecit consilio. Quo facto eum Lacedaemonij ab exercitu removerunt pecuniaque multarunt: neque eo magis arcem Thebanis reddiderunt, quod susceptis inimicitiis satius ducebant eos obsideri, quam liberari. Nam post Peloponnesium bellum Athenasque devictas cum Thebanis sibi rem esse existimabant, et eos esse solos, qui adversus
 4 resistere auderent. Hac mente amicis suis summas potestates dederant, alteriusque factionis principes partim interfecerant, alios in exilium eiecerant: in quibus Pelopidas hic, de quo scribere exorsi sumus, pulsus patria carebat.

II. Hi omnes fere Athenas se contulerant, non, quo sequerentur otium, sed ut, quemque ³⁾ ex proxime locum fors obtulisset, eo patriam recuperare
 2 niterentur. Itaque quum tempus est visum rei gerendae, communiter cum his, qui Thebis idem sentiebant, diem delegerunt ad inimicos opprimendos civitatemque liberandam eum, quo ⁴⁾ maximi
 3 magistratus simul consueverunt epulari. Magnae saepe res non ita magnis copiis sunt gestae; sed profecto numquam ab tam tenui initio tantae opes sunt profligatae. Nam duodecim adolescentuli coierunt ex his, qui exilio erant multati, quum omnino non essent amplius centum, qui tanto se offerrent periculo. Qua paucitate perculsa est Lacedaemoniorum

²⁾ vulgo *potero*, cf. Daehn.

³⁾ Lamb. *quemcunque*, cf. ed. Heid. — ⁴⁾ Ax. *quo die*, omisso pronomine *eum*. cf. Günth.

potentia. Hi enim non magis adversariorum factio- 4
ni, quam Spartanis, eo tempore bellum intulerunt,
qui principes erant totius Graeciae; quorum imperiū
maiestas, neque ita multo post, Leuctrica 5) pugna,
ab hoc initio perculsa 6), concidit. Illi igitur duo- 5
decim, quorum erat dux Pelopidas, quum Athenis
interdiu exissent, ut vesperscente coelo Thebas
possent pervenire, cum canibus venaticis exierunt;
retia ferentes, vestitu agresti, quo minore suspicione
facerent iter. Qui quum tempore ipso, quo studue-
rant, pervenissent, domum Charonis devenerunt, a
quo et tempus et dies erat datus.

III. Hoc loco libet interponere, etsi seiunctum 1
ab re proposita est, nimia fiducia quantae calamitati
soleat esse. Nam magistratum Thebanorum statim
ad aures pervenit, exules in urbem devenisse. Id
illi, vino epulisque dediti, usque eo despexerunt,
ut ne quaerere quidem de tanta re laborarint. Acces- 2
sit etiam, quod magis aperiret eorum dementiam.
Allata est enim epistola Athenis ab Archia [, hiero-
phante,] 7) uni ex his, Archiae, qui tum maximum
magistratum Thebis obtinebat, in qua omnia de pro-
fectione exsulum perscripta erant. Quae quum iam
accubanti in convivio esset data, sicut erat signata 8),
sub pulvinum subiiciens, in crastinum, inquit, dif-
fero res severas. At illi omnes, quum iam nox 3
processit, vinolenti ab exsulis, duce Pelopida,
sunt interfecti. Quibus rebus confectis, vulgo ad
arma libertatemque vocato, non solum qui in urbe
erant, sed etiam undique ex agris concurrerunt, prae-

5) ita codd. Guelph. Ax. Boeckl. Dan. — al. *post Leuctricam pugnam*. — 6) codd. *perculsa*, cf. Heus.

7) Bard. al. incluserunt ut per glossemam additum; codd. varia et diversa praebent. Ald. Rickl. Wetz. Titz. al. ediderunt: *ab Archia, hierophante, Archiae* etc., omissis vocibus *uni ex his*, quod placet. — 8) al. *sicut erat, signatam*. cf. Günth.

sidium Laeadaemoniorum ex arce pepulerunt, patriam obsidione liberaverunt, auctores Cadmeae occupandae partim occiderunt, partim in exsilium eiecerunt.

IV. Hoc tam turbido tempore, sicut supra docuimus, Epaminondas, quoad cum civibus dimicatum est, domi quietus fuit. Itaque haec liberandarum Thebarum propria laus est Pelopidae: ceterae fere
 2 omnes communes cum Epaminonda. Namque Leuctrica pugna, imperatore Epaminonda, hic fuit dux delectae manus, quae prima phalangem prostravit Laconum. Omnibus praeterea periculis affuit. Sicut
 3 Spartam quum oppugnavit, alterum tenuit cornu: quoque Messena celerius restitueretur, legatus in Persas est profectus. Denique haec fuit altera persona Thebis, sed tamen secunda ita, ut proxima esset Epaminondae.

V. Conflictatus autem est cum adversa fortuna. Nam et initio, sicut ostendimus, exsul patria caruit, et, quum Thessaliam in potestatem Thebanorum cuperet redigere, legationisque iure satis tectum se arbitraretur, quod apud omnes gentes sanctum esse consuesset, a tyranno Alexandro Pheraeo simul cum
 2 Ismenia comprehensus in vincula coniectus est. Hunc Epaminondas recuperavit, bello persequens Alexandrum. Post id factum numquam is animo placari potuit in eum, a quo erat violatus. Itaque persuasit Thebanis, ut subsidio Thessaliae proficiscerentur,
 3 tyrannosque eius expellerent. Cuius belli quum ei summa esset data, eoque cum exercitu profectus esset, non dubitavit, simul ac conspexit hostem,
 4 configere. In quo proelio Alexandrum ut animadvertit, incensus ira equum in eum concitavit, proculque digressus a ⁹⁾ suis coniectu telorum confossus concidit. Atque hoc secunda victoria accidit: nam

9) ita Günth. al. e codd. omnib. et vett. edd.; vulgo *degressus*, emendante Lambino.

iam inclinatae erant tyrannorum copiae. Quo facto 5 omnes Thessaliae civitates interfectum Pelopidam coronis aureis et statuīs aeneis, liberosque eius multo agro donarunt.

XVII.

A G E S I L A U S.

ARGUMENTUM.

Cap. I. Agesilaus cum fratris filio de honore regni contendit, Lysandro suffragante rex deligitur. — II. Ad bellum cum Artaxerxe rege gerendum in Asiam mittitur (396 a. Ch. n.). — III. Rem in Asia ita gerit, ut quovis certamine victor excedat. — IV. Domum revocatus Boeotios eorumque socios gravi proelio apud Coroneam vincit (394 a. Chr. n.). — V. Bello Corinthio victor commiseratur fortunam Graeciae. — VI. Ad pugnam Leutricam exercitum ducere recusat. Post hanc pugnam suo servat consilio Spartam. — VII. Ipse parva re domestica contentus, quibuscunque rebus potest, patriam iuvat. — VIII. Animi virtutibus excellit, maleficam nactus naturam in corpore fingendo. Vitae ratio. Ex Aegypto redux in Menelai portu moritur. (361 a. Chr. n.).

I. AGESILAUS, Lacedaemonius, quum a ceteris 1 scriptoribus, tum eximie a Xenophonte Socratico collaudatus est; eo enim usus est familiarissime. Hic 2 primum de regno cum Leotyichide, fratris filio, habuit contentionem. Mos est enim a maioribus Lacedaemoniis traditus, ut duos haberent semper reges, nomine magis, quam imperio, ex duabus familiis Procli et Eurysthenis, qui principes ex progenie Herculis Spartae reges fuerunt. Horum 1) ex altera 3

1) ita codd. Voss. A. B. Ax. Leid. B. — al. harum cf. Tzsch.

in alterius familiae locum fieri non licebat. Itaque utraque suum retinebat ordinem. Primum ratio habebatur, qui maximus natu esset ex liberis eius, qui regnans decessisset. Sin is virilem sexum non reliquisset, tum deligebatur 2), qui proximus esset propinquitate. Mortuus erat Agis rex, frater Agesilai. Filium reliquerat Leotychidem, quem ille natum 3) non agnorat, eundem moriens suum esse dixerat. Is de honore regni cum Agesilao, suo patruo, contendit: neque id, quod petivit, consecutus est. Nam Lysandro suffragante, homine, ut ostendimus supra, factioso et his temporibus potente, Agesilaus antelatus est.

II. Hic simul atque 4) imperii potitus est, persuasit Lacedaemoniis, ut exercitum emitterent in Asiam, bellumque regi facerent: docens, satius esse in Asia, quam in Europa dimicari 5). Namque fama exierat, Artaxerxem comparare classes pedestresque exercitus, quos in Graeciam mitteret. Data potestate, tanta celeritate usus est, ut prius in Asiam cum copiis pervenerit, quam regii satrapae eum scirent profectum. Quo factum est, ut omnes imparatos imprudentesque offenderet. Id ut cognovit Tissaphernes, qui summum imperium tum inter praefectos habebat regios, inducias a Lacone petivit, simulans, se dare operam, ut Lacedaemoniis cum rege conveniret; re autem vera ad copias comparandas: easque impetravit trimestres. Iuravit autem uterque, se sine dolo inducias conservaturum. In qua pactione summa fide mansit Agesilaus, contra ea Tissaphernes nihil aliud, quam bellum comparavit. Id etsi sentiebat Laco, tamen iusiurandum servabat,

2) al. *eligebatur* vid. Heus. — 3) ita eodd. Ax. Leid. Voss. Dan. — al. *vivens* vel *vivus*.

4) Ald. Longol. ac pro *atque*, cf. Heus. et Brem. — 5) al. *dimicare*, vid. Günth. et Bard.

multumque in eo se consequi dicebat, quod Tissaphernes periurio suo et homines suis rebus abalienaret, et deos sibi iratos redderet; se autem conservata religione confirmare exercitum, quum animadverteret, decorum humen facere secum, hominesque sibi conciliari ⁶⁾ amiciores, quod his studere consuessent, quos conservare fidem viderent.

III. Postquam induciarum praeteriit dies, barbarus, non dubitans, quod ipsius erant plurima domicilia in Caria, et ea regio his temporibus multo putabatur locupletissima, eo potissimum hostes impetum facturos, omnes suas copias eo contraxerat. At Agesilaus in Phrygiam se convertit, eamque prius ² depopulatus est, quam Tissaphernes usquam se moveret. Magna praeda militibus locupletatis, Ephesum hiematum exercitum reduxit, atque ibi officinis armorum institutis, magna industria bellum apparavit. Et quo studiosius armarentur insignisque ornarentur, praemia proposuit, quibus donarentur, quorum egregia in ea re fuisset industria. Fecit idem in exercitationum generibus, ut, qui ceteris praestitissent, eos magnis afficeret muneribus. His igitur rebus effecit, ut et ornatissimum et exercitatissimum haberet exercitum. Huic quum tempus esset visum, ⁴ copias extrahere ex hibernaculis, vidit, si, quo esset iter, facturus, palam pronuntiasset, hostes non credituros, aliasque regiones praesidiis occupaturos, nec dubituros, aliud ⁷⁾ esse facturum, ac pronuntiasset. Itaque quum ille Sardis iturum se dixisset, Tissa- ⁵ phernes eandem Cariam defendendam putavit. In quo quum eam opinio fefellisset, victumque se vidisset consilio; sero suis praesidio profectus est. Nam quum ille venisset, iam Agesilaus, multis locis ex-

6) plur. codd. *conciliare*; ed. Ulr. Longol. Heus. Bard. al. *conciliari*.

7) *Aten. eum aliud*. vid. Günth.

6 pugnatis, magna erat praeda potitus. Laco autem, quum videret, hostes equitatu superare, numquam in campo sui fecit potestatem, et his locis manum conseruit, quibus plus pedestres copiae valerent. Pepulit ergo, quotiescumque congressus est, multo maiores adversariorum copias, et sic in Asia versatus est, ut omnium opinione victor duceretur.

IV. Hic quum iam animo meditaretur proficisci in Persas, et ipsum regem adoriri, nuntius ei domo venit ephorum missu⁸⁾, bellum Athenienses et Boeotios indixisse Lacedaemoniis: quare venire ne dubitaret. In hoc non minus eius pietas suspicienda est, quam virtus bellica: qui, quum victori praeeset exercitui, maximamque haberet fiduciam regni Persarum potiundi, tanta modestia [dicto]⁹⁾ audiens fuit iussis absentium magistratum, ut si privatus in comitio esset Sparta. Cuius exemplum utinam imperatores nostri sequi voluissent! Sed illuc redeamus.

3 Agesilaus opulentissimo regno praeposuit bonam estimationem, multoque gloriosius duxit, si institutis patriae paruisset, quam si bello superasset Asiam.

4 Hac igitur mente Hellespontum copias traiecit, tantaque usus est celeritate, ut, quod iter Xerxes anno vertente confecerat, hic transierit triginta diebus.

5 Quum iam haud ita longe abesset a Peloponneso, obsistere ei conati sunt Athenienses et Boeotii, ceterique eorum socii, apud Coroneam: quos omnes

6 gravi proelio vicit. Huius victoriae vel maxima fuit laus, quod, quum plerique ex fuga se in templum Minervae coniecissent, quaerereturque ab eo, quid his fieri vellet, etsi aliquot vulnera acceperat eo proelio, et iratus videbatur omnibus, qui adversus arma tulerant, tamen antetulit irae religionem, et eos

7 vetuit violari. Neque vero hoc solum in Graecia

8) ita Ar. Guelph., al. *iussu*. v. Bos. — 9) unciis inclusi dicto, quod genuinum non putem. cf. ed. Heid.

fecit, ut templa deorum sancta haberet; sed etiam apud barbaros summa religione omnia simulacra arasque conservavit. Itaque praedicabat, mirari se, non 8 sacrilegorum numero haberi, qui supplicibus eorum nocuissent; aut non gravioribus poenis affici, qui religionem minuerent, quam qui fana spoliarent.

V. Post hoc proelium collatum est omne bellum 1 circa Corinthum, ideoque Corinthum est appellatum. Hic quum una pugna decem millia hostium, Agesilaus 2 duce, cecidissent, eoque facto opes adversariorum debilitatae viderentur: tantum abfuit ab insolentia gloriae, ut commiseratus sit fortunam Graeciae, quod tam multi a se victi vitio adversariorum concidissent: namque illa multitudine, si sana mens esset Graeciae, supplicium Persas dare potuisset. Idem 3 quum adversarios intra moenia compulisset, et, ut Corinthum oppugnaret, multi hortarentur, negavit, id suae virtuti convenire: se enim eum esse dixit, qui ad officium peccantes redire cogeret, non, qui urbes nobilissimas expugnaret Graeciae. Nam si, 4 inquit, eos extinguere voluerimus, qui nobiscum adversus barbaros steterunt, nosmetipsi nos expugnaverimus, illis quiescentibus. Quo facto sine negotio, quum voluerint, nos oppriment.

VI. Interim accidit illa calamitas apud Leuctra 1 Lacedaemoniis: quo ne proficisceretur, quum a plerisque ad exeundum premeretur, ut si de exitu divinaret, exire noluit. Idem, quum Epaminondas Spartam oppugnaret, essetque sine muris oppidum, talem se imperatorem prae-buit, ut eo tempore omnibus apparuerit, nisi ille fuisset, Spartam futuram non fuisse. In quo quidem discrimine celeritas eius consilii saluti 2 fuit universis. Nam quum quidam adolescentuli, hostium adventu perterriti, ad Thebanos transfugere vellent, et locum extra urbem editum cepissent: Agesilaus, qui perniciosissimum fore videret, si animadversum esset, quemquam ad hostes transfu-

gere conari, cum suis eo venit, atque, ut si bono animo fecissent, laudavit consilium eorum, quod eum locum occupassent, et se id quoque ¹⁾ fieri debere animadvertisse. Sic adolescentulos simulata laudatione recuperavit, et adiunctis de suis comitibus locum tutum reliquit. Namque illi, aucto ²⁾ numero eorum, qui expertes erant consilii, commovere se non sunt ausi, eoque libentius, quod latere arbitrabantur, quae cogitarent.

VII. Sine dubio post Leuctricam pugnam Lacedaemonii se numquam refecerunt, neque pristinum imperium recuperarunt: quam interim Agesilaus non destitit, quibuscumque rebus posset, patriam iuvare.

2 Nam quum praecipue Lacedaemonii indigerent pecunia, ille omnibus, qui a rege defecerant, praesidio fuit: a quibus magna donatus pecunia patriam sublevavit. Atque in hoc illud imprimis fuit admirabile, quum maxima munera ei ab regibus, et dynastis, civitatibusque conferrentur, quod nihil umquam [in] ³⁾ domum suam contulit, nihil de victu, nihil de vestitu

4 Laconum mutavit. Domo eadem fuit contentus, qua Eurysthenes, progenitor maiorum suorum, fuerat usus: quam qui intrarat, nullum signum libidinis, nullum luxuriae videre poterat; contra ea plurima patientiae atque abstinentiae. Sic enim erat instructa, ut nulla in re differret cuiusvis ⁴⁾ inopis atque privati.

VIII. Atque hic tantus vir, ut naturam fautricem habuerat in tribuendis animi virtutibus, sic maleficam nactus est in corpore fingendo. Nam et statura fuit humili, et corpore exiguo, et claudus altero pede. Quae res etiam nonnullam afferebat

1) Günth. *et se quoque id*; Lamb. omisit *se*. — 2) Bosio placuit *aucti*, cf. ed. Heid.

3) deest praepositio in plurimis codd., tuentur eam edd. Bongol. Ald. al. — 4) ita codd. Guelph. Voss. A. B. et optimae vett. edd. cf. Bard. ibique Lamb. et Mosche. — Brem. al. a cuiusvis. — Ax. al. cuius cf. Heus.

deformitatem: atque ignoti, faciem eius quum intue-
rentur, contemnebant; qui autem virtutes noverant,
non poterant admirari satis. Quod ei usu venit, a
quum annorum octoginta subsidio Tacho in Aegyptum
isset, et in acta cum suis accubisset sine ullo tecto;
stratumque haberet tale, ut terra tecta esset stra-
mentis, neque huc amplius, quam pellis esset inie-
cta; eodemque comites omnes accubuissent vestitu
humili atque obsoleto, ut eorum ornatus non modo
in his regem neminem significaret, sed hominis non
beatissimi suspicionem praeberet. Huius de adventu 3
fama quum ad regios esset perlata, celeriter munera
eo cuiusque generis sunt allata. His quaerentibus
Agesilaum vix fides facta est, unum esse ex his, qui
tum accubabant. Qui quum regis verbis, quae attu- 4
lerant, dedissent, ille praeter vitulina et huiusmodi
genera opsonii, quae praesens tempus desiderabat,
nihil accepit; unguenta, coronas, secundamque men-
sam servis dispertiit; cetera referri iussit. Quo facto 5
eum barbari magis etiam contemserunt, quod eum
ignorantia bonarum rerum illa potissimum sumsisse
arbitrabantur. Hic quum ex Aegypto reverteretur, 6
donatus a rege Nectanabide ducentis viginti talentis,
quae ille muneri populo suo daret, venissetque in
portum, qui Menelai vocatur iacens inter Cyrenas
et Aegyptum, in morbum implicitus decessit. Ibi 7
eum amici, quo Spartam facilius perferre possent,
quod mel non habebant, cera circumfuderunt, atque
ita domum retulerunt.

XVIII.

EUMENES.

ARGUMENTUM.

Cap. I. Eumenis officia apud Philippum Macedontae regem filiumque eius Alexandrum. — II. Alexandro mortuo Cappadociam sortitur provinciam. Carus est Perdiccae et fidus. — III. A Perdicca oppositus Europaeis adversariis, deviis itineribus milites suos fallit, ut, contra quos ducerentur, resciscere non possint. — IV. Craterum et Neptolemum vincit. (321. a. Ch. n.). — V. Perdicca interfecto, Antipatro summam imperii tenente, Eumenem absentem capitis damnant, bello persequuntur. Obsessus in castello Nora se suosque liberat. — VI. Olympiadi liberisque Alexandri bene consulit. — VII. Bellum parat adversus Antigonom nomine Alexandri (317 a. Chr. n.). — VIII. Antigoni victor cogitur a militibus copias biematum dividere. Antigonus in hibernaculis hostem vult aggredi. — IX. Consilio callido Antigoni refrenat impetum. — X. A militibus proditus Antigono traditur. — XI. Impatiens morae, qua Antigonus eum servare tentat, supplicium flagitat. — XII. Fame fatigatus a custodibus occiditur (316 a. Chr. n.). — XIII. Quanta fuerit Eumenis auctoritas, post mortem eius luculenter apparuit.

I. EUMENES, Cardianus. Huius si virtuti par data esset fortuna, non ille quidem maior, sed multo illustrior atque etiam honoratior ⁵⁾: quod magnos homines virtute metimur, non fortuna. Nam quum aetas eius incidisset in ea tempora, quibus Macedones florere, multum ei detraxit inter hos viventi, quod alienae erat civitatis; neque aliud huic defuit, quam generosa stirps. Etsi ille domestico summo genere erat: tamen Macedones eum sibi aliquando anteponi indigne ferebant; neque tamen non patiebantur. Vincebat enim omnes cura, vigilantia, pa-

5) Lamb. contra bodd. fidem addidit *fuisse*.

tientia, calliditate et celeritate ingenii. Hic perado- 4
 lescentulus ad amicitiam accessit Philippi, Amyntae
 filii, brevique tempore in intimam pervenit familia-
 ritatem. Fulgebat enim iam in adolescentulo indoles
 virtutis. Itaque eum habuit ad manum scribae loco: 5
 quod multo apud Graios honorificentius est, quam
 apud Romanos. Nam apud nos, revera sicut sunt,
 mercenarii scribae existimantur; at apud illos e con-
 trario ⁶⁾ nemq. ad id officium admittitur, nisi hone-
 sto loco, et fide et industria cognita: quod necesse
 est omnium consiliorum eum esse participem. Hunc 6
 locum tenuit amicitiae apud Philippum annos septem.
 Illo interfecto, eodem gradu fuit apud Alexandrum
 annos tredecim. Novissimo tempore praefuit etiam 7
 alterae ⁷⁾ equitum alae, quae Hetaerice appellabatur.
 Utrique autem in consilio semper affuit, et omnium
 rerum habitus est particeps.

II. Alexandro Babylone mortuo, quum regna 1
 singulis familiaribus dispertirentur, et summa rerum
 tradita esset tuenda eidem, cui Alexander moriens
 annulum suum dederat, Perdiccae: ex quo omnes 2
 coniecerant, eum regnum ei commendasse, quoad
 liberi eius in suam tutelam pervenissent: (aberrant
 enim Craterus et Antipater, qui antecedere hunc
 videbantur: mortuus erat Hephaestio, quem unum
 Alexander, quod facile intelligi posset, plurimi fece-
 rat); hoc tempore data est Eumeni Cappadocia, sive
 potius dicta. Nam tum in hostium erat potestate.
 Hunc sibi Perdiccas adiunxerat magno studio, quod 3
 in homine fidem et industriam magnam videbat: non
 dubitans, si eum pellexisset, magno usui fore sibi
 in his rebus, quas apparabat. Cogitabat enim, quod
 fere omnes in magnis imperiis concupiscunt, omnium
 partes corripere atque complecti. Neque vero hoc 4

6) codd. praeter Leid. *contrario*, ommissa praepositione,
 at. cf. Bard. — 7) ita codd.; vett. edd. *alteri*, cf. Stav.

ille solus fecit, sed ceteri quoque omnes, qui Alexandri fuerant amici. Primus Leonnatus Macedoniam praeoccupare destinaverat. Hic multis magnisque pollicitationibus persuadere Eumeni studuit, ut Perdiccam desereret, ac secum faceret societatem. Quum perducere eum non posset, interficere conatus est; et fecisset, nisi ille clam noctu ex praesidiis eius effugisset.

- III. Interim conflata sunt illa bella, quae ad internecionem post Alexandri mortem gesta sunt, omnesque concurrerunt ad Perdiccam opprimendum. Quem etsi infirmum videbat, quod unus omnibus resistere cogeatur, tamen amicum non deseruit, neque salutis, quam fidei, fuit cupidior. Praefecerat eum Perdiccas ei parti Asiae, quae inter Taurum montem iacet atque Hellespontum, et illum unum opposuerat Europaeis adversariis; ipse Aegyptum oppugnatam adversus Ptolemaeum erat profectus.
- 3 Eumenes quum neque magnas copias, neque firmas haberet, quod et inexercitatae, et non multo ante erant contractae; adventare autem dicerentur Hellespontumque transisse Antipater et Craterus magno cum exercitu Macedonum, viri quum claritate, tum
- 4 usu belli praestantes: (Macedones vero milites ea tunc erant fama, qua nunc Romani feruntur; etenim semper habiti sunt fortissimi, qui summam ⁸⁾ imperii potirentur): Eumenes intelligebat, si copiae suae cognoscerent ⁹⁾, adversus quos ducerentur, non modo non ituras, sed simul cum nuntio dilapsuras.
- 5 Itaque hoc eius fuit prudentissimum consilium, ut devii itineribus milites duceret, in quibus vera audire non possent, et his persuaderet, se contra quos-
- 6 dam barbaros proficisci. Itaque tenuit hoc proposi-

8) ita opt. et plurimi codd. — al. *summa*; cf. Stav. —

9) ita codd. Voss. A. B. Leid. B.; al. *cognoscent*. At vid. ed. Heid.

tum, et prius in aciem exercitum eduxit proeliumque commisit, quam milites sui scirent, cum quibus arma conferrent. Effecit etiam illud locorum praeoccupatione, ut equitatu potius dimicaret, quo plus valebat, quam peditatu, quo erat deterior.

IV. Quorum acerrimo concursu quum magnam 1 partem diei esset pugnatum ¹⁾, cadit Craterus dux, et Neoptolemus, qui secundum locum imperii tenebat. Cum hoc concurrat ipse Eumenes. Qui quum 2 inter se complexi in terram ex equis decidissent, ut facile intelligi posset, inimica mente contendisse, animoque magis etiam pugnasse, quam corpore, non prius distracti sunt, quam alterum anima reliquerit. Ab hoc aliquot plagis Eumenes vulneratur, neque eo magis ex proelio excessit, sed acrius hostes ²⁾ institit. Hic equitibus profligatis, interfecto duce Cratero, 3 multis praeterea et maxime nobilibus captis, pedester exercitus, quod in ea loca erat deductus, ut invito Eumene elabi non posset, pacem ab eo petiit. Quam quum impetrasset, in fide non mansit, et se, simul ac potuit, ad Antipatrum recepit. Eumenes Cra- 4 terum, ex acie semivivum elatum, recreare studuit. Quum id non posset, pro hominis dignitate, proque pristina amicitia (namque illo usus erat, Alexandro vivo, familiariter) amplo funere extulit, ossaque in Macedoniam uxori eius ac liberis remisit.

V. Haec dum apud Hellespontum geruntur, Per- 1 diccas apud flumen Nilum interficitur a Seleuco et Antigono; rerumque summa ad Antipatrum defertur. Hic, qui deseruerant, exercitu suffragium ferente, capitis absentes damnantur: in his Eumenes. Hac ille percussus ³⁾ plaga non succubuit, neque eo secius

1) Ax. Guelph. Voss. Leid. B. Boeckl. *oppugnatum*. cf. Hens.

2) cod. Gif. Guelph. *hostis*. — Ax. Voss. A. al. *hostibus*.

3) vulgo *percussus*, quod probat Günth., at cf. Brem. et Daehn.

bellum administravit. Sed exiles res animi magnitudinem, etsi non frangebant, tamen minuebant. Hunc persequens Antigonus, quum omni genere copiarum abundaret, saepe in itineribus vexabatur: neque umquam ad manum accedere licebat, nisi his locis, quibus pauci multis possent resistere. Sed extremo tempore, quum consilio capi non posset, multitudine circumventus est. Hinc tamen, multis suis amissis, se expedivit, et in castellum Phrygiae, quod Nora appellatur, confugit. In quo quum circum sederetur, et vereretur, ne uno loco manens equos militares perderet, quod spatium non esset agitandi: callidum fuit eius inventum, quemadmodum stans iumentum concalefieri exerceique posset, quo libentius et cibo uteretur, et a corporis motu non removeretur. Substringebat caput loro altius, quam ut prioribus pedibus plane terram posset attingere; deinde post ⁴⁾ verberibus cogebat exultare, et calces remittere. Qui motus non minus sudorem excutiebat, quam si in spatio decurreret. Quo factum est, quod omnibus mirabile est visum, ut aequae iumenta nitida ex castello educeret, quum complures menses in obsidione fuisset, ac si in campestribus ea locis habuisset. In hac conclusione, quotiescumque voluit, apparatum et munitiones Antigoni alias incendit, alias disiecit. Tenuit autem se uno loco, quamdiu fuit hiems. Sed ⁵⁾ quod castrum subsidia habere non poterat, et ver appropinquabat, simulata deditione, dum de conditionibus tractat, praefectis Antigoni imposuit, seque ac suos omnes extraxit incolumes.

VI. At hunc Olympias, mater quae fuerat Alexandri, quum literas et nuncios misisset in Asiam,

4) Leid. B. Voss. A. *posterioribus*, *omisso verberibus*; quare emendarunt qdd. *posterioribus verberibus*. cf. ed. Heid. — 5) vulgo *sed* omittitur; tuetur particulam cod. Ernst. atque ed. Brem. Tzsch. Günth. Rickl. al. Codd. et edd. mire variant. cf. Bard. et Daehn.

consultum, utrum repetitum Macedoniam 6) veniret
 (nam tum in Epiro habitabat) et eas res occuparet:
 huic ille primum suasit, ne se moveret, et expecta- 2
 ret, quoad Alexandri filius regnum adipisceretur;
 sin aliqua cupiditate raperetur in Macedoniam,
 omnium iniuriarum oblivisceretur, et in neminem
 acerbiorē uteretur imperio. Horum illa nihil fecit. 3
 Nam et in Macedoniam profecta est, et ibi crude-
 lissime se gessit. Petiit autem ab Eumene absente,
 ne pateretur, Philippi domus et familiae inimicissi-
 mos stirpem quoque interimere 7), ferretque opem
 liberis Alexandri. Quam veniam si daret, quam pri- 4
 mum exercitus pararet, quos sibi subsidio adduceret.
 Id quo facilius faceret, se omnibus praefectis, qui
 in officio manebant, misisse literas, ut ei parerent,
 eiusque consiliis uterentur. His rebus Eumenes per- 5
 motus satius duxit, si ita tulisset fortuna, perire
 bene meritis referentem gratiam, quam ingratum
 vivere.

VII. Itaque copias contraxit, bellum adversus 1
 Antigonum comparavit. Quod una erant Macedones
 complures nobiles, in his Peucestes, qui corporis
 custos fuerat Alexandri, tum autem obtinebat Persi-
 dem, et Antigenes, cuius sub imperio phalanx erat
 Macedonum; invidiam verens, (quam tamen effugere
 non potuit,) si potius ipse alienigena summi imperii
 potiretur, quam alii 8) Macedonum, quorum ibi erat
 multitudo: in principiis nomine Alexandri statuit ta- 2
 bernaculum, in eoque sellam auream cum sceptro
 ac diademate iussit poni, eoque omnes quotidie con-
 venire, ut ibi de summis rebus consilia caperentur;

6) Ax. Guelph. al. *utrum repetitum in Macedoniam*
ven. edd. Longol. Ald. al. *utrum repetitam in Maced. ven.*
 cf. Daehn. — 7) eod. Ernst. edd. Longol. Titz. *umicissimos*
interire, omissis *vv. stirpem quoque*. Nostra scriptura
 defenditur codd. Guelph. Boecl. Mend. Voss. al.

8) Titz. *quam aliquis Maced.*

credens, minore se invidia fore, si specie imperii nominisque simulatione Alexandri bellum videretur
 3 administrare. Quod et fecit. Nam quum non ad Eumenis principia, sed ad regia conveniretur, atque ibi de rebus deliberaretur, quodammodo latebat, quum tamen per eum unum gererentur omnia.

VIII. Hic in Paraetacis cum Antigono confligit, non acie instructa, sed in itinere: eumque male acceptum in Mediam hiematum coëgit redire. Ipse in finitima regione Persidis hiematum copias divisit,
 2 non ut voluit, sed ut militum cogebat voluntas. Namque illa phalanx Alexandri Magni, quae Asiam peragrarat diviceratque Persas, inveterata quum gloria, tum etiam licentia, non parere se ducibus, sed imperare postulabat; ut nunc veterani faciunt nostri. Itaque periculum est, ne faciant, quod illi fecerunt sua intemperantia nimiaque licentia, ut omnia perdant, neque minus eos, cum quibus steterint, quam
 3 adversus quos fecerint. Quod si quis illorum veteranorum legat facta, paria horum cognoscat, neque rem ullam, nisi tempus, interesse iudicet. Sed ad illos revertar. Hiberna sumserant non ad usum belli, sed ad ipsorum luxuriam, longeque inter se disces-
 4 serant ⁹⁾. Hoc Antigonus quum comperisset, intel- ligeretque se parem non esse paratis adversariis, statuit aliquid sibi consilii novi esse capiendum. Duae erant viae, qua ex Medis, ubi ille hiemabat,
 5 ad adversariorum hibernacula posset perveniri. Quarum brevior per loca deserta, quae nemo incolebat propter aquae inopiam, ceterum dierum erat fere decem; illa autem, qua omnes commeabant, altero tanto longiorem habebat anfractum, sed erat copiosa
 6 omniumque rerum abundans. Hac si proficisceretur, intelligebat, prius adversarios rescituros de suo ad-

9) codd. omnes *dissenferant*. Lamb. emendationi debetur *discesserant*.

ventu, quam ipse tertiam partem consecisset itineris; sin per loca sola contenderet, sperabat, se imprudentem hostem oppressurum. Ad hanc rem conficiendam imperavit quam plurimos utres atque etiam culleos comparari; post haec pabulum; praeterea cibaria cocta dierum decem, ut ¹⁾ quam minime fieret ignis in castris. Iter, quod habebat, omnes celat. Sic paratus, qua constituerat, proficiscitur.

IX. Dimidium fere spatium confecerat, quum ex fumo castrorum eius suspicio allata est ad Eumenem, hostem appropinquare. Conveniunt duces; quaeritur, quid opus sit facto. Intelligebant omnes, tam celeriter copias ipsorum contrahi non posse, quam Antigonus affuturus videbatur. Hic omnibus titubantibus, et de rebus summis desperantibus, Eumenes ait, si celeritatem velint adhibere, et imperata facere, quod ante non fecerint, se rem expediturum. Nam quod diebus quinque hostis transisse posset, se effecturum, ut non minus totidem dierum spatio retardaretur: quare circumirent, suasque quisque ²⁾ copias contraheret. Ad Antigoni autem refrenandum impetum tale capit consilium. Certos mittit homines ad infimos montes, qui obvii erant itineri adversariorum, hisque praecipit ³⁾, ut prima nocte, quam latissime possint, ignes faciant quam maximos, atque secunda vigilia minuant, tertia perexiguos reddant: et assimulata castrorum consuetudine suspicionem iniiciant hostibus, his locis esse castra, ac de eorum adventu esse praenuntiatum; idemque postera nocte faciant. Quibus imperatum erat, diligenter praecipum curant. Antigonus, tenebris obortis, ignes conspicatur: credit, de suo adventu esse auditum, et

1) ante Bremium vulgo: *utque quam minime*. Deest *que* in codd. Guelph. Ax. Leid. B. Voss. A. B. cf. Brem. — 2) vulgo *suas quisque* cf. Bard. — 3) ita ex emendatione Lamb. Brem. Tzsch. — codd. omnes *praecepit*.

6 adversarios illuc suas contraxisse copias. Mutat consilium, et, quoniam imprudentes adoriri non posset, flectit iter suum, et illum anfractum longiorem copiosae viae capit, ibique diem unum opperitur ad lassitudinem sedandam militum ac reficienda iumenta, quo integriore exercitu decerneret.

X. Sic 4) Eumenes callidum imperatorem vicit consilio, celeritatemque impedivit eius; neque tamen
 2 multum profecit. Nam invidia ducum, cum quibus erat, perfidiaque Macedonum veteranorum, quum superior proelio discessisset, Antigono est deditus, quum exercitus ei ter ante separatis temporibus iurasset, se eum defensurum, nec umquam deserturum. Sed tanta fuit nonnullorum virtutis obtrectatio, ut fidem amittere mallent, quam eum non prodere.
 3 Atque hunc Antigonus, quum ei fuisset infestissimus, conservasset, si per suos esset licitum, quod ab nullo se plus adiuvari posse intelligebat in his rebus, quas impendere iam apparebat omnibus. (Imminebant enim Seleucus, Lysimachus, Ptolemaeus, opibus iam valentes, cum quibus ei de summis rebus erat dimicandum.)
 4 Sed non passi sunt hi, qui circa erant: quod videbant, Eumene recepto, omnes prae illo parvi futuros. Ipse autem Antigonus adeo erat incensus, ut, nisi magna spe maximarum rerum, leniri non posset.

XI. Itaque quum eum in custodiam dedisset, et praefectus custodum quaesisset, quemadmodum servari vellet? ut acerrimum, inquit, leonem, aut ferocissimum elephantum. Nondum enim statuerat, con-
 2 servaret eum, nec ne. Veniebat autem ad Eumenem utrumque genus hominum: et qui propter odium fructum oculis ex eius casu capere vellent, et qui propter veterem amicitiam colloqui consolarique cu-

4) Ita ex emend. Heus. Brem. Rickl. Günth. receperunt. — Al. *Hic Eumenes*. cf. ed. Heid.

perent; multi etiam, qui eius formam cognoscere studebant, qualis esset, quem tamdiu tamque valde timuissent, cuius in pernicie positam spem habuissent victoriae. At Eumenes, quum diutius in vinculis 3 esset, ait Onomarcho, penes quem summa imperii erat custodiae, se mirari, quare iam tertium diem sic teneretur: non enim hoc convenire Antigoni prudentiae, ut sic se uteretur 5) victo; quin aut interfici, aut missum fieri iuberet. Hic quum ferocius 4 Onomarcho loqui videretur, quid? tu, inquit, animo si isto eras, cur non in proelio cecidisti potius, quam in potestatem inimici venires? Huic Eumenes, uti- 5 nam quidem istud evenisset! sed eo non accidit, quod numquam cum fortiore sum congressus. Non enim cum quoquam arma contuli, quin is mihi succubuerit. Non enim virtute hostium, sed amicorum perfidia decidi. [Neque id falsum. Nam et dignitate fuit honesta, et viribus ad laborem ferendum firmis, neque tam magno corpore, quam figura venusta.]

XII. De hoc Antigonus quum solus constituere 1 non auderet, ad consilium retulit. Hic quum 6) primo perturbati admirarentur, non iam de eo sumtum esse supplicium, a quo tot annos adeo essent male habiti, ut saepe ad desperationem forent adducti; quique maximos duces interfecisset; denique in quo uno 2 esset tantum, ut, quoad ille viveret, ipsi securi esse non possent, interfecto, nihil habituri negotii essent: postremo si illi redderet salutem, quaerebant, quibus amicis esset usurus? sese enim cum Eumene apud eum non futuros. Hic, cognita consilii voluntate, tamen usque ad septimum diem deliberandi 7) sibi spatium reliquit. Tum autem, quum iam vere-

5) vulgo *deuteretur*, omissis pronomine *se*. Nostram scripturam iam Lamb. receperat, atque legitur eadem in cod. Voss. B. cf. ed. Heid.

6) Cod. Voss. B. addit: *plerique omnes*, quod Lamb. Brem. Daehn. al. receperunt. — 7) Ax. Boeckl. Voss. B. *deliberando*.

retur, ut qua seditio exercitus oriretur, vetuit ad eum quemquam admitti, et quotidianum victum amoveri iussit. Nam negabat, se ei vim allaturum, qui
 4 aliquando fuisset amicus. Hic tamen non amplius, quam triduum, fame fatigatus, quum castra moverentur, insciente Antigono, iugulatus est a custodibus.

XIII. Sic Eumenes amorum quinque et quadraginta, quum ab anno vicesimo, ut supra ostendimus, septem annos Philippo apparuisset, et tredecim apud Alexandrum eundem locum obtinuisset, in his unum⁸⁾ equitum alae praefuisset, post autem Alexandri Magni mortem imperator exercitus duxisset, summosque duces partim repulisset, partim interfecisset, captus non Antigoni virtute, sed Macedonum periurio, talem
 2 habuit exitum vitae. In quo quanta fuerit omnium opinio eorum, qui post Alexandrum Magnum reges sunt appellati, ex hoc facillime potest iudicari, quod nemo, Eumene vivo, rex appellatus est, sed prae-
 3 fectus; iidem post huius occasum statim regium ornatum nomenque sumserunt, neque, quod initio praedicarant, se Alexandri liberis regnum servare, praestare voluerunt, et, uno propugnatore sublato, quid sentirent, aperuerunt. Huius sceleris principes fuerunt Antigonus, Ptolemaeus, Seleucus, Lysimachus, Cassander. Antigonus autem Eumenem mortuum propinquis eius sepeliendum tradidit. Hi militari honesto funere, comitante toto exercitu, humaverunt, ossaque eius in Cappadociam ad matrem atque uxorem liberosque eius deportanda curarunt.

8) ita eodd. Guelph. Voss. B. Leid. B. — olim vulgo uni.

XIX.

P H O C I O N .

ARGUMENTUM.

Cap. I. Phocion vitae integritate notior est quam rei militaris labore; cognomine *Bonus* est appellatus. — II. Senex in odium civium pervenit. Eius culpa Nicanor Piraeo potitur. — III. Patria pulsus, causa apud Macedones dicta, Athenas deducitur. — IV. Hic legitimis quibusdam confectis ad supplicium traditur (318 a. Chr. n.).

I. PHOCION, Atheniensis, etsi saepe exercitibus praefuit summosque magistratus cepit, tamen multo eius notior integritas vitae, quam rei militaris labor. Itaque huius memoria est nulla, illius autem magna fama: ex quo cognomine *Bonus* est appellatus. Fuit enim perpetuo pauper, quum divitissimus esse posset propter frequentes delatos honores potestatesque summas, quae ei a populo dabantur. Hic quum a 3 rege Philippo munera magnae pecuniae repudiaret, legatique hortarentur accipere, simulque admonerent, si ipse his facile careret, liberis tamen suis prospiceret, quibus difficile esset in summa paupertate tantam paternam tueri gloriam: his ille, si mei similes 4 erunt, idem hic, inquit, agellus illos alet, qui me ad hanc dignitatem perduxit; sin dissimiles sunt futuri, nolo meis impensis illorum ali augerique luxuriam.

II. Idem quum prope ad annum octogesimum prospera pervenisset ⁹⁾ fortuna, extremis temporibus magnum in odium pervenit suorum civium. Primo, 2 quod cum Demade de urbe tradenda Antipatro con-

9) Lamb. *mansisset*, al. *permansisset*. Ante Heusing. etiam initio capitis pro *Idem* vulgo legebatur *Eidem*, quod est in codd. Ar. Guelph. ed. Ult. al.

- senserat; eiusque consilio Demosthenes cum ceteris, qui bene de republica meriti existimabantur, populiscito in exilium erant expulsi. Neque in eo solum offenderat, quod patriae male consuluerat, sed etiam,
- 3 quod amicitiae fidem non praestiterat. Namque auctus adiutusque a Demosthene eum, quem tenebat, adscenderat gradum, quum adversus Charetem eum subornaret: ab eodem in iudiciis, quum capitis causam diceret, defensus aliquoties, liberatus discesserat. Hunc
- 4 non solum in periculis non defendit sed etiam prodidit. Concidit autem maxime uno crimine, quod ¹⁾, quum apud eum summum esset imperium populi, et, Nicanorem, Cassandri praefectum, insidiari Piraeo Atheniensium, a Dercyllo moneretur, idemque postularet, ut provideret, ne commeatibus civitas privaretur, huic, audiente populo, Phocion negavit esse periculum, se-
- 5 que eius rei obsidem fore pollicitus est. Neque ita multo post Nicanor Piraeo est potitus. Ad quem recuperandum quum populus armatus concurrisset, ille non modo neminem ad arma vocavit, sed ne armatis quidem pracesse voluit. [Sine quo Athenae omnino esse non possunt.] ²⁾

III. Erant eo tempore Athenis duae factiones, quarum una populi causam agebat, altera optimatum. In hac erat Phocion et Demetrius Phalereus. Harum utraque Macedonum patrociniis nitebatur. ³⁾ Nam populares Polysperchonti favebant; optimates cum

2 Cassandro sentiebant. Interim a Polysperchonte Cassander Macedonia pulsus est. Quo facto populus superior factus statim duces adversariae factionis capitis damnatos patria pepulit; in his Phocionem et Demetrium Phalereum: deque ea re legatos ad Po-

1) *quod* deest in omnibus codd. excepto Leid. A., Heus. et Daehn. incluserunt. — 2) caret his verbis cod. Voss. B., transferenda sunt post verba *est potitus*.

3) Ax. Guelph. Leid. Voss. A. B. edd. Ult. Longol. *utebatur*. cf. Daehn.

lysperchontem misit, qui ab eo peterent, ut sua decreta confirmaret. Huc ⁴⁾ eodem profectus est Phocion. Quo ut venit, causam apud Philippum regem verbo, re ipsa quidem apud Polysperchontem iussus est dicere: namque is tum regis rebus praeerat. Hic ab Agnonide accusatus, quod Piraeum Nicanori ⁵⁾ prodidisset, exconsilii sententia in custodiam coniectus, Athenas deductus est, ut ibi de eo legibus fieret iudicium.

IV. Huc ubi perventum est, quum propter aetatem ⁶⁾ pedibus iam non valeret, vehiculoque portaretur, magni concursus sunt facti, quum alii, reminiscentes veteris famae, aetatis misererentur; plurimi vero ira exaceruerentur propter prodicionem Piraei, maximeque, quod adversus populi commoda in senectute steterat. Qua de re ne perorandi quidem ei data est facultas et dicendi causam. Inde iudicio, legitimis quibusdam confectis, damnatus, traditus est undecim viris, quibus ad supplicium more Atheniensium publice damnati tradi solent. Hic quum ad mortem duceretur, obuius ei ³ fuit Euphyletus ⁷⁾, quo familiariter fuerat usus. Is quum lacrimans dixisset: o quam indigna perpeteris, Phocion! huic ille, at non inopinata, inquit: hunc enim exitum plerique clari viri habuerunt Athenienses. In hoc tantum fuit odium multitudinis, ut nemo ⁴ ausus sit eum liber sepelire. Itaque a servis sepultus est.

4) codd. *hoc*; ed. Longol. Titz. *hinc*. — 5) deest in cod. Gif. *Nicanori*.

6) cod. Ax. *per aetatem*. — 7) ita Voss. A., vulgo *Emphyletus*. cf. ed. Heid.

XX.

T I M O L E O N.

ARGUMENTUM.

Cap. I. Timoleon ad patriam tyrannide liberandam fratrem tyrannum interficiendum curat. — II. Syracusanis auxilio missus (345 a. Chr.), Dionysium vincit (343. a. Chr.) et Carthaginienses tota Sicilia expellit (339 a. Chr.) — III. Libertate Syracusanorum restituta, privatus Syracusis vivit. — IV. Oculis captus reipublicae inservire non desistit. Modestiae et pietatis exempla. — V. Iniuriarum patiens moritur ann. 337 a. Chr.

I. TIMOLEON, Corinthius. Sine dubio magnus omnium iudicio hic vir exstitit. Namque huic uni contigit, quod nescio an ulli ⁸⁾, ut et patriam, in qua erat natus, oppressam a tyranno liberaret, et a Syracusis, quibus auxilio erat missus, inveteratam servitutem depelleret, totamque Siciliam, multos annos bello vexatam a barbarisque oppressam, suo adventu in pristinum restitueret. Sed in his rebus non simplici fortuna conflictatus est, et, id quod difficilius putatur, multo sapientius tulit secundam, quam adversam fortunam. Nam quum frater eius Timophanes, dux a Corinthiis delectus, tyrannidem per milites mercenarios occupasset, particepsque regni posset esse: tantum abfuit a societate sceleris, ut antetulerit suorum civium libertatem fratris saluti, et parere legibus, quam imperare patriae, satius ⁹⁾ duxerit. Hac mente per haruspice[m], communemque affinem, cui soror, ex eisdem parentibus nata, nupta erat, fratrem tyrannum interficiendum curavit. Ipse non modo manus non attulit, sed ne adspicere qui-

8) ita omnes codices; ex emendatione Lambini ante Bardiliu[m] vulgo: *an nulli*. cf. Daehn. — 9) cod. Voss. A. et nonnullae vett. edd. *sanctius*,

dem fratrum sanguinem voluit. Nam, dum res conficeretur, procul in praesidio fuit, ne quis satellites posset succurrere. Hoc praeclarissimum eius facinus non pari modo probatum est ab omnibus. Nonnulli enim laesam ab eo pietatem putabant, et invidia laudem virtutis obtinebant. Mater vero post id factum neque domum ad se filium admisit, neque adspexit, quin eum fratricidam impiumque detestans compelleret. Quibus rebus adeo ille est commotus, ut nonnumquam vitae finem facere voluerit, atque ex ingratorum hominum conspectu morte decedere.

II. Interim Dione Syracusis interfecto, Dionysius rursus Syracusarum potitus est: cuius adversarii opem a Corinthiis petierunt, ducemque, quo in bello uterentur, postularunt. Huc Timoleon missus incredibili felicitate Dionysium tota Sicilia depulit. Quum interficere posset, noluit, tutoque ut Corinthum perveniret, effecit: quod utrorumque Dionysiorum opibus Corinthii saepe adiuti fuerant, cuius benignitatis memoriam volebat exstare; camque praeclaram victoriam ducebat, in qua plus esset clementiae, quam crudelitatis; postremo, ut non solum auribus acciperetur, sed etiam oculis cerneretur, quem et ex quanto regno ad quam fortunam detrusisset. Post Dionysii decessum cum Hiceta bellavit, qui adversatus fuerat Dionysio: quem non odio tyrannidis dissensisse sed cupiditate, indicio fuit, quod ipse expulso Dionysio, imperium dimittere noluit. Hoc superato, Timoleon maximas copias Carthaginiensium apud Crimissum flumen fugavit, ac satis habere coegit, si liceret Africam obtinere, qui iam complures annos possessionem Siciliae tenebant. Cepit etiam Mamercum, Italicum ducem, hominem bellicosum et potentem, qui tyrannos adiutum in Siciliam venerat.

III. Quibus rebus confectis quum propter diuturnitatem belli non solum regiones, sed etiam urbes desertas videret, conquisivit, quos potuit, primum

- Siculos; deinde Corinθο arcessivit colonos, quod ab
 2 his initio Syracusae erant conditae. Civibus veteribus sua restituit; novis bello vacuefactas possessiones divisit; urbium moenia disiecta fanaque deserta ¹⁾ refecit; civitatibus leges libertatemque reddidit; ex maximo bello tantum otium totae ²⁾ insulae conciliavit, ut hic conditor urbium earum, non illi, qui
 3 initio deduxerant, videretur. Arcem Syracusis, quam munierat Dionysius ad urbem obsidendam, a fundamentis disiecit; cetera tyrannidis propugnacula demolitus est, deditque operam, ut quam minime multa
 4 vestigia servitutis manerent. Quum tantis esset opibus, ut etiam invitis imperare posset; tantum autem haberet amorem omnium Siculorum, ut nullo recusante regnum obtineret: maluit se diligi, quam metui. Itaque, quum primum potuit, imperium deposuit, et privatus Syracusis, quod reliquum vitae fuit, vixit.
 5 Neque vero id imperite fecit. Nam quod ceteri reges imperio potuerunt, hic benevolentia tenuit. Nullus honos huic defuit; neque postea res ulla Syracusis gesta est publice ³⁾, de qua prius sit decretum, quam Timoleontis sententia cognita. Nullius umquam consilium non modo antelatum, sed ne comparatum quidem est. Neque id magis benevolentia factum est, quam prudentia.

IV. Hic quum aetate iam proveetus esset, sine ullo morbo lumina oculorum amisit. Quam calamitatem ita moderate tulit, ut neque eum querentem quisquam audierit, neque eo minus privatis publicisque rebus interfuerit. Veniebat autem in theatrum,
 2 quum ibi concilium populi haberetur, propter valetudinem vectus iumentis iunctis, atque ita de vehiculo, quae videbantur, dicebat; neque hoc illi quis-

1) quaedd. vett. edd. *deleta*. — cod. Mend. neutram vocem habet, cf. Daehn. — 2) ita Guelph. Gif. — al. *toti*. — 3) ita Bos. e cod. Boecl. — vulgo *publica*.

quam tribuebat superbiae. Nihil enim umquam neque insolens, neque gloriosum ex ore eius exiit. Qui 3 quidem, quum suas laudes audiret praedicari, numquam aliud dixit, quam se in ea re maximas diis gratias agere atque habere, quod, quum Siciliam recreare constituissent, tum se potissimum ducem esse voluissent. Nihil enim rerum humanarum sine 4 deorum numine geri putabat ⁴⁾. Itaque suae domi sacellum *Ἀυτοπατίας* constituerat, idque sanctissime colebat.

V. Ad hanc hominis excellentem bonitatem mirabiles accesserunt casus. Nam proelia maxima natali die suo fecit omnia: quo factum est, ut eius diem ⁵⁾ natalem festum haberet universa Sicilia. Huic quidam 2 Lamestius, homo petulans et ingratus, vadimonium quum vellet imponere, quod cum illo se lege agere diceret, et complures concurrissent, qui procacitatem hominis manibus coërcere conarentur: Timoleon oravit omnes, ne id facerent. Namque id ut Lamestio ceterisque liceret, se maximos labores summaque adiisse pericula. Hanc enim speciem libertatis esse, si omnibus, quod quisque vellet, legibus experiri liceret. Idem, quum quidam Lamestii similis, nomine 3 Demaenetus, in concione populi de rebus gestis eius detrudere coepisset, ac nonnulla inveheretur in Timoleonta; dixit, nunc demum se voti esse damnatum. Namque haec ⁶⁾ a diis immortalibus semper precatum, ut talem libertatem restituerent ⁷⁾ Syracusanis, in qua cuiusvis liceret, de quo vellet, impune 4 dicere. Hic quum diem supremum obiisset, publice a Syracusanis in gymnasio, quod Timoleonteum appellatur, tota celebrante Sicilia, sepultus est.

4) cod. Leid. *agi putabat* cf. Stav.

5) al. *diem* omittunt; Titz. e Longol. *ut eiusdem natale fest. hab.* — 6) al. *hoc*, at vid. Brem. — 7) ita Lamb. et al. vett. edd. — codd. *restitueret*; at cf. Brem.

XXI DE REGIBUS.

— ARGUMENTUM.

Cap. I. Spartanorum reges, nomine non potestate reges fuerunt. Persarum excellentissimi reges. — II. Macedonum reges clariores; unus Epirotes, unus idem Siculus. — III. Reges ex amicis Alexandri.

I. Hi fere fuerunt Graeciae ⁸⁾ gentis duces, qui memoria digni videbantur, praeter reges. Namque eos attingere nolumus, quod omnium res gestae separatim sunt relatae. Neque tamen hi admodum
 2 sunt multi. Lacedaemonius autem Agesilaus nomine, non potestate, fuit rex; sicut ceteri Spartani. Ex his vero, qui dominatum imperio tenuerunt, excellentissimi fuerunt, ut nos iudicamus, Persarum Cyrus et Darius, Hystaspi ⁹⁾ filius: quorum uterque privatus virtute regnum est adeptus. Prior horum apud Massagetis in proelio cecidit; Darius senectute
 3 diem obiit supremum. Tres sunt praeterea eiusdem generis, Xerxes, et duo Artaxerxes, Macrochir et Mnemon. Xerxi maxime est illustre, quod maximis post hominum memoriam exercitibus terra marique
 4 bellum intulit Graeciae. At Macrochir praecipuam habet laudem amplissimae pulcherrimaeque corporis formae: quam incredibili ornavit virtute belli. Namque illo Perses nemo fuit manu fortior. Mnemon autem iustitiae fama floruit. Nam quum matris suae scelere amisisset uxorem, tantum indulsit dolori, ut
 5 eum pietas vinceret. Ex his duo eodem nomine

⁸⁾ ita codd. Guelph. Voss. Leid. B. — al. *Graecae*; cf. Günth. — ⁹⁾ ita ed. princ. Paris. et al. vett. edd.; in terminatione consentiunt codd. cf. Stav. et Bard. — vulg. *Hystaspis*.

morbo naturae debitum reddiderunt: tertius ab Artabano praefecto ferro interemtus est.

II. Ex Macedonum autem genere ¹⁾ duo multo ceteros antecesserunt rerum gestarum gloria: Philippus, Amyntae filius, et Alexander Magnus. Horum alter Babylone morbo consumtus est; Philippus Aegis a Pausania, quum spectatum ludos iret, iuxta theatrum occisus est. Unus Epirotes, Pyrrhus, qui cum populo Romano bellavit. Is quum Argos oppidum oppugnaret in Peloponneso, lapide ictus interiit. Unus item Siculus, Dionysius prior. Nam et manu fortis, et belli peritus fuit, et id quod in tyranno non facile reperitur, minime libidinosus, non luxuriosus, non avarus, nullius denique rei cupidus, nisi singularis perpetuique imperii, ob eamque rem crudelis. Nam dum id studuit munire, nullius pepercit vitae, quem eius insidiatorem putaret. Hic quum virtute tyrannidem sibi peperisset, magna retinuit felicitate, maiorque annos ²⁾ sexaginta natus decessit florente regno. Neque in tam multis annis cuiusquam ex sua stirpe funus vidit, quum ex tribus uxoribus liberos procreasset, multique ei nati essent nepotes.

III. Fuerunt praeterea multi ³⁾ reges ex amicis Alexandri Magni ⁴⁾, qui post obitum eius imperia ceperunt: in his Antigonus, et huius filius Demetrius, Lysimachus, Seleucus, Ptolemaeus. Ex his Antigonus in proelio, quum adversus Seleucum Lysimachumque dimicaret, occisus est. Pari leto affectus est Lysimachus a Seleuco. Nam, societate dissoluta, bellum inter se gesserunt. At Demetrius, quum

¹⁾ codd. Ax. Guelph. al. *gente*; v. Stav. et. Heus. — ²⁾ ita plerique codd. — al. *annis*. Lamb. emendavit *annos natus*; at vid. Brem.

³⁾ ita Bos. e cod. Voss. edd. Ultr. Ald. Longol. cet. — al. *magni*. — ⁴⁾ deest haec vox a codd. Ax. Voss. B.

- filiam suam Seleuco in matrimonium dedisset, neque eo magis fida inter eos amicitia manere potuisset, captus bello, in custodia socer generi perit a morbo 5). Neque ita multo post Seleucus a Ptolemaeo Cerauno dolo interfectus est; quem ille a patre expulsus Alexandria, alienarum opum indigentem, receperat. Ipse autem Ptolemaeus, quum vivus filio regnum tradidisset, ab illo eodem vita privatus dicitur. De quibus quoniam satis dictum putamus, non incommodum videtur, non praeterire Hamilcarem et Hannibalem, quos et animi magnitudine, et calliditate omnes in Africa natos praestitisse constat.

XXII.

HAMILCAR.

ARGUMENTUM.

Cap. I. Hamilcar, Eryce defenso, magnam ferociam ostendit in pace post primum bellum Punicum concilianda (241 a. Ch. n.) — II. Remotis a Carthagine militibus mercenariis otium toti Africae restituit. — III. Cum exercitu in Hispaniam mittitur comitante filio Hannibale (238 a. Ch. n.); Hasdrubal eius gener et in imperio successor. — IV. Adversus Vettones in proelio pugnans cadit. (228 a. Ch. n.).

- I. HAMILCAR, Hannibalis filius, cognomine Barcas, Carthaginensis, primo Poenico bello, sed temporibus extremis, admodum adolescentulus in Sicilia 2 praeesse coepit exercitui. Quum ante eius adventum et mari et terra male res gererentur Carthaginensium, ipse, ubi affuit, numquam hosti ces-

5) a morbo habent codd. Guelph. Ax. Voss. B.; alii praepositionem omittunt. At cf. Brem.

sit, neque locum nocendi dedit, saepeque e contrario occasione data lacessivit, semperque superior discessit. Quo facto, quum paene omnia in Sicilia Poeni amisissent, ille Erycem sic defendit, ut bellum eo loco gestum non videretur. Interim Carthaginienses, classe apud insulas Aegates a C. Lutatio, consule Romanorum, superati, statuerunt belli finem facere, eamque rem arbitrio permiserunt Hamilcaris. Ille, etsi flagrabat bellandi cupiditate, tamen paci serviendum putavit, quod patriam exhaustam sumptibus diutius calamitates belli ferre non posse intelliebat: sed ita, ut statim mente agitare, si paullum modo res essent reffectae, bellum renovare Romanosque armis persequi, donecum ⁶⁾ aut certe ⁷⁾ vicissent, aut victi manus dedissent. Hoc consilio pacem conciliavit, in quo ⁸⁾ tanta fuit ferocia, quum Catulus negaret bellum compositurum, nisi ille cum suis, qui Erycem tenuerunt, armis relictis, Sicilia decederent, ut, succumbente patria, ipse periturum se potius dixerit, quam cum tanto flagitio domum rediret. Non enim suae esse virtutis, arma a patria accepta adversus hostes adversariis tradere. Huius pertinaciae cessit Catulus.

II. At ille, ut Carthaginem venit, multo aliter, ac sperabat, rempublicam se habentem cognovit. Namque diuturnitate externi mali tantum exarsit intestinum bellum, ut numquam pari periculo fuerit Carthago, nisi quum deleta est. Primo mercenarii milites, qui adversus Romanos fuerant, desciverunt: quorum numerus erat viginti millium. Hi totam abalienarunt Africam, ipsam Carthaginem oppugnarunt. Quibus malis adeo sunt Poeni perterriti, ut etiam auxilia a Romanis petiverint, eaque impetrarint. Sed

6) Ita codd. Guelph. Gif. Boecl. al. — Ax. al. *donec*. —

7) codd. *certe*, Lamb. edidit *virtute*, Keuch. *vi certe*, Daehn. coni. *aperte*, al. aliter. — 8) ita ed. Ultr. al. — codd. habent *in qua*, cf. ed. Heid.

extremo, quum prope iam ad desperationem pervenissent, 4 Hamilcarem imperatorem fecerunt. Is non solum hostes a muris Carthaginis removit, quum amplius centum millia facta essent armatorum; sed etiam eo compulit, ut, locorum angustiis clausi, plures fame, quam ferro interirent. Omnia oppida abalienata, in his Uticam atque Hipponem, valentissima 5 totius Africae, restituit patriae. Neque eo fuit contentus, sed etiam fines ⁹⁾ imperii propagavit, tota Africa tantum otium reddidit, ut nullum in ea bellum videretur multis annis fuisse.

III. Rebus his ex sententia peractis, fidenti animo atque infesto Romanis, quo facilius causam bel-
landi reperiret, effecit, ut imperator cum exercitu in Hispaniam mitteretur, eoque secum duxit filium 2 Hannibalem, annorum novem. Erat praeterea cum eo adolescens illustris, formosus, Hasdrubal, quem nonnulli diligi turpius, quam par erat, ab Hamilcare loquebantur. Non enim maledici tanto viro deesse poterant. Quo factum est, ut a praefecto morum Hasdrubal cum eo vetaretur esse. Huic ille filiam suam in matrimonium dedit, quod moribus eorum 3 non poterat interdici socero gener. ¹⁾ De hoc ideo mentionem fecimus, quod, Hamilcare occiso, ille exercitui praefuit, resque magnas gessit; et princeps largitione vetustos pervertit mores Carthaginiensium; eiusdemque post mortem Hannibal ab exercitu accepit imperium.

IV. At Hamilcar, posteaquam mare transiit in Hispaniamque venit, magnas res secunda gessit fortuna: maximas bellicosissimasque gentes subegit: equis, armis, viris, pecunia totam locupletavit Africanam. 2 Hic quum in Italiam bellum inferre medita-

9) codd. Guelph. Ax. Voss. B. *finis*.

1) cod. Guelph. ed. Ultr. *socero genero*, Boeckl. Voss. B. Ax. *socer a genero*, Leid. A. *socer genero*.

retur, nono anno post, quam in Hispaniam venerat, in proelio pugnans adversus Vettones occisus est. Huius perpetuum odium erga Romanos maxime concitasse videtur secundum bellum Poenicum. Namque Hannibal, filius eius, assiduis patris obtestationibus eo est perductus, ut interire, quam Romanos non experiri mallet.

XXIII.

HANNIBAL.

ARGUMENTUM.

Cap. I. Hannibal summus imperator fuit. Invidia suorum debilitatur, neque tamen umquam odium in Romanos deponit. — II. Philippum Macedoniae, Antiochum Syriae regem Romanis hostes reddidit, seque puerum odio Romanorum imbutum esse ipse profitetur. — III. Summam imperii adeptus, Hispaniae gentibus bello subactis, Saguntum expugnat. Hispania relicta exercitum trans Alpes in Italiam ducit. (218 a. Chr. n.). — IV. In Italia multis proeliis Romanos devincit. (218—216 a. Chr. n.). — V. Insidiis a Q. Fabio Maximo structis per dolum elapsus Romanos vincere pergit. — VI. Ex Italia revocatus, ut patriam defenderet, a Scipione apud Zmam proelio vincitur. (202 a. Chr. n.). — VII. Pace composita patriae servire Hannibal. non desistit. Postremum. Romanis insidiantibus, profugus patria relicta in Syriam ad Antiochum se confert. (196 a. Chr. n.). — VIII. Antiochum omnibus in rebus adjuvat, qui Rhodiorum classe vincitur. (190 a. Chr. n.). — IX. Cretam fugit, avaritiam Cretensium deludit. — X. Ad Prusiam, Bithyniae regem, venit, eumque in bello adversus Eumenem, Romanorum amicum, adjuvat. — XI. Eumenem consilio superat. — XII. Ne in Romanorum manus incidat, veneno sumto perit. (181, 182 vel 183 a. Chr. n.). — XIII. Literarum non fuit ignarus.

I. HANNIBAL, Hamilcaris filius, Carthaginiensis. Si verum est, quod nemo dubitat, ut populus Romanus omnes gentes virtute superaret, non est infitiantur.

dum, Hannibalem tanto ²⁾ praestitisse ceteros imperatores prudentia, quanto populus Romanus antecedit fortitudine cunctas nationes. Nam quotiescumque cum eo congressus est in Italia, semper discessit superior. Quod nisi domi civium suorum invidia debilitatus esset, Romanos videretur superare potuisse. Sed multorum obtrectatio devicit unius virtutem. Hic autem velut hereditate relictum odium paternum erga Romanos sic conservavit, ut prius animam, quam id, deposuerit: qui quidem, quum patria pulsus esset, et alienarum opum indigeret, nunquam destiterit animo bellare cum Romanis.

II. Nam ut omittam Philippum, quem absens hostem reddidit Romanis: omnium his temporibus potentissimus rex Antiochus fuit. Hunc tanta cupiditate incendit bellandi, ut usque a rubro mari arma conatus sit inferre Italiae. Ad quem quum legati venissent Romani, qui de ejus voluntate explorarent, darentque operam consiliis clandestinis, ut Hannibalem in suspicionem regi adducerent, tamquam ab ipsis corruptum alia, atque antea, sentire; neque id frustra fecissent, idque Hannibal comperisset, seque ab interioribus consiliis segregari vidisset: tempore dato adiit ad regem, eique quum multa de fide sua et odio in Romanos commemorasset, hoc adjunxit: Pater, inquit, meus, Hamilcar, puerulo me, utpote non amplius novem annos nato, in Hispaniam imperator proficiscens Carthagine, Jovi optimo maximo hostias immolavit. Quae divina res dum conficiebatur, quae-sivit a me, vellemne secum in castra proficisci? Id quum libenter accepissem, atque ab eo petere coepissem, ne dubitaret ducere; tum ille, faciam, inquit, si fidem mihi, quam postulo, dederis. Simul me ad aram adduxit, apud quam sacrificare insti-

2) *tanto* abest a codd. Ax. Boeckl. Voss. B. vid. Daehlg. ibiq. laudat.

tuerat, eamque, ceteris remotis, tenentem jurare jussit, numquam me in amicitia cum Romanis fore. Id ego iusiurandum patri datum usque ad hanc aetatem ³⁾ ita conservavi, ut nemini dubium esse debebat, quin reliquo tempore eadem mente sim futurus. Quare, si quid amice de Romanis cogitabis, non imprudenter feceris, si me celaris; quum quidem bellum parabis, te ipsum frustraberis, si non me in eo principem posueris.

III. Hac igitur, qua diximus, aetate cum patre in Hispaniam profectus est: cujus post obitum, Hasdrubale imperatore suffecto, equitatu omni praefuit. Hoc quoque interfecto, exercitus summam imperii ad eum detulit. Id Carthaginem delatum publice comprobatum est. Sic Hannibal minor quinque et viginti annis ⁴⁾ natus imperator factus proximo triennio omnes gentes Hispaniae bello subegit; Saguntum, foederatam civitatem, vi expugnavit; tres exercitus maximos comparavit. Ex his unum in Africam misit, alterum cum Hasdrubale fratre in Hispania reliquit, tertium in Italiam secum duxit. Saltum Pyrenaeum transiit. Quaecumque iter fecit, cum omnibus incolis conflixit; neminem, nisi victum, dimisit. Ad Alpes posteaquam venit, quae Italiam ab Gallia sejungunt, quas nemo umquam cum exercitu ante eum, praeter Herculem Grajum, transierat (quo facto is hodie saltus Grajus appellatur): Alpico, conantes prohibere transitu ⁵⁾, concidit, loca patefecit, itinera muniit, effecitque, ut ea elephantus ornatus ire posset, qua antea unus homo inermis vix poterat repere. Hac copias traduxit, in Italiamque pervenit.

IV. Conflixerat apud Rhodanum cum P. Cornelio Scipione Cos. eumque pepulerat. Cum hoc

³⁾ ita Guelph. Ax. Voss. B.; al. *diem*.

⁴⁾ ita codd., Günth. al. *annos*. cf. Dæhn. — ⁵⁾ quaedd. edd. vett. *transitum*, v. Bard.

eodem [de Clastidio] ⁶⁾ apud Padum decernit: saucium inde ac fugatum dimittit. Tertio idem Scipio cum collega, Tiberio Longo, apud Trebiam adversus eum venit. Cum his manum conseruit: utrosque profligavit. Inde per Ligures Apenninum transit, ³ petens Etruriam. Hoc itinere adeo gravi morbo afficitur oculorum, ut postea numquam dextero aequè bene usus sit. Qua valetudine quum etiam nunc ⁷⁾ premeretur, lecticaque ferretur, C. Flaminium Cos. apud Trasimenum cum exercitu insidiis circumventum occidit: neque multo post C. Centenium praetorem, cum delecta manu saltus occupantem. Hinc ⁴ in Apuliam pervenit. Ibi obviam ei venerunt duo Consules, C. Terentius et L. Aemilius. Utriusque exercitus uno proelio fugavit; Paullum consulem occidit, et aliquot praeterea consulares, in his Cn. Servilium Geminum, qui anno superiore fuerat consul.

V. Hac pugna pugnata, Romam profectus est, nullo resistente. In propinquis urbis montibus moratus est. Quum aliquot ibi dies castra habuisset, et reverteretur Capuam; Q. Fabius Maximus, dictator ² Romanus, in agro Falerno se ei objecit. Hic clausus locorum angustiis noctu sine ullo detrimento exercitus se expedit; Fabio, callidissimo imperatori, verba dedit. Namque obducta nocte sarmenta in cornibus juvencorum ⁸⁾ deligata incendit, ejusque generis multitudinem magnam dispalatam immisit. Quo repentino objectu ⁹⁾ viso tantum terrorem iniecit exercitui Romanorum, ut egredi extra vallum ³ nemo sit ausus. Hanc post rem gestam non ita multis diebus M. Minucium Rufum, magistrum equitum,

⁶⁾ codd. carent de ante *Clastidio*; ed. Ultr. *Clastidii*, al. aliter. cf. ed. Heid. — ⁷⁾ cod. Voss. A. C. Long. ed. princ. al. *etiam tum*.

⁸⁾ Leid. B. Voss. B. ed. Ult. al. *iumentorum*. — ⁹⁾ ed. Ultr. *obiecto*.

pari ac dictatorem imperio, dolo productum in proelium, fugavit. Ti. Sempronium Gracchum, iterum consulem, in Lucanis absens in insidias inductum sustulit. M. Claudium Marcellum, quinquies consulem, apud Venusiam pari modo interfecit. Longum est, 4 enumerare proelia. Quare hoc unum satis erit dictum, ex quo intelligi possit, quantus ille fuerit: quamdiu in Italia fuit, nemo ei in acie restitit, nemo adversus eum post Cannensem pugnam in campo castra posuit.

VI. Hic invictus patriam defensum revocatus 1 bellum gessit adversus P. Scipionem, filium ejus ¹⁾, quem ipse primum apud Rhodanum, iterum apud Padum, tertio apud Trebiam fugaverat. Cum hoc, 2 exhaustis iam patriae facultatibus, cupivit in praesentiarum bellum componere, quo valentior postea congredieretur. In colloquium convenit, conditiones non convenerunt. Post id factum paucis diebus apud 3 Zamam cum eodem conflixit: pulsus (incredibile dictu) biduo et duabus noctibus Hadrumentum pervenit, quod abest a Zama circiter millia passuum trecenta. In hac fuga Numidae, qui simul cum eo 4 ex acie excesserant, insidiati sunt ei; quos non solum effugit, sed etiam ipsos oppressit. Hadrumeti reliquos ex fuga collegit: novis delectibus paucis diebus multos contraxit.

VII. Quum in apparando acerrime esset occupatus, 1 Carthaginienses bellum cum Romanis composuerunt. Ille nihilo secius exercitui postea praefuit, resque in Africa gessit, [itemque Mago frater ejus,] ²⁾ usque ad P. Sulpicium et C. Aurelium consules. His 2 enim magistratibus legati Carthaginienses Romam venerunt, qui senatui populoque Romano gratias

1) Pronomen *eius* deest in codd. Guelph. Ax. cf. ed. Heid.

2) Heus. al. haec verba incluserunt, ut suspecta; Daehn. uncas abiecit.

agerent, quod cum his pacem fecissent, ob eamque rem corona aurea eos donarent, simulque peterent, ut obsides eorum Fregellis essent, captivique red-
 3 derentur. His ex senatus consulto responsum est: munus eorum gratum acceptumque esse; obsides, quo loco rogarent, futuros; captivos non remissuros, quod Hannibalem, cujus opera susceptum bellum foret, inimicissimum nomini Romano, etiam nunc cum imperio apud exercitum haberent, itemque fra-
 4 trem ejus Magonem. Hoc responso Carthaginienses cognito Hannibalem domum Magonemque revocarunt. Huc ut rediit, praetor factus est, postquam rex fuerat, anno secundo et vicesimo. Ut enim Romae consules, sic Carthagine quotannis annui bini reges
 5 creabantur. In eo magistratu pari diligentia se Hannibal praebuit, ac fuerat in bello. Namque effecit, ex novis vectigalibus non solum ut esset pecunia, quae Romanis ex foedere penderetur, sed etiam
 6 superesset, quae in aerario reponeretur. Deinde, anno post praeturam, Marco Claudio, Lucio Furio Coss. Roma ³⁾ legati Carthaginem venerunt. Hos Hannibal sui exposcendi gratia missos ratus, priusquam his senatus daretur, navem conscendit clam,
 7 atque in Syriam ad Antiochum profugit. Hac re palam facta, Poeni naves duas, quae eum comprehenderent, si possent consequi, miserunt; bona eius publicarunt; domum a fundamentis disiecerunt; ipsum exsulem iudicarunt.

VIII. At Hannibal anno tertio post, quam domo profugerat, L. Cornelio, Quinto Minucio Coss. cum quinque navibus Africam accessit in finibus Cyrenaeorum, si forte Carthaginienses ad bellum Antiochi spe fiduciaque inducere posset: cui iam persuaserat, ut cum exercitibus in Italiam proficisceretur. Huc

3) ita codd. Guelph. Voss. A. C. al., ante Bard. vulgo *Romani*.

Magonem fratrem excivit. Id ubi Poeni resciverunt, 2
 Magonem eadem, qua fratrem, absentem poena af-
 fecerunt. Illi desperatis rebus quum solvissent na-
 ves, ac vela ventis dedissent, Hannibal ad Antiochum
 pervenit. De Magonis interitu duplex memoria pro-
 dita est. Namque alii naufragio, alii a servis ipsius
 interfectum eum, scriptum reliquerunt. Antiochus 3
 autem, si tam in agendo bello parere voluisset con-
 siliis eius, quam in suscipiendo instituerat, propius
 Tiberi, quam Thermopylis de summa imperii dimi-
 casset. Quem etsi multa stulte conari videbat, tamen
 nulla deseruit in re. Praefuit paucis navibus, quas 4
 ex Syria iussus erat in Asiam ducere, hisque adver-
 sus Rhodiorum classem in Pamphylio mari confligit.
 Quo quum 4) multitudinem adversariorum sui supera-
 rentur, ipse, quo cornu rem gessit, fuit superior.

IX. Antiocho fugato, verens, ne dederetur, (quod 1
 sine dubio accidisset, si sui fecisset potestatem) Cre-
 tam ad Gortynios venit, ut ibi, quo se conferret,
 consideraret. Vidit autem vir omnium callidissimus, 2
 magno se fore periculo, nisi quid providisset, pro-
 pter avaritiam Cretensium. Magnam enim secum pe-
 cuniam portabat, de qua sciebat exisse famam. Ita 3
 que capit tale consilium. Amphoras complures com-
 plet plumbo; summas operit auro et argento. Has,
 praesentibus principibus, deponit in templo Dianae,
 simulans, se suas fortunas illorum fidei credere. His
 in errorem inductis, statuas aeneas, quas secum por-
 tabat, omnes sua pecunia complet, easque in pro-
 patulo domi abiicit. Gortynii templum magna cura 4
 custodiunt, non tam a ceteris, quam ab Hannibale,
 ne ille, inscientibus his, tolleret secumque duceret.

X. Sic, conservatis suis rebus, Poenus, illius 1
 Cretensibus omnibus, ad Prusiam in Pontum per-
 venit. Apud quem eodem animo fuit erga Italiam,

4) Lamb. in quo quum, vid. ed. Heid.

neque aliud quidquam egit ⁵⁾, quam regem armavit
 2 et exercuit ⁶⁾ adversus Romanos. Quem quum vi-
 deret domesticis rebus minus esse robustum, concili-
 abat ceteros reges, adiungebatque bellicosas natio-
 nes. Dissidebat ab eo Pergamenus rex, Eumenes,
 Romanis amicissimus, bellumque inter eos gerebatur
 et mari et terra: quo magis cupiebat eum Hannibal
 3 opprimi. Sed utrobique Eumenes plus valebat pro-
 pter Romanorum societatem, quem si removisset,
 faciliora sibi cetera fore arbitrabatur. Ad hunc in-
 4 terficiendum talem iniit rationem. Classe paucis die-
 bus erant decreturi. Superabatur navium multitudi-
 ne: dolo erat pugnandum, quum par non esset
 armis. Imperavit quam plurimas venenatas serpen-
 5 tes vivas colligi, easque in vasa fictilia conici. Harum
 quum confecisset magnam multitudinem, die ipso,
 quo facturus erat navale proelium, classarios con-
 vocat, hisque praecipit, omnes ut in unam Eumenis
 regis concurrant navem, a ceteris tantum satis ha-
 beant se defendere. Id facile illos serpentium mul-
 6 titudine consecuturos. Rex autem in ⁷⁾ qua nave
 veheretur, ut scirent, se facturum; quem si aut
 cepissent, aut interfecissent, magno his pollicetur
 praemio fore.

XI. Tali cohortatione militum facta, classis ab
 utrisque in proelium deducitur. Quarum acie con-
 stituta, priusquam signum pugnae daretur, Hannibal,
 ut palam faceret suis, quo loco Eumenes esset,
 2 tabellarium in scapha cum caduceo mittit. Qui ubi ad
 naves adversariorum pervenit, epistolamque ostenden-
 dens se regem professus est quaerere, statim ad
 Eumenem deductus est, quod nemo dubitabat, ali-
 quid de pace esse scriptum ⁸⁾. Tabellarius, ducis

5) Heus. *egit* inclusit, at vid. Tzsch. — 6) al. *excitavit*; v. Daehn. ibiq. Heins. — 7) Praepos. *in* omiserunt Wetst. et Günth. e fide codd. Leid. B. Voss. A. C. ed. Ultr.

8) codd. Ax. Guelph. Boeckl. Voss. B. *quin aliquid de pace*

nave declarata suis, eodem, unde erat ⁹⁾, se recepit. At Eumenes, soluta epistola, nihil in ea reperit, 3 nisi quod ad irridendum eum pertineret. Cuius etsi causam mirabatur, neque reperiēbatur ¹⁾, tamen proelium statim committere non dubitavit. Horum 4 in concursu Bithyni Hannibalis praecepto universi navem Eumenis adoriuntur. Quorum vim rex quum sustinere non posset, fuga salutem petiit: quam consecutus non esset, nisi intra sua praesidia se recepisset, quae in proximo litore erant collocata. Reli- 5 quae Pergamenae naves quum adversarios premerent acrius, repente in eas vasa fictilia, de quibus supra mentionem fecimus, coniici coepta sunt. Quae iacta initio risum pugnantibus concitarunt, neque, quare id fieret, poterat intelligi. Postquam autem naves 6 completas conspexerunt serpentibus, nova re perterriti, quum, quid potissimum vitarent, non viderent, puppes averterunt, seque ad sua castra nautica rotulerunt. Sic Hannibal consilio arma Pergamenorum 7 superavit: neque tum solum, sed saepe alias pedestribus copiis pari prudentia pepulit adversarios.

XII. Quae dum in Asia geruntur, accidit casu, 1 ut legati Prusiae Romae apud L. Quintium Flaminium, consularem, coenarent, atque ibi, de Hannibale mentione facta, ex his unus diceret, eum in Prusiae regno esse. Id postero die Flamininus sen- 2 natui detulit. Patres conscripti, qui, Hannibale vivo, numquam se sine insidiis futuros existimarent ²⁾, legatos in Bithyniam miserunt, in his Flaminium, qui ab rege peterent, ne inimicissimum suum secum haberet, sibi que dederet. His Prusias negare ausus 3 non est; illud recusavit, ne id a se fieri postularent,

esset scriptum. — 9) Ax. Guelph. ed. Vltr. unde erat egressus. — 1) Wetz. e Lamb. coniectura: *reperiebat*; at cff. Daehn. et Günth.

2) ita codd. Ax. Guelph. Voss. B.; ante Günth, vulgo *existimabant*.

- quod adversus ius hospitii esset; ipsi, si possent, comprehenderent: locum, ubi esset, facile inventuros. Hannibal enim uno loco se tenebat in castello, quod ei ab rege datum erat muneri: idque sic aedificarat, ut in omnibus partibus aedificii exitum sibi haberet, semper verens, ne usu veniret ³⁾, quod
- 4 accidit. Huc quum legati Romanorum venissent, ac multitudine domum eius circumdedissent, puer ab ianua prospiciens Hannibali dixit, plures praeter consuetudinem armatos apparere. Qui imperavit ei, ut omnes fores aedificii circumiret, ac propere sibi renuntiaret, num eodem modo undique obsideretur.
- 5 Puer quum celeriter, quid esset, renuntiasset, omnesque exitus occupatos ostendisset; sensit, id non fortuito factum, sed se peti, neque sibi diutius vitam esse retinendam. Quam ne alieno arbitrio dimitteret, memor pristinorum virtutum, venenum, quod semper secum habere consueverat, sumsit.

- XIII. Sic vir fortissimus, multis variisque perfunctus laboribus, anno acquievit septuagesimo. Quibus consulibus interierit, non convenit. Namque Atticus, Marco Claudio Marcello, Q. Fabio Labeone Coss. mortuum, in annali suo scriptum reliquit; at Polybius, L. Aemilio Paulo et Cn. Baebio Tamphilo; Sulpicius autem, T. Cornelio Cethego, M. Baebio
- 2 Tamphilo. Atque hic tantus vir tantisque bellis strictus nonnihil temporis tribuit literis. Namque aliquot eius libri sunt, Graeco sermone confecti; in his ad Rhodios de Cn. Manlii Vulsonis in Asia rebus
- 3 gestis. Huius bella gesta multi memoriae prodiderunt: sed ex his duo, qui cum eo in castris fuerunt simulque vixerunt, quamdiu fortuna passa est, Silenus, et Sosilus Lacedaemonius. Atque hoc Sosilo Hannibal literarum Graecarum usus est doctore.
- 4 Sed nos ⁴⁾ tempus est huius libri facere finem, et

3) vulgo *eveniret*; cf. Daehn. ibiq. laudatt.

4) Wetz. al. *nunc*, cf. Daehn,

Romanorum explicare imperatores: quo facilius collatis utrorumque factis, qui viri praeferendi sint, possit iudicari.

XXIV.

M. PORCIUS CATO.

EX LIBRO POSTERIORE CORNELII NEPOTIS.

ARGUMENTUM.

Cap. I. Cato, Tusculanus, in Sabinis primum versatur, deinde Romam demigrat. Primum eius stipendium. Tribunus militum in Sicilia. Fortiter pugnat apud Senam. Quaestor P. Scipionis Africani. Aedilis plebis cum Helvio. Praetor Sardiniam obtinet, Ennium Romam deducit. — II. Consul cum L. Valerio Flacco (195 a. Chr. n.), Hispaniam provinciam pasciscitur, unde frustra Africanus eum depellere conatur. Censura graviter fungitur, per omnem aetatem reipublicae causa inimicitias suscipit. — III. Catonis laudes. Scripsit historias et orationes.

I. CATO, ortus municipio Tusculo, adolescentulus, priusquam honoribus operam daret, versatus est in Sabinis, quod ibi heredium a patre relictum habebat. Hortatu L. Valerii Flacci, quem in consulatu censuraque habuit collegam, ut M. Perperna Censorius narrare solitus est, Romam demigravit, in foro-¹que esse coepit. Primum stipendium meruit anno-²rum decem septemque, Q. Fabio M. Claudio ⁵⁾ Consulibus. Tribunus militum in Sicilia fuit. Inde ut rediit, castra secutus est C. Claudii Neronis, magnique opera eius existimata ⁶⁾ est in proelio apud

⁵⁾ ante Bard. ed. min. vulgo: *Q. Fabio Maximo, M. Claudio Marcello*, cf. Daehn. — ⁶⁾ Lamb. dedit *aestimata*, at vid. Daehn.

Senam, quo cecidit Hasdrubal, frater Hannibalis.

- 3 Quaestor obtigit P. Africano, consuli, cum quo non pro sortis necessitudine vixit: namque ab eo perpetua dissensit vita. Aedilis plebis factus est cum C. Helvio. Praetor provinciam obtinuit Sardiniam, ex qua quaestor superiore tempore ex Africa decedens Q. Ennium poetam deduxerat: quod non minoris existimamus, quam quemlibet amplissimum Sardiniensem triumphum.

- II. Consulatum gessit cum L. Valerio Flacco, sorte provinciam nactus Hispaniam citeriorem, ex-
 2 que ea triumphum deportavit. Ibi quum diutius moraretur, P. Scipio Africanus, Consul iterum, cuius in priorē consulatu quaestor fuerat, voluit eum de provincia depellere, et ipse ei succedere. Neque hoc per senatum efficere potuit, quum quidem Scipio in civitate principatum obtineret: quod tum non potentia, sed iure respublica administrabatur. Qua ex re iratus senatu 7), consulatu peracto, privatus in
 3 urbe mansit. At Cato, censor cum eodem Flacco factus, severe praefuit ei potestati. Nam in complures nobiles animadvertit, et multas res novas in edictum addidit, qua re luxuria reprimeretur, quae
 4 iam tum incipiebat pullulare. Circiter annos octoginta 8), usque ad extremam aetatem ab adolescentia, reip. causa suscipere inimicitias non destitit. A multis tentatus non modo nullum detrimentum existimationis fecit, sed, quoad vixit, virtutum laude crevit.

III. In omnibus rebus singulari fuit prudentia et industria. Nam et agricola sollers, et reipubl.

7) ita codd.; vulgo *senatus*, at v. ed. Heid. — quae sequitur vox, *consulatu*, debetur Bosii coniecturae. Günth. ex coniect. Heus. dedit: *senatus post consulatum*. Cellar. Rickl. *iratus consulatu peracto*. — 8) haec vocabula: *circiter annos octoginta*, vulgo ut suspecta ab editoribus includuntur; at cf. Günth.

peritus, et iuris consultus, et magnus imperator, et probabilis orator, et cupidissimus literarum fuit. Quorum studium etsi senior arripuerat, tamen tantum progressum fecit, ut non facile reperire possis, neque de Graecis, neque de Italicis rebus, quod ei fuerit incognitum. Ab adolescentia confecit orationes. Senex 3 historias scribere instituit, quarum sunt libri septem. Primus continet res gestas regum populi Romani; secundus et tertius, unde quaeque civitas orta sit Italica: ob quam rem omnes Origines videtur appel- lasse. In quarto autem bellum Poenicum primum; in quinto secundum. Atque haec omnia capitulatim 4 sunt dicta. Reliquaque bella pari modo persecutus est, usque ad praeturam Ser. Galbae, qui diripuit Lusitanos. Atque horum bellorum duces non nominavit, sed sine nominibus res notavit. In iisdem exposuit, quae in Italia Hispaniisque viderentur admiranda. In quibus multa industria et diligentia comparet, multa doctrina. Huius de vita et moribus 5 plura in eo libro persecuti sumus, quem separatim de eo fecimus rogatu Titi Pomponii Attici. Quare studiosos Catonis ad illud volumen delegamus 6).

XXV.

VITA T. POMPONII ATTICI.

EX CORNELIO NEPOTE.

ARGUMENTUM.

Cap. I. Atticus non humili loco natus, optimo parente usus, puer condiscipulos antecellit ingenio et studio. — II. Patre

9) Heus. al. e cod. Voss. A. *relegamus*.

orbatus Sulpicii affinitate non expers est periculi, Athenas se confert (86 a. Chr. n.). Marium adolescentem opibus suis iuvat. Rebus suis translatis Athenienses pecunia sublevat, frumento donat. — III. Athenienses ei omnes publice honores habent, quos ille parce admittit. — IV. Sullae carus ob humanitatem et doctrinam, quem tamen sequi recusat. Athenis habitans nihilominus officia urbana amicis praestat. Rebus tranquillatis Romam redit (65 a. Chr. n.). — V. Q. Caecilii, avunculi ex dodrante heres. Ciceronia et Hortensii copula. — VI. Semper optimarum partium est, honores non petit, privatus cum dignitate vivit. — VII. Bello civili neque Pompeium neque Caesarem offendit, amicos opibus iuvat. — VIII. M. Bruto, occiso Caesare (44 a. Chr. n.), amicus, etiam abiecto et fugienti. — IX. In omni fortuna sibi constat. Ne Antonio quidem, qui bello Mutinensi (43 a. Chr. n.) hostis iudicatur, infestum se praebet; Fulviam, uxorem eius, adiuvat. — X. Ab Antonio, Romam reverso, de proscriptorum numero exemptus servatur cum Gellio Cano amico. — XI. Proscriptis plurimis auxilio est Epiroticis praediis. De vera eius liberalitate non temporaria. — XII. Socer Agrippae, conciliatore Antonio, cuius gratia solummodo usus est in periculis amicorum 'deprecandis.' — XIII. Bonus pater familias, familia usus mediocri sed perita et docta; elegans non sumtuosus. — XIV. Numquam sine lectione coenare solitus; fortunis auctis non sumtuosior ulla in re factus. — XV. Mendacii impatiens, in promissis amicorumque officiis religiosus. — XVI. Humanus, adolescens senibus, senex adolescentibus pariter atque aequalibus iucundus. — XVII. De pietate in matrem et sororem. Philosophiae praeceptis ad vitam agendam usus est. — XVIII. Peritus antiquitatis, quam totam uno volumine exponit; non ignarus poetices. — XIX. Morum elegantia pervenit in familiaritatem et affinitatem Augusti. — XX. Et Augusti et Antonii familiaritate colebatur quavis inter eos maximarum rerum aemulatio intercederet. — XXI. Extremus eius morbus. — XXII. De morte et sepultura Attici (32 a. Ch. n.).

I. T. POMPONIUS ATTICUS, ab origine ultima stirpis Romanae generatus ¹⁾, perpetuo a maioribus acceptam equestrem obtinuit dignitatem. Patre usus

1) Lamb. Heus. vocem *generatus* ut suspectam incluserunt; at vid. Daehn.

est diligente, indulgente ²⁾, et, ut tum erant tempora, diti, inprimisque studioso literarum. Hic, prout ipse amabat literas, omnibus doctrinis, quibus puerilis aetas impertiri debet, filium erudit. Erat ³ autem in puero, praeter docilitatem ingenii, summa suavitas oris ac vocis, ut non solum celeriter acciperet, quae tradebantur, sed etiam excellenter pronuntiaret. Qua ex re in pueritia nobilis inter aequales ferebatur, clariusque exsplendescibat, quam generosi condiscipuli animo aequo ferre possent. Itaque incitabat omnes studio suo; quo in numero ⁴ fuerunt L. Torquatus, C. Marius filius, M. Cicero: quos consuetudine sua sic sibi devinxit, ut nemo iis perpetuo fuerit carior.

II. Pater mature decessit. Ipse adolescentulus ¹ propter affinitatem P. Sulpicii, qui tribunus plebis interfectus est, non expers fuit illius periculi. Namque Anicia, Pomponii consobrina, nupserat M. Servio, fratri Sulpicii. Itaque interfecto Sulpicio posteaquam ² vidit, Cinnano tumultu civitatem esse perturbatam, neque sibi dari facultatem pro dignitate vivendi, quin alterutram partem offenderet, dissociatis animis civium, quum alii Sullanis, alii Cinnanis faverent partibus: idoneum tempus ratus studiis obsequendi suis, Athenas se contulit. Neque eo secius adolescentem Marium, hostem iudicatum, iuvit opibus suis; cuius fugam pecunia sublevavit. Ac, ne illa peregrinatio ³ detrimentum aliquod afferret rei familiari, eodem magnam partem fortunarum traiecit suarum. Hic ita vixit, ut universis Atheniensibus merito esset carissimus. Nam praeter gratiam, quae iam in adolescentulo ⁴ magna erat, saepe suis opibus inopiam eorum publicam levavit. Quum enim versuram facere publice necesse esset, neque eius conditionem aequam

2) haec vox deest in edd. qdd. vett. et codd.; Titz. inclusit, at cf. Daehn.

haberent; semper se interposuit, atque ita, ut neque usuram umquam ab iis acceperit, neque longius, 5 quam dictum esset, debere ³⁾ passus sit. Quod utrumque erat iis salutare. Nam neque indulgendo inveterascere eorum aes alienum patiebatur, neque 6 multiplicandis usuris crescere. Auxit hoc officium alia quoque liberalitate. Nam universos frumento donavit, ita ut singulis septem ⁴⁾ modii tritici darentur: qui modus mensurae medimnus Athenis appellatur.

III. Hic autem sic se gerebat, ut communis infimis, par principibus videretur. Quo factum est, ut huic omnes honores, quos possent, publice haberent, civemque facere studerent: quo beneficio ille uti noluit. [Quod nonnulli ita interpretantur, 7 amitti civitatem Romanam alia adscita.] ⁵⁾ Quamdiu affuit, ne qua sibi statua poneretur, restitit; absens prohibere non potuit. Itaque aliquot ipsi et Phidiae locis sanctissimis posuerunt: hunc enim in omni procuratione reipubl. actorem auctoremque habebant. 8 Igitur primum illud munus fortunae, quod in ea potissimum urbe natus est, in qua domicilium orbis terrarum esset imperii, ut eandem et patriam haberet et domum ⁶⁾; hoc specimen prudentiae, quod, quum in eam se civitatem contulisset, quae antiquitate, humanitate, doctrina praestaret omnes, unus ei ante alios fuerit carissimus.

IV. Huc ex Asia Sulla decedens quum venisset, quamdiu ibi fuit, secum habuit Pomponium, captus

3) vulgo praemittitur *eos* ante verbum *debere*; vid. Daehn.

4) Lamb. al. *sex*.

5) haec ut suspecta inclusit Heus., quem vid. — 6) omnes codd. *domum* habent, itemque omnes, uno Guelph. excepto, post *domum* addunt *voluit*. Lamb. emendavit *dominam* pro *domum*, quem Brem. al. secuti sunt. At de verbis nihil mutandum, ordo autem verborum perturbatus videtur esse. cf. ed. Heid.

adolescentis et humanitate et doctrina. Sic enim Graece loquebatur, ut Athenis natus videretur. Tanta autem suavitas erat sermonis Latini, ut appareret, in eo nativum quemdam leporem esse, non adscitum. Idem poëmata pronuntiabat et graece et latine sic, ut supra nihil posset addi. Quibus rebus 2 factum est, ut Sulla nusquam [eum] 7) ab se dimitteret, cuperetque secum deducere. Qui quum persuadere tentaret, noli, oro te, inquit Pomponius, adversum eos me velle ducere, cum quibus ne contra te arma ferrem, Italiam reliqui. At Sulla, adolescentis officio collaudato, omnia munera ei, quae Athenis acceperat, proficiscens iussit deferri. Hic 3 complures annos moratus, quum et rei familiari tantum operae daret, quantum non indiligens deberet paterfamilias, et omnia reliqua tempora aut literis, aut Atheniensium reipubl. tribueret, nihilominus amicis urbana officia praestitit. Nam et ad comitia 4 eorum ventitavit, et, si qua res maior acta est, non defuit; sicut Ciceroni in omnibus [eius] 8) periculis singularem fidem praebuit: cui ex patria fugienti HS. ducenta et quinquaginta millia donavit. Tran- 5 quillatis autem rebus Romanis, remigravit Romam, ut opinor, L. Cotta L. Torquato Coss. quem diem sic universa civitas Atheniensium prosecuta est, ut lacrimis desiderii futuri dolorem indicaret.

V. Habebat avunculum Q. Caecilium, equitem 1 Romanum, familiarem L. Luculli, divitem, difficillima natura: cuius sic asperitatem veritus est, ut, quem nemo ferre posset, huius sine offensione ad summam senectutem retinuerit benevolentiam. Quo facto tulit pietatis fructum. Caecilium enim moriens 2 testamento adoptavit eum, heredemque fecit ex do-

7) Pronomen hoc abest a codd. Guelph. Leid. B. Voss. C.

— 8) carent hoc pronomine codd. Mend. Leid. B. qdd. vet. edd.

drante: ex qua hereditate accepit circiter centies
 3 HS. Erat nupta soror Attici Q. Tullio Ciceroni: eas-
 que nuptias M. Cicero conciliarat, cum quo a con-
 discipulatu vivebat coniunctissime, multo etiam fami-
 liarius, quam cum Quinto, ut iudicari possit, plus
 in amicitia valere similitudinem morum, quam affi-
 4 nitatem. Utebatur autem intimo Q. Hortensio, qui
 his temporibus principatum eloquentiae tenebat, ut
 intelligi non posset, uter eum plus diligeret, Cicero,
 an Hortensius: et id, quod erat difficillimum, effi-
 ciebat, ut, inter quos tantae laudis esset aemulatio,
 nulla intercederet obtrectatio, essetque talium viro-
 rum copula.

VI. In republ. ita versatus est, ut semper opti-
 marum partium et esset et existimaretur, neque
 tamen se civilibus fluctibus committeret, quod non
 magis eos in sua potestate existimabat esse, qui se
 2 his dedissent, quam qui maritimis iactarentur. Hono-
 res non petiit, quum ei paterent propter vel gratiam
 vel dignitatem: quod neque peti more maiorum,
 neque capi possent conservatis legibus, in tam effu-
 sis ambitus largitionibus, neque geri e republ. sine
 3 periculo, corruptis civitatis moribus. Ad hastam
 publicam numquam accessit. Nullius rei neque praes,
 neque manceps factus est. Neminem neque suo
 nomine, neque subscribens, accusavit. In ius de sua
 4 re numquam iit; iudicium nullum habuit. Multorum
 consulum praetorumque praefecturas delatas sic ac-
 cepit, ut neminem in provinciam sit secutus, honore
 fuerit contentus, rei familiaris despexerit fructum:
 qui ne cum Q. quidem Cicerone voluerit ire in
 Asiam, quum apud eum legati locum obtinere pos-
 set. Non enim decere se arbitrabatur, quum prae-
 5 turam gerere nolisset, asseclam esse praetoris. Qua
 in re non solum dignitati serviebat, sed etiam tran-
 quillitati, quum suspiciones quoque vitaret criminum.
 Quo fiebat, ut eius observantia omnibus esset carior,

quum eam officio, non timori neque spei tribui viderent.

VII. Incidit Caesarianum civile bellum, quum haberet annos circiter sexaginta. Usus est aetatis vacatione, neque se ⁹⁾ quoquam movit ex urbe. Quae amicis suis opus fuerant ad Pompeium proficiscen-
tibus, omnia ex sua re familiari dedit. Ipsum Pom-
peium coniunctum non offendit: nullum [enim] ¹⁾ ab
eo habebat ornamentum, ut ceteri, qui per eum
aut honores, aut divitias ceperant; quorum partim
invitissimi castra sunt secuti, partim summa cum
eius offensione domi remanserunt. Attici autem ³⁾
quies tantopere Caesari fuit grata, ut, victor quum
privatis pecunias per epistolas imperaret, huic non
solum molestus non fuerit, sed etiam sororis filium
et ²⁾ Q. Ciceronem ex Pompeii castris concesserit.
Sic vetere instituto vitae effugit nova pericula.

VIII. Secutum est illud: occiso Caesare, quum ¹⁾
respubl. penes Brutos ³⁾ videretur esse et Cassium,
ac tota civitas se ad eos ⁴⁾ convertisse ⁵⁾: sic M. ²⁾
Bruto usus est, ut nullo ille adolescens aequali fami-
liarius, quam hoc sene, neque solum eum principem
consilii haberet, sed etiam in convictu. Excogitatum ³⁾
est, a quibusdam, ut privatum aerarium Caesaris in-
terfectoribus ab equitibus Rom. constitueretur. Id
facile effici posse arbitrati sunt, si et principes illius
ordinis pecunias contulissent. Itaque appellatus est
a C. Flavio, Bruti familiari, Atticus, ut eius rei
princeps esse vellet. At ille, qui officia amicis ⁴⁾
praestanda sine factione existimaret, semperque a

9) Bard. al. incluserunt *se*, at cf. Günth. — 1) *enim* abest a codd., Lamb. emendationi debetur. — 2) *et* omittitur in ed. princ., Lamb. *sororis et Q. Ciceronis filium*. cf. Bard.

3) cod. Mend. et qdd. vett. edd. *Brutum*. — 4) Daehn. al. *ad eum*, scil. *Atticum*. — 5) vulgo additur *videretur*; alii omisso verbo *videretur* ediderunt *convertisset* contra codd. auctoritatem.

talibus se consiliis removiasset, respondit: si quid Brutus de suis facultatibus uti voluisset, usurum, quantum hae paterentur; se neque cum quoquam de ea re collocuturum, neque coitutum. Sic ille consensionis globus huius unus dissensione disiectus
 5 est. Neque multo post superior esse coepit Antonius, ita ut Brutus et Cassius, provinciarum, quae iis necis causa datae erant a consulibus, desperatis
 6 rebus, in exilium proficiscerentur. Atticus, qui pecuniam simul cum ceteris conferre noluerat florenti illi parti, abiecto Bruto Italiaque cedenti HS. centum millia muneri misit. Eidem in Epiro absens trecenta iussit dari; neque eo magis potenti adlatus est Antonio, neque desperatos reliquit.

IX. Secutum est bellum gestum apud Mutinam. In quo si tantum eum prudentem dicam, minus, quam debeam, praedicem, quum ille potius divinus fuerit: si divina ⁶⁾ appellanda est perpetua naturalis bonitas, quae nullis casibus neque agitur ⁷⁾, neque minuitur. Hostis Antonius iudicatus Italia cesserat; spes restituendi nulla erat. Non solum inimici ⁸⁾, qui tum erant potentissimi et plurimi, sed etiam, qui adversariis eius se dabant, et in eo laedendo aliquam consecuturos ⁹⁾ sperabant commendationem ¹⁾, Antonii familiares insequiebantur; uxorem Fulviam omnibus rebus spoliare cupiebant; liberos etiam extinguere parabant. Atticus, quum Ciceronis intima familiaritate uteretur, amicissimus esset Bruto, non modo nihil iis indulsit ad Antonium violandum, sed e contrario familiares eius ex urbe profugientes, quantum potuit, texit, quibus rebus indiguerunt,
 4 adiuvit. P. vero Volumnio ea tribuit, ut plura a

6) vulg. *divinatio*, vid. ed. Heid. — 7) Günth. al. *augetur* v. Brem. et Tzsch. — 8) al. *eius inimici*, vid. Daehn. — 9) al. *addunt se*, v. Daehn. et Bard. — 1) Guelph. Voss. A. C. *commoditatem*, Titz. *commendationem vel commoditatem* e cod. Gif.

parente proficisci non potuerint. Ipsi autem Fulviae, quum litibus distineretur magnisque terroribus vexaretur, tanta diligentia officium suum praestitit, ut nullum illa stiterit vadimonium sine Attico, hic sponsor omnium rerum fuerit. Quin etiam, quum illa fundum secunda fortuna emisset in diem, neque post calamitatem versuram facere potuisset, ille se interposuit, pecuniamque sine fenore sineque ulla stipulatione [ei] ²⁾ credidit, maximum existimans quaestum, memorem gratumque cognosci, simulque aperire, se non fortunae, sed hominibus solere esse amicum. Quae quum faciebat, nemo eum temporis causa facere poterat existimare. Nemini enim in opinionem veniebat, Antonium rerum potiturum. Sed sensim is a nonnullis optimatibus reprehendebatur, quod parum odisse malos cives videretur. Ille autem sui iudicii potius, quid se facere par esset, intuebatur, quam quid alii laudaturi forent.

X. Conversa subito fortuna est. Ut Antonius rediit in Italiam, nemo non magno in periculo Atticum putarat ³⁾ propter intimam familiaritatem Ciceronis et Bruti. Itaque ad adventum imperatorum de foro decesserat, timens proscriptionem, latebatque apud P. Volumnium, cui, ut ostendimus, paullo ante opem tulerat: (tanta varietas iis temporibus fuit fortunae, ut modo hi, modo illi in summo essent aut fastigio, aut periculo) habebatque secum Q. Gellium Canum, aequalem simillimumque sui. Hoc quoque ait Attici bonitatis exemplum, quod cum eo, quem puerum in ludo cognoverat, adeo coniuncte vixit, ut ad extremam aetatem amicitia eorum creverit. Antonius autem, etsi tanto odio ferebatur in Ciceronem ut non solum ei, sed omnibus etiam eius amicis

²⁾ pronomem *ei* abest a cod. Guelph. al.

³⁾ al. addunt *futurum*, quod abest a codd. Guelph. Letd. A. v. Bard.

esset inimicus, eosque vellet proscribere, multis hortantibus tamen Attici memor fuit officii, et ei, quam requisisset, ubinam esset, sua manu scripsit, ne timeret, statimque ad se veniret: se eum, et illius causa [Gellium] ⁴⁾ Canum de proscriptorum numero exemisse. Ac, ne quod [in] ⁵⁾ periculum incideret, **5** quod noctu fiebat, praesidium ei misit. Sic Atticus in summo timore non solum sibi, sed etiam ei, quem carissimum habebat, praesidio fuit. Neque enim suae solum a quoquam auxilium petiit salutis, sed coniunctim: ut appareret, nullam seiunctam sibi ab **6** eo velle fortunam. Quod si gubernator praecipua laude fertur, qui navem ex hieme marique scopuloso servat: cur non singularis eius existimetur prudentia qui ex tot tamque gravibus procellis civilibus ad incolumitatem pervenit?

XI. Quibus ex malis ut se emersit, ⁶⁾ nihil aliud egit, quam ut plurimis, quibus rebus posset, esset auxilio. Quum proscriptos praemiis imperatorum vulgus conquereret, nemo in Epirum venit, cui res ulla defuerit ⁷⁾; (nemini non ibi perpetuo manendi **2** potestas facta est,) qui etiam post proelium Philippense interitumque C. Cassii et M. Bruti L. Iulium Mocillam, praetorium, et eius filium, Aulumque Torquatum, ceterosque pari fortuna percussos, instituerit tueri, atque ex Epiro his omnia Samothraciam **3** supportari iusserit. Difficile est, omnia persequi, et non necessarium. Illud unum intelligi volumus, illius liberalitatem neque temporariam, neque callidam **4** fuisse. Id ex ipsis rebus ac temporibus iudicari potest, quod non florentibus se venditavit, sed afflictis

⁴⁾ codd. Guelph. Gif. omittunt nomen *Gellium*, cf. Bos. et Bard. — ⁵⁾ cod. Guelph. et omnes ante Lamb. edd. omittunt praepositionem *in*, cf. Bard.

⁶⁾ ita Lamb. emendavit, quem multi editor. secuti sunt; codd. vel *emersedat*, vel *emerserit* habent. cf. Daehn. —

⁷⁾ vulgo *res ulla defuerit*. vid. ed. Heid.

semper succurrit; qui quidem Serviliam, Bruti matrem, non minus post mortem eius quam florente⁸⁾ coluerit. Sic liberalitate utens nullas inimicitias gessit: quod neque laedebat quemquam, neque, si quam injuriam acceperat, malebat ulcisci⁹⁾, quam oblivisci. Idem immortalī memoria percepta retinebat beneficia; quae autem ipse tribuerat, tamdiu meminerat, quoad ille gratus erat, qui acceperat. Itaque hic fecit, ut vere dictum videatur: Sui cuiusque mores fingunt fortunam. Neque tamen prius ille fortunam, quam se ipse, finxit: qui cavit, ne qua in re iure plecteretur.

XII. His igitur rebus effecit, ut M. Vipsanius Agrippa, intima familiaritate coniunctus adolescenti Caesari, quum propter suam gratiam et Caesaris potentiam nullius conditionis non haberet potestatem, potissimum eius deligeret affinitatem, praecoptaretque equitis Romani filiam generosarum nuptiis. Atque harum nuptiarum conciliator fuit (non est enim celandum) M. Antonius, triumvir reipubl. constituendae: cuius gratia quum augere possessiones posset suas, tantum abfuit a cupiditate pecuniae, ut nulla in re usus sit ea, nisi in deprecandis amicorum aut periculis, aut incommodis. Quod quidem sub ipsa proscriptio- ne perillustre fuit. Nam quum L. Saufeii, equitis Romani, aequalis sui, qui¹⁾ complures annos, studio ductus philosophiae, Athenis habitabat, habebatque in Italia pretiosas possessiones, triumviri bona vendidissent consuetudine ea, qua tum res gerebantur: Attici labore atque industria factum est, ut eodem nuntio Saufeius fieret certior, se patrimonium amisisse et recuperasse. Idem L. Iulium Cali-

8) cod. Ernst. eo florente; ed. Longol. al. florentem. —

9) codd. non ulcisci; particulam non omittitur in ed. Iens. al. vett. et recentt. edd. — in ed. Iens. etiam omittitur: quum oblivisci. — cf. Daehn.

1) vulgo: qui cum eo, quod a multis codd. abst.

dum, quem post Lucretii Catullique mortem multo elegantissimum poetam nostram tulisse aetatem vere videor posse contendere, neque minus virum bonum optimisque artibus eruditum, post proscriptionem equitum propter magnas eius Africanas possessiones in proscriptorum numerum a P. Volumnio, praefecto
 5 fabrum Antonii, absentem relatum, expedit. Quod in praesenti ²⁾, utrum ei laboriosius an gloriosius fuerit, difficile fuit iudicare: quod, in eorum periculis, non secus absentes quam praesentes amicos Attico esse curae, cognitum est.

XIII. Neque vero minus ille vir bonus paterfamilias habitus est, quam civis. Nam quum esset pecuniosus, nemo illo minus fuit emax, minus aedificator. Neque tamen non in primis bene habitavit,
 2 omnibusque optimis rebus usus est. Nam domum habuit in colle Quirinali Tamphilanam, ab avunculo hereditate relictam: cuius amoenitas non aedificio, sed silva constabat. Ipsum enim tectum, antiquitus constitutum, plus salis, quam sumtus habebat: in quo nihil commutavit, nisi si quid vetustate coactus
 3 est. Usus est familia, si utilitate iudicandum est, optima; si forma, vix mediocri. Namque in ea erant pueri literatissimi, anagnostae optimi, et plurimi librarii, ut ne pedisequus quidem quisquam esset, qui non utrumque horum pulchre facere posset; pari modo artifices ceteri, quos cultus domesticus
 4 desiderat, apprime boni. Neque tamen horum quemquam, nisi domi natum domique factum, habuit: quod est signum non solum continentiae, sed etiam diligentiae. Nam et non intemperanter concupiscere, quod a plurimis videas, continentis debet duci: et potius diligentia, quam pretio, parare, non medio-
 5 ris est industriae. Elegans, non magnificus; splendidus, non sumtuosus; omni diligentia munditiam,

2) ed. Iens. al. *quod impetratum*. vid. ed. Heid.

non affluentiam, affectabat. Supellex modica, non multa, ut in neutram partem conspici posset. Nec praeteribo ³⁾, quamquam nonnullis leve visum iri ⁶ putem: quum inprimis lautus esset eques Romanus, et non parum liberaliter domum suam omnium ordinum homines invitaret, scimus ⁴⁾, non amplius, quam terna millia aeris, peraeque in singulos menses, ex ephemeride eum expensum sumtui ferre solitum. Atque hoc non auditum, sed cognitum praedicamus. Saepe enim propter familiaritatem domesticis rebus interfuimus. ⁷

XIV. Nemo in convivio eius aliud acroama audivit, quam anagnosten: quod nos quidem iucundissimum arbitramur. Neque umquam sine aliqua lectione apud eum coenatum est, ut non minus animo, quam ventre conviviae delectarentur. Namque eos vocabat, ² quorum mores a suis non abhorrent. Quum tanta pecuniae facta esset accessio, nihil de quotidiano cultu mutavit, nihil de vitae consuetudine: tantaque usus est moderatione, ut neque in sestertiq vices, quod a patre acceperat, parum se splendide gesserit, neque in sestertio centies affluentius vixerit, quam instituerat, parique fastigio steterit in utraque ³ fortuna. Nullos habuit hortos, nullam suburbanam aut maritimam sumtuosam villam, neque in Italia, praeter Ardeatinum et Nomentanum, rusticum praedium: omnisque eius pecuniae reditus constabat in Epiroticis et urbanis possessionibus. Ex quo cognosci potest, usum eum pecuniae non magnitudine, sed ratione metiri solitum.

XV. Mendacium neque dicebat, neque pati poterat. Itaque eius comitas non sine severitate erat, neque gravitas sine facilitate, ut difficile esset intel-

³⁾ ita cod. Voss. C. et qdd. vett. edd. — al. *Nec hoc praeteribo*. — ⁴⁾ ita omnes codd. — al. *omiserunt scimus*, sed cf. Harl.

lectu, utrum eum amici magis vererentur, an amarent. Quidquid rogabatur, religiose promittebat: quod non liberalis, sed levis arbitrabatur, polliceri,
 2 quod praestare non posset. Idem in nitendo, quod semel annuisset ⁵⁾, tanta erat cura, ut non mandata, sed suam rem videretur agere. Numquam suscepti negotii eum pertaesum est. Suam enim estimationem in ea re agi putabat: qua nihil habebat
 3 carius. Quo fiebat, ut omnia Ciceronum, Catonis ⁶⁾, Hortensii, Auli Torquati, multorum praeterea equitum Romanorum negotia procuraret. Ex quo iudicari poterat, non inertia, sed iudicio fugisse reipublicae procuracionem.

XVI. Humanitatis vero nullum afferre maius testimonium possum, quam quod adolescens idem seni Sullae fuerit iucundissimus, senex adolescenti M. Bruto; cum aequalibus autem suis, Q. Hortensio et M. Cicerone, sic vixerit, ut iudicare difficile sit,
 2 cui aetati fuerit aptissimus. Quamquam eum praecipue dilexit Cicero, ut ne frater quidem ei Quintus carior fuerit aut familiarior. Ei rei sunt indicio,
 3 praeter eos libros, in quibus de eo facit mentionem, qui in vulgus sunt ⁷⁾ editi, sexdecim volumina epistolarum, ab consulatu eius usque ad extremum tempus ad Atticum missarum: quae qui legat, non multum desideret historiam contextam illorum temporum.
 4 Sic enim omnia de studiis principum, vitiis ducum, mutationibus reipubl. perscripta sunt, ut nihil in iis non appareat, et facile existimari possit, prudentiam quodammodo esse divinationem. Non enim Cicero ea solum, quae vivo se acciderunt,

5) ita codd. Gif. Leid. A. Voss. A. C. — al. *admisisset*.

— 6) vulgo post nomen *Catonis* additur; *Marii*, Q., quod iam Lamb. omisit. cf. Daehn.

7) vulgo praemittunt *iam*, quod non est in cod. Guelph. et qdd. vett. edd.

futura praedixit, sed etiam, quae nunc usu veniunt, cecinit, ut vates.

XVII. De pietate autem Attici quid plura commemorem? quum hoc ipsum fere gloriantem audierim in funere matris suae, quam extulit annorum nonaginta, quum esset septem et sexaginta, se numquam cum matre in gratiam redisse, numquam cum sorore fuisse in similitudine, quam prope aequalem habebat. Quod est signum, aut nullam umquam inter eos querimoniam intercessisse, aut hunc ea fuisse in suos indulgentia, ut, quos amare deberet, irasci eis nefas duceret. Neque id fecit natura solum, quamquam omnes ei paremus, sed etiam doctrina. Nam et principum philosophorum ita percepta habuit praecepta, ut iis ad vitam agendam, non ad ostentationem, uteretur.

XVIII. Moris etiam maiorum summus imitator fuit antiquitatisque amator: quam adeo diligenter habuit cognitam, ut eam totam in eo volumine exposuerit, quo magistratus ornavit ⁸⁾. Nulla enim lex, neque pax, neque bellum, neque res illustris est populi Romani, quae non in eo suo tempore sit notata: et, quod difficillimum fuit, sic familiarum originem subtexuit, ut ex eo clarorum virorum propagines possimus cognoscere. Fecit hoc idem separatim in aliis libris: ut M. Bruti rogatu Iuniam familiam a stirpe ad hanc aetatem ordine enumeravit ⁹⁾, notans, qui, a quo ortus, quos honores, quibusque temporibus cepisset. Pari modo Marcelli Claudii, Marcellorum; Scipionis Corneli et Fabii Maximi, Fabiorum et Aemiliorum quoque: quibus libris nihil potest esse dulcius iis, qui aliquam cupiditatem habent notitiae clarorum virorum. Attigit quoque poëticam ¹⁾: cre-

8) al. *ordinavit*, cf. Daehn. ibiq. laudat. — 9) Guelph. Voss. A. C. Leid. B. edd. Longol. Lamb. al. *enumeraverit*. —

1) al. *poeticam*.

- 5 dimus, ne eius expers esset suavitatis. Namque ver-
sibus, qui honore rerumque gestarum amplitudine
ceteros Romani populi praestiterunt, exposuit ita,
6 ut sub singulorum imaginibus facta magistratusque
eorum non amplius quaternis quinisque versibus de-
scripserit: quod vix credendum sit, tantas res tam
breviter potuisse declarari. Est etiam unus liber,
Graece confectus, de consulatu Ciceronis.

- XIX. Hactenus Attico vivo edita haec ²⁾ a nobis
sunt. Nunc, quoniam fortuna nos superstites ei esse
voluit, reliqua persequemur, et, quantum potuerimus ³⁾, rerum exemplis lectores docebimus, sicut
supra significavimus, suos cuique mores plerumque
2 conciliare fortunam. Namque hic contentus ordine
equestri, quo erat ortus, in affinitatem pervenit im-
peratoris Divi filii ⁴⁾, quum iam ante familiaritatem
eius esset consecutus nulla alia re, quam elegantia
vitae, qua ceteros ceperat principes civitatis, digni-
3 tate pari, fortuna humilior. Tanta enim prosperi-
tas Caesarem est consecuta, ut nihil ei non tribuerit
fortuna, quod cuiquam ante detulerit; et conciliarit,
quod nemo adhuc civis Romanus quivit consequi.
4 Nata est autem Attico neptis ex Agrippa, cui virgi-
nem filiam collocaret. Hanc Caesar, vix anniculam,
Tiberio Claudio Neroni, Drusilla nato, privigno suo,
despondit: quae coniunctio necessitudinem eorum
sanxit, familiaritatem reddidit frequentiore.

- XX. Quamvis ante haec sponsalia non solum,
quum ab urbe abesset, numquam ad snorum quem-
quam literas misit, quin Attico mitteret, quid age-
ret, imprimis, quid legeret, quibusque in locis, et
2 quam diu esset moraturus: sed etiam, quum esset
in urbe, et propter suas infinitas occupationes minus

2) vulgo haec vel omittunt vel includunt. cf. ed. Heid. —

3) ita optimi codd. — al. poterimus. — 4) vulgo Divi Iulii
filii: vox Iulii omittitur in plerisque codd.

saepe, quam vellet, Attico frueretur, nullus dies temere intercessit ⁵⁾, quo non ad eum scriberet, quum modo aliquid de antiquitate ab eo requireret, modo aliquam [ei] ⁶⁾ quaestionem poëticam proponeret, interdum iocans eius verbosiores eliceret epistolas. Ex quo accidit, quum aedis ⁷⁾ Iovis Feretrii, ³ in Capitolio ab Romulo constituta, vetustate atque incuria detecta prolaberetur, ut Attici admonitu Caesar eam reficiendam curaret. Neque vero ab M. ⁴ Antonio minus absens literis colebatur: adeo, ut accurate ille ex ultimis terris, quid ageret, quid curae sibi haberet, certiore faceret Atticum. Hoc ⁵ quale sit, facilius existimabit is, qui iudicare poterit, quanta sit sapientiae, eorum retinere usum benevolentiamque, inter quos maximarum rerum non solum aemulatio, sed obtrectatio tanta intercedebat, quantum fuit incidere necesse inter Caesarem atque Antonium, quum se uterque principem non solum urbis Romanae, sed orbis terrarum esse cuperet.

XXI. Tali modo quum septem et septuaginta ¹ annos complexset, atque ad extremam senectutem non minus dignitate, quam gratia fortunaque crevisset, (multas enim hereditates nulla alia re, quam bonitate, est consecutus) tantaque prosperitate usus esset valetudinis, ut annis ⁶⁾ triginta medicina non indiguisset: nactus est morbum, quem initio et ² ipse et medici contemserunt. Nam putarunt esse tenesmon, cui remedia celeria faciliaque proponebantur. In hoc quum tres menses sine ullis doloribus, ³ praeterquam quos ex curatione capiebat, consumsisset: subito tanta vis morbi in unum ⁹⁾ intestinum

5) ita codd. et complures vett. edd., alii *intercesserit*; praeterea addunt *tamen* post vocem *dies*. — 6) deest hoc pronomen in cod. Guelph., iam Heusingero suspectum. —

7) ita codd. Guelph. Voss. C. Gif. Mend. — *al. aedes*. —

8) ita Guelph. Voss. A. C. multae vett. edd. — *al. annos*.

9) Daehn. e cod. Guelph. dedit *in inum intestinum*.

- prorupit, ut extremo tempore per lumbos fistula
 4 putris eruperit ¹⁾. Atque ²⁾ hoc priusquam ei acci-
 deret, postquam in dies dolores accrescere febres-
 que accessisse sensit, Agrippam generum ad se
 arcessi ³⁾ iussit, et cum eo L. Cornelium Balbum
 5 Sextumque Peducaem. Hos ut venisse vidit, in
 cubitum innixus: quantam, inquit, curam diligen-
 tiamque in valetudine mea tuenda hoc tempore
 adhibuerim, quum vos testes habeam, nihil necesse
 est pluribus verbis commemorare. Quibus quoniam,
 ut spero, satisfeci, me nihil reliqui fecisse, quod ad
 sanandum me pertineret, reliquum est, ut egomet
 6 mihi consulam. Id vos ignorare nolui. Nam mihi
 stat, alere morbum desinere. Namque his diebus,
 quidquid cibi potionisque ⁴⁾ sumsi, ita produxi vi-
 tam, ut auxerim dolores sine spe salutis. Quare a
 vobis peto primum, ut consilium probetis meum:
 deinde, ne frustra dehortando conemini.

- XXII. Hac oratione habita tanta constantia vocis
 atque vultus, ut non ex vita, sed ex domo in do-
 mum videretur migrare, quum quidem Agrippa eum
 2 flens atque osculans oraret atque obsecraret, ne ad
 id, quod ⁵⁾ natura cogeret, ipse quoque sibi acce-
 leraret, et, quoniam tum quoque posset temporibus
 superesse, se sibi suisque reservaret, preces eius
 3 taciturna sua obstinatione depressit ⁶⁾. Sic quum

1) cod. Guelph. *fistulae puris eruperint*, quae nescio an
 vera sit lectio. — Daehn. et Titz. e vett. edd. ediderunt:
fistulae putres eruperint. — 2) post particulam *Atque* contra
 codd. fidem al. addunt: *antea quidem morbi diuturnitatem*
moleste ferebat; quae quidem vocabula Günth. omisit atque
 etiam quae sequuntur: *hoc priusquam ei accideret*. — 3) al.
accersi e codd. Guelph. Gif. Voss. C. Mend. vid. Daehn. —
 4) *potionisque* abest a cod. Guelph. et qdd. vett. edd., Bard.
 Daehn. incluserunt.

5) ita Guelph. Voss. C. Leid. vulgo *ad id, ad quod*. —
 6) Lamb. *compressit*, cf. Brem.

biduum cibo se abstinuisset, subito febris decessit, leviorque morbus esse coepit. Tamen propositum nihilo secius pergit. Itaque die quinto post, quam id consilium inierat, pridie Calendas Apriles, Cn. Domitio, C. Sosio Coss. decessit. Elatus est in 4 lecticula, ut ipse praescripserat, sine ulla pompa funeris, comitantibus omnibus bonis, maxima vulgi frequentia. Sepultus est iuxta viam Appiam, ad quintum lapidem, in monumento Q. Caecilii, avunculi sui.

CORNELII NEPOTIS F R A G M E N T A,

CAPUT. I.

CHRONICORUM LIBRI.

- 1 De Homero et Hesiodo inter omnes fere scriptores constitit, utrumque vixisse ante Rom. conditam, ut Cornel. Nep. in primo Chronicorum de Homero dixit, annis circiter centum et sexaginta. *Gellius* XVII, 21, 3.
- 2 Nepoti et Lutatio Romam placet conditam Olympiadis septimae anno secundo. *Solin. Polyh.* c. I. ed. Salm.
- 3 Archilochum Nepos Cornel, tradit Tullo Hostilio Romae regnante iam tunc fuisse ¹⁾ poematis clarum et nobilem. *Gell.* XVII, 21, 8.
- 4 M. Manlius Romae, qui Gallos in obsidione Capitolii obrepentes per ardua depulerat, convictus est consilium de regno occupando inisse: damnatusque capitis e saxo Tarpeio, ut M. Varro ait, praiceps datus est; ut Cornel. autem Nepos scriptum reliquit, verberando necatus est. *Gell.* eod. l. §. 24.
- 5 Alexander Magnus Pellae oritur, ut Nepos edidit, M. Fab. Ambusto, T. Quinct. Capitolino Coss. post

1) al. omittunt *fuisse*.

R. c. anno trecentesimo octogesimo quinto. *Solin. Polyh. c. 40.*

P. Terentius maxime familiariter vixit cum Scipione Africano et C. Laelio etc., quamvis Corn. Nepos aequales fuisse tradat. *Donatus s. Suet. in vita Terentii.*

Scit hoc Nepos et Cassius in historia. *Minut. Fel. 7 c. 12. [Fischer].*

Nepotis lib, de historicis. V. *Dion. 3, 2. [F.]*

Tertull. Apol. 10. p. 111. Haverc. s. p. 31. Vol. V. Semler. [F.]

Catull. versic. ap. V. D. ad A. Gell. VII, 18. [F.]

Hieron. Euseb. Chron. Can. p. 106. Scal. et, ut ait, Corn. Nep. etc. [F.]

Lactant. I, 13, 8. Latini Nepos. [F.]

CAPUT II.

EXEMPLORUM LIBER II.

A virgine Vestale. *Sosipater Charis. lib. I. col. 119. Putsch.*

LIBER V.

Cornel. Nepos in libro exemplorum quinto literis mandavit, multis in Senatu placuisse, uti ii, qui redire nollent, datis custodibus ad Hannibalem deducerentur: sed eam sententiam numero plurium, quibus id non videretur, superatam; eos tamen, qui ad Hannibalem non redissent, usque adeo intestabiles invisosque fuisse, ut taedium vitae ceperint necemque sibi consciverint. *Gell. VII, 18, 11.*

CAPUT III.

ILLUSTRIUM VIRORUM LIBRI.

1 LIB. II. Subinde. *Charis. lib. II. col. 195. Putsch.*

LIB. XV. Harum partum. *Charis lib. I. p. 114.*

LIB. XVI. A fratre patruale. *Charis. lib. I. p. 113.*

INCERTA. QUO-LIBRO POSITA.

- 2 Carthago antea speciem habuit duplicis oppidi, quasi aliud alterum amplecteretur, cuius interior pars Byrsa dicebatur, exterior Magalia. Huius rei testis est Corn. Nepos in eo libro, qui Vita Illustrium inscribitur. *Servius* ad l. Aen. 372.

Propius Grammatico accessi. *Diomedes* lib. I. *Grammat.* p. 405.

- 3 *Albinus*, qui cum *L. Lucullo* consul fuit, res Romanas oratione Graeca scriptitavit. In eius historiae principio scriptum est ad hanc sententiam: *Neminem succensere sibi convenire, si quid in his libris parum compositae, aut minus eleganter scriptum foret. Nam sum, inquit, homo Romanus, natus in Latio; Graeca oratio a nobis alienissima est.* Ideoque veniam gratiamque malae existimationis, si quid esset erratum, postulavit. Ea quum legisset *Cato*: *nae tu, inquit, Aule, nimium nugator es, quum maluisti culpam deprecari, quam culpa vacare. Nam petere veniam solemus, aut quum imprudentes erravimus, aut quum compulsi* ²⁾ *peccavimus. Tibi, inquit, oro te, quis perpulit, ut id committeres, quod priusquam faceres, peteres, ut ignosceretur.* Scriptum hoc est in libro *Corn. Nepotis* de illustr. viris. *Gell.* XI, 8. etc. et *Macrob.* Saturn. prooem. extr. [*Fischer.* Margini h. l. adscripsit: *Hieron. epp.* f. 116 tom. I. *Erasmi*: de scriptor. eccles. f. 76. 4. tom. III.]

CAPUT IV.

DE VITA CICERONIS LIB. I.

- 1 *Cornelius Nepos*, et rerum memoriae non indiligens, et *M. Ciceronis*, ut qui maxime, amicus fami-

2) *Box.* *Stav.* *Tzsch.* ediderunt. *expulsi*, cf. *Bard.*, *Daehn.* malit *perpulsii*.

liarisque ³⁾ fuit. Atque is tamen in primo librorum, quos de vita illius composuit, errasse videtur, quum

Frustra Tullium suspicimus. Refert enim Corn. ² Nepos, se praesente, iisdem paene verbis quibus edita est, eam pro Cornelio, seditioso Tribuno, defensionem, peroratam. *Hieron. epist. LXXI, ad Panimachium c. 4.*

CAPUT V.

EPISTOL. AD CICERONEM LIB. I.

Corn. Nepos epistolam Alexandri ad Aristotelem latinam fecit. V. *Durantius* varr. II, 15. p. 249. b. ¹ tom. 3. Thes. Grut. [F.]

Tantum abest, ut ego magistram esse putem ² vitae philosophiam beataeque vitae perfectricem, ut nullis magis existimem opus esse magistros ⁵⁾ vivendi, quam plerisque, qui in ea disputanda versantur. Video enim magnam partem eorum, qui in schola de pudore et continentia praecipiant argutissime, eosdem in omnium libidinum cupiditatibus vivere. *Lactant. III. div. inst. c. 15, 10.*

M. TULL. CICERONIS

AD CORN. NEPOTEM EPISTOLARUM LIBER II.

Itaque nostri, quum omnia, quae dixissemus, ³ dicta essent: quae facete et breviter et acute locuti essemus, ea proprio nomine *dicta* voluerunt. *Macrob. Saturn. lib. II. c. 1.*

AD EUNDEM EX LIBRO INCERTO.

Hoc restiterat etiam, ut a te fictis adgrederer ⁴ donis. *Prisc. gramm. lib. VII. col. 792.*

3) Bos. Stav. omiserunt particulam *que*.

4) Heus. Longol. *primum*.

5) ita Heus. et Bard. — al. *magistris*.

eum scripsit tres et viginti annos natum, primam⁴⁾ causam iudicii publici egisse, Sextumque Roscium parricidii reum defendisse. *Gell.* XV, 28. pr.

Qui habet, ultro appetitur; qui est pauper, aspernatur. *Id.* eod. l.

- 5 Quid? oratorum quem huic antepones eorum, qui nihil aliud egerunt? quis sententiis aut acutior aut crebrior? quis verbis aut ornatiores aut elegantiores? *Suet.* in *Caes.* c. 55.

- 6 Ut Tullius docet, crudelitatis increpans Caesarem in quadam ad Nepotem epistola. Neque enim quidquam aliud est felicitas, inquit, nisi honestarum rerum prosperitas: vel, ut alio modo definiam: Felicitas est fortuna adiutrix consiliorum bonorum; quibus qui non utitur, felix nullo pacto esse potest. Ergo in perditis impiisque consiliis, quibus Caesar usus erat, nulla potuit esse felicitas; feliciorque meo iudicio Camillus exsulans, quam temporibus iisdem Manlius, etiamsi, id quod cupierat, regnare potuisset. *Ammian. Marc.* lib. XXI. extr.

- 7 Hacc quidam veterum formidantes, cognitiones actuum variorum, stylis uberioribus explicatas, non edidere superstites: ut in quadam ad Corn. Nepotem epistola Tullius quoque testis reverendus affirmat. *Ammian. Marc.* lib. XXVI. pr.

- 8 Sententiae illius Tullianae ignarus, docentis, infelices esse eos, qui omnia sibi licere existimarunt. *Ammian. Marc.* lib. XXVI. extr.

IDEM AD ATTICUM DE NEPOTE.

- 9 Nepotis epistolam exspecto. Cupidus ille meorum, qui ea, quibus maxime γαυριῶ, legenda non putet. Et αἰς μετ' ἀμύμονα: tu vero ἀμυμών, ille quidem ἀμβροτος, *Lib.* XVI. 5.

- 10 Male narras de Nepotis filio. Valde mehercule moveor et moleste fero. Nescieram omnino, esse istum puerum. *Ep.* 14.

CORNELII NEPOTIS FRAGMENTA INCERTA,

PARTIM QUO LIBRO POSITA,

PARTIM QUIBUS VERBIS CONCEPTA.

CAPUT VI.

Nepos auctore certo comperisse se ait, C. Laelium quondam in Puteolano Cal. Martiis, admonitum ab uxore temperius ut discumberet, petiisse ab ea, ne interPELLARETUR: serius tandem ingressum triclinium dixisse, non saepe in scribendo magis successisse sibi; deinde rogatum, ut scripta illa proferret, pronuntiasse versus, qui sunt in *ἐαυτοῦ τιμωροῦντες*: *Satis pol proterve me Syri promissa huc induxerunt. Donatus s. Suet. in vita Terent. c. 3.*

L. Otacilius Pilitus, rhetoricam professus, Cn. Pompeium Magn. docuit; patris eius res gestas, nec minus ipsius, compluribus libris exposuit: primus omnium libertinorum, ut Corn. Nepos opinatur, scribere historiam orsus non nisi ab honestissimo quoque scribi solitam. *Sueton. de clar. rhet. c. 3.*

Cornel. Nepos in libello, quo distinguit literatum ab erudito, literatos vulgo quidem appellari ait eos, qui aliquid diligenter et acute scienterque possint aut dicere aut scribere: ceterum proprie sic appellandos poetarum interpretes, qui a graecis *γραμματικοί* nominentur. *Suet. de illustr. Gramm. c. 4.*

CAPUT VII.

Praeter physicos Homerumque, qui universum orbem mari circumfusum esse dixerunt, Corn. Nepos, ut recentior auctor, ita certior tradit⁶⁾: testem autem rei Q. Metellum Celerem adiicit, eamque ita retulisse commemorat. Quum Galliae pro Consule⁷⁾

6) Tsch. Bard. omiserunt *tradit*, quod Heus. ex Voss. coniectura in textum recepit.

7) al. *proconsul*.

Corn. Nepos.

praecisset, Indos quosdam a rege Boiorum ⁸⁾ dono sibi datos; unde in eas terras devenissent, requirendo cognovisse, vi tempestatum ex Indicis aequoribus abreptos emensosque, quae intererant, tandem in Germaniae litora exisse. *Pomp. Mela* III, 5 extr. etc. *Plin.* lib. II, 67.

Largitudo. *Charis.* lib. I, 78.

- 2 Eudoxus quidam, avorum nostrorum temporibus quum Lathurum, regem Alexandriae, profugeret, Arabico sinu egressus, per hoc pelagus, ut Nepos affirmat, Gades usque pervectus est. *P. Mela* III, 9, 3. *Plin.* II, 67.

- 3 Paphlagonia insignis loco Heneto, a quo, ut Corn. Nepos perhibet, Paphlagoes in Italiam transvecti, mox Veneti sunt nominati. *Solin.* c. 44. p. 72. et *Plin.* VI, 2. in.

- 4 Fauces Oceani T. Livius ac Nepos Cornelius latitudinis tradiderunt, ubi minimum ⁹⁾, VII M. pass., ubi vero plurimum, X M. *Plin.* III, prooem.

- 5 Melpum opulentia praecipuum, quod ab Insubribus et Boiis et Senonibus deletum esse eo die, quo Camillus Veios ceperit, Nepos Corn. tradidit. *Plin.* III, 21. (al. 17.)

- 9 Ultra quam (Aquileiam) VI M. pass. Formio amnis ab Ravenna CLXXXIX M. pass. antiquus auctae Italiae terminus, nunc vero Istriae: quam cognominatam a flumine Istro, in Hadriam effluente a Danubio amne; eodemque Istro, adversum ¹⁾ Padi fauces, contrario eorum percussu mari interiecto dulcescente, plerique dixerere falso et Nepos [Cornelius] ²⁾ etiam, Padi accola. *Plin.* III, 22. (18.)

C A P U T VIII.

- 1 Alpes in longitudinem X M. pass. patere a supero mari ad inferum, Caelius tradit: Timagenes XXII

8) al. *Baetorum*, al. *Suevorum* cf. Tzsch.

9) al. *ubi minus*.

1) Ita Daehn. e fide codd. — al. *Eidemque Istro ex adverso Padi fauces*. — 2) *Cornelius* deest in Codd.

M. pass. deductis: in latitudinem autem Corn. Nepos centum M., T. Livius tria M. stadiorum, uterque diversis in locis. *Plin.* III, 23. (19.)

Inter duos Beporos, Thracium et Cimmerium, 2 directo cursu, ut auctor est Polybius, 10 M. pass. intersunt; circuitu vero totius Ponti vicies semel centena quinquaginta M., ut auctor est Varro et fere veteres. Nepos Cornelius trecenta millia quinquaginta adiicit. *Plin.* IV. 24. (12.)

In ora Oceani, colonia Augusti, Iulia Constantia, 3 — et ab ea XXXII M. pass. colonia, a Claudio Caesare facta, Lixos, —. Ibi regia Antaei, certamenque cum Hercule, et Hesperidum horti. — Exstat in ea et ara Herculis, nec praeter oleastros aliud ex narrato illo aurifero nemore. Minus profecto mirentur portentosa Graeciae mendacia, de iis et amne Lixos prodita, qui cogitent, nostros nuper paulo minus monstrifica quaedam de iisdem tradidisse; praevalidam hanc urbem maioremque Carthagine magna; praeterea ex adverso eius sitam et prope immenso tractu ab Tingi; quaeque alia Cornel. Nepos avidissime credit. *Plin.* V, 1.

Aliqui inter Pontum et Caspium mare CCCLXXV 4 M. pass. non amplius interesse tradiderunt: Corn. Nepos CCL millia. *Plin.* VI, 12. (11.)

Polybius in extrema Mauritania contra montem 5 Atlantem a terra stadia VIII abesse prodidit Cernen. Nepos Corn. ex adverso maxime Carthaginis a continente passus mille: non ampliorem circuitu duobus millibus. *Plin.* VI, 36. (31.)

Nepos Cornel., qui Divi Augusti principatu obiit: 6 Me, inquit, iuvene violacea purpura vigeat, cuius libra denariis centum venibat, nec multo post rubra Tarentina. Huic successit dibapha Tyria, quae in libras denariis mille non poterat eui. Hac P. Lentulus Spinther, Aedilis curulis, primus in praetexta usus improbatur: qua purpura quis non iam, inquit, tricoloraria facit. *Plin.* IX, 63. (39.)

- 7 Onychem etiam tum in Arabiae montibus, nec usquam aliubi nasci putavere nostri veteres: Sudines in Carmania ³⁾, potoriis vasis inde factis primum, dein pedibus lectorum sellisque; Cornel. Nepos tradit magno fuisse miraculo, quum P. Lentulus Spinther amphoras ex eo Chiorum ⁴⁾ magnitudine cadorum ostendisset: post quinquennium deinde, triginta duorum pedum longitudine columnas vidisse se. *Plin.* XXXVI, 12. (7.)

CAPUT IX.

- 1 Νέπως δὲ Κορινθίος, οὐχ ὑπὸ γήρως, φησιν, οὐδὲ νόσον παραλλάξαι τὸν Λούκουλλον, ἀλλὰ φαρμάκοις ὑπὸ τινος τῶν ἀπελευθέρων Καλλισθένους διαφθαρέντα. Τὰ δὲ φάρμακα δοθῆναι μὲν ὡς ἀγᾶπῳτο μᾶλλον ὁ Καλλισθένης ὑπ' αὐτοῦ, τοιαύτην ἔχειν δοκοῦντα τὴν δύναμιν· ἐκστῆσαι δὲ καὶ καταλύσαι τὸν λογισμόν, ὥστ' ἔτι ζῶντος αὐτοῦ, τὴν οὐσίαν διοικεῖν τὸν ἀδελφόν. *Plut.* in Lucull. extr. c. 43.
- 2 Νέπως ὁ Κορινθίος φησιν, οὐ Κράσσου, Βρούτου δὲ θριαμβεύσαντος ἀπὸ Λουσιτανῶν θυγατέρα γῆμαι Γάϊον. *Plut.* in Gracch. c. 21.
- 3 Ἀννίβα δὲ τῶν μὲν ἄλλων ἐλάχιστος ἦν λόγος, Μάρκελλον δὲ πεπτωκέναι πυθόμενος, αὐτὸς ἐξέδραμεν ἐπὶ τὸν τόπον. Καὶ τῷ νεκρῷ παραστὰς καὶ πολὺν χρόνον τὴν τε ῥώμην τοῦ σώματος καταμαθὼν καὶ τὸ εἶδος, οὔτε φωνὴν ἀφῆκεν ὑπερίφανον, οὔτε ἀπ' ὕψεως τὸ χαῖρον, ὥς ἂν τις ἐργάδῃ πολέμιον καὶ βαρὺν ἀπεκτονῶς, ἐξέφηνε. ἀλλ' ἐπιθαυμάσας τὸ παράλογον τῆς τελευτῆς, τὸν μὲν δακτύλιον ἀφείλετο, τὸ δὲ σῶμα κοσμήσας πρόποντι κόσμῳ, καὶ περιστελλας ἐντίμως ἔκαυσε, καὶ τὰ λείψανα συνθεῖς εἰς

3) Heus. Tzsch. Daehn. al. *Germania*; nostram tuentur Stav. Bard. al. — 4) pro *Chiorum* al. et *urceos*.

κάλπην ἀργυρεάν, καὶ χρυσοῦν ἐμβαλὼν στέφανον, ἀπέστειλε πρὸς τὸν υἱόν. Τῶν δὲ Νομάδων τινὲς περικυχόντες τοῖς κομίζουσιν, ὥρμησαν ἀφαιρεῖσθαι τὸ τεῦχος. Ἀντιλαμβανομένων δ' ἐκείνων, ἐκβιαζόμενοι καὶ μαχόμενοι διέρριψαν τὰ ὄσπᾶ. Πυθόμενος δὲ Ἀννίβας καὶ πρὸς τοὺς παρόντας εἰπὼν, οὐδὲν ἄρα δυνατόν γενέσθαι ἄκοντος Θεοῦ, τοῖς μὲν Νομάσιν ἐπέθηκε δίκην, οὐκ ἔτι δὲ κομιδῆς ἢ συλλογῆς τῶν λειψάνων ἐφρόντισεν, ὥς δὴ κατὰ Θεὸν τινα καὶ τῆς τελευτῆς καὶ τῆς ἀταφίας παραλόγως οὕτω τῷ Μαρκελλῷ γενομένης. Ταῦτα μὲν οὖν οἱ περὶ Κορνήλιον Νέπωτα καὶ Οὐαλέριον Μάξιμον ἱστορήκασιν. Λιβίας δὲ καὶ Καίσαρ ὁ σεβαστὸς κομίσθηναι τὴν ὕδριαν πρὸς τὸν υἱὸν εἰρήκασιν, καὶ ταφῆναι λαμπρῶς. *Plut. in Marcell. c. 30.*

Ἀννίβαν δὲ Μάρκελλος, ὥς μὲν οἱ περὶ Πολύβιον λέγουσιν, οὐδὲ ἄπαξ ἐνίκησεν, ἀλλ' ἀήττητος ἀνὴρ δοκῇ διαγενέσθαι μέχρι Σκιπίωνος. Ἡμεῖς δὲ Λιβίᾳ, Καίσαρι καὶ Νέπωτι, καὶ τῶν ἑλληνικῶν τῷ βασιλεῖ Ἰόβᾳ πιστευόμεν, ἤττας τινὰς καὶ τροπὰς ὑπὸ Μαρκελλοῦ τῶν σὺν Ἀννίβᾳ γενέσθαι. *Plut. in Comp. Pelop. cum Marcello. c. 1.*

CAPUT X.

Corn. Nepos, qui divi Augusti principatu obiit, 1
quum scriberet, turdos paullo ante coeptos saginari,
addidit, ciconias magis placere, quam grues, quum
haec nunc ales inter primas expetatur, illam vero
nemo velit attigisse. *Plin. 10, 23. (30.)*

Apud antiquos piscium nobilissimus habitus aci- 2
penser. — — Postea praecipuam auctoritatem fuisse
lupo et asellis, Corn. Nepos et Laberius, poeta mi-
norum, tradidere. *Plin. 9, 17. (28.)*

- 3 Magnitudo (loto arbori), quae piro, quamquam Nepos Cornelius brevem tradat ⁵⁾. — Vinum quoque exprimitur illi, simile mulso, quod ultra denos dies negat durare idem Nepos, baccasque contusas ⁶⁾ cum alica ad cibos dolio condi. *Plin.* 13, 17. (32.)
- 4 Scandula contectam fuisse Romam usque ad bellum Pyrrhi annis GCCCLXX, Corn. Nepos auctor est. *Plin.* 33, 11. (52.)
- 5 Corn. Nepos tradit, ante Sullae victoriam duo tantum triclinia Romae fuisse argentea. *Plin.* 33, 11. (52.)
- 6 Primus invenit eas (lineas) colorare, testa, ut ferunt, trita, Cleophantes Corinthius. Hunc aut eodem nomine alium fuisse, quem tradit Corn. Nepos secutum in Italiam Demaratum, Tarquinii Prisci, Romani regis, patrem fugientem a Corintho iniurias Cypseli tyranni, mox docebimus. *Plin.* 35, 3. (4.)
- 7 Primum Romae parietes crusta marmoris operuisse totius domus suae in Coelio monte Corn. Nepos tradidit Mamurram, Formiis natum, equitem Romanum, praefectum fabrum C. Caesaris in Gallia. — Namque adiecit idem Nepos, eum primum totis aedibus nullam, nisi e marmore, columnam habuisse, omnes solidas e Carystio aut Lunensi. *Plin.* 36, 6. (7.)

CAPUT XI.

- 1 Aedis Martis est in circo Flaminio architectata ab Hermodoro Salaminio. *Prisc.* lib. 8. col. 792.
- 2 Non amplius ter bibere Augustum solitum super coenam in castris apud Mutinam, Corn. Nepos tradit. *Suet.* Aug. c. 77.
- 3 In extrema Britanniae parte Memma, quam Cornelius etiam; Annalium scriptor, narrat metallis plurimis copiosam, herbis frequentem et his faraciorem omnibus, quae pecora magis, quam homines alant. Labi vero per eam multa quam maxima rela-

5) alii tradit. — 6) alii concisas.

bique flumina, gemmas margaritasque volventia.
Iornandes de reb. Gothic. c. 2.

CAPUT XII.

EPISTOLA CORNELIAE MATRIS GRACCHORUM.

Haec duo epistolae fragmenta in nonnullis codd. (Voss. A. Gif. al.) vitae Attici, in Voss. C. Catonis vitae adiuncta sunt. In cod. Gif. superinscripta sunt haec: *Verba ex epistola Corneliae, Gracchorum matris, ex libro Cornelii Nepotis de Latinis historicis excerpta.* — Ceterum subdititia putantur a multis. cf. Bard. ibiq. laud.

Dices 7) pulchrum esse inimicos ulcisci. Id neque maius, neque pulchrius cuiquam, atque esse mihi videtur; sed si liceat republica salva ea 8) persequi. Sed quatenus id fieri non potest, multo tempore multisque partibus inimici nostri non peribunt; atque uti nunc sunt, erunt potius, quam res publica profligetur atque pereat.

EADEM ALIO LOCO.

Verbis conceptis deierare ausim, praeterquam 2 qui Tiberium Gracchum necarunt, neminem inimicum tantum molestiae tantumque laboris, quantum te ob has res, mihi tradidisse: quem oportebat omnium eorum, quos ante habuerim liberos, partis eorum tolerare atque curare, ut quam minimum sollicitudinis in senecta haberem, utique, quaecumque ageres, ea velles maxime mihi placere, atque uti nefas haberes rerum maiorum adversum meam sententiam quidquam facere; praesertim mihi, cui parva pars vitae superest, ne id quidem tam breve spatium potest opitulari, quin et mihi adverseris et rem publicam profliges. Denique quae pausa erit? ecquando 9) desinet familia nostra insanire? ecquando modus ei rei haberi poterit? ecquando desinemus

7) ita Voss. A. Gif. Guelph. — al. *dicis.* — 8) al. *eos persequi.*

9) h. l. et in seqq. alii *et quando.*

et habentes et praebentes molestiis desistere? ecquando perpucescet niscenda atque perturbanda republica? Sed si omnino id fieri non potest, ubi ego mortua ero, petito tribunatum, post me facito, quod lubebit, quum ego non sentiam. Ubi mortua ero, parentabis mihi et invocabis Deum parentem. In eo tempore non pudet te eorum Deum preces ¹⁾ expetere, quos vivos atque praesentes, relictos atque desertos habueris? Ne ille sinat Iupiter te ea perseverare nec tibi tantam dementiam venire in animum, et, si perseveras, vereor, ne in omnem vitam tantum laboris culpa tua recipias, uti in nullo tempore tute tibi placere possis.


CAPUT XIII.

Haec duo fragmenta ex cod. antiquo Guelpherbyitano Ciceronis orationum Philippicarum desumpta I. Fr. Heusinger primus edidit. Excerpta esse dicuntur ex Cornelii de Latinis historicis libro.


1 Non ignorare debes unum hoc genus Latinarum literarum adhuc non modo non respondere Graeciae, sed omnino rude atque inchoatum morte Ciceronis relictum. Ille enim fuit unus, qui potuerit et etiam debuerit historiam digna voce pronuntiare: quippe qui oratoriam eloquentiam rudem a maioribus acceptam perpoliverit, philosophiam, ante eum incomptam, Latinam sua conformaverit oratione. Ex quo dubito, interitu eius utrum respublica, an historia magis doleat.

2 Locuples ac divina natura, quo maiorem sui pareret admirationem ponderatioraque sua essent beneficia, neque uni omnia dare nec rursus cuiquam omnia voluit negare.

1) I. Fr. Gronov. coniicit *paces*.







This book should be returned to
the Library on or before the last date
stamped below.

A fine of five cents a day is incurred
by retaining it beyond the specified
time.

Please return promptly.

APR 12 1941
STATE ST. LIB.
CHARGE